

穉

若  
傳

上海朱樹人譯著

教育  
小說  
穉者傳

上海文明書局出版



3 1238 1692 2

276.57  
345

小教育 穡者傳 (八種之一)

### 農業教育之部

天下至勞苦之事莫如農。然唯農可無求於人。而得人世所不能得之樂。吾國伯爾氏。以力田起家。其經營規畫之迹。有足多者。余故都其始末。撰為此冊。以諭方來。世之讀我書者。苟有一二人能淡其奔逐囂塵之見。而從事田園。卽業農者觀此。而於祖宗留遺之土地。益加護惜而培養焉。則是書雖不足爲農學之專書。而於世豈得謂無裨哉。麥爾香自叙。

#### 第一章

圖賴伯爾農家者流也。年三十。體壯氣充。美鬚髯。善詠諧。鼻鉅齒鑿。目奕奕有神。娶妻曰馬爾脫。生一子一女。一夕兩兒方就寢。馬爾脫在室中度置衣物。伯爾自外至。馬爾脫迎謂之曰。君來矣。事已就乎。伯爾曰。然。我已購定阿藏格田莊。明日

教育小說穡者傳

959246

謀遷而居焉。然其地荒蕪。幾三月。蕪穢之象。殊堪憐惻。是在我與若之善爲修治矣。頃自彼來。見牲畜之無所食也。急以芻數束饋之。我已令僕人米賽爾。今夕歇宿莊中。料檢一切。雖然。我飢欲死矣。速備晚餐。馬爾脫曰。唯。君其少坐。我將烹雞子餉君。語未畢。馬爾脫起身入廚。手搗雞子。搗聲達戶外。時雖當春令。而寒風猶砭骨。伯爾解客衣。易大呢袍。軟布鞋。圍爐而坐。須臾。爐中光焰騰熾。伯爾心歡甚。馬爾脫旋捧晚餐入。伯爾急起就席。食次。備述購地事。及所議交付時規約。先是伯爾之父鐵器鋪主也。生有二子。長者曰愛顛。次卽伯爾。愛顛攻苦力學。其父尤寵之。遣令入中學校肄業。學成。其父母以手藝賤役。不足辱愛顛。乃令就學於呂中登記官處。專理民國契據用印事務。職如中國之册房吏。繼念本地偏僻。無甚生色。又令入巴黎大線纜鋪充司帳。愛顛爲人勤慎。鋪主倚重之。是時伯爾亦漸長。其父僅令就學里塾。意將以本鋪授之。可無須大學問也。伯爾勤謹一如其兄。卒學時。年十三。卽在本鋪習業。非所喜也。居恒鬱鬱不樂。又以久居市肆。尠得清氣。遂患血虧。形容枯槁。

不思食。父母憂之。醫謂必令伯爾居鄉。否則危矣。父母不得已。居伯爾於鄰近田戶家。不久氣體健旺。伯爾自此始有樂農之意矣。田戶欲遣之歸。伯爾請留爲傭許之。伯爾居鄉二年。於田家各種操作。無不樂爲之。時而放羊牧豕。時而牽牛挽犁。性靈捷。不獨播種耕耘之法。盡皆嫻習。且已能造穀稔。稔即穀與穀簞矣。擷乾地及藁。藁。番粟等物。亦皆藁之遺。田戶見其年幼。間許於鬆土學習扶犁。伯爾則以爲大樂也。未幾忽辭田戶而入初等農學校。田戶爲之不怡。伯爾於農學早得門徑。又在塾中研究一切。所學益進。凡分畦播種。割刈收穫諸術。悉精之。而農器一項。尤所注意。不獨諳其用法。且能挾其弊而變通之。力作之暇。壹意讀書。凡書樓中圖籍。無不再三讀。及三年大考時。伯爾之學。超同學數倍。考官驚異之。出塾後。校長卽薦入及爾滿家爲農務總管。及爾滿者。邑之大田主也。父母早世。遺田五百。挨克打兒。法款名曰阿兒。每六阿兒又百分之六。十六合一。準款挨克打兒。即百阿兒也。內林木五分之二。穀草五分之三。及爾滿天性疎野。頗以業農爲樂。唯少不更事。須有忠勤明幹者助之。及得伯

爾深相愛信。及爾滿粗直長厚。肯爲所知出力。伯爾之得娶馬爾脫。及爾滿之力也。馬爾脫恬淡勤謹。一如其夫。能助其夫操作。凡烹飪餽禽製酪等事。皆一人任之。以故伉儷甚篤。生子一曰麻里斯。女一曰馬里。夫婦珍之如拱璧。及爾滿所居屋。距莊數里。第宅壯麗。然尙無子。心常快怏。以爲屋中無孩笑聲。雖甚安逸。不足樂也。及爾滿夫人常謂馬爾脫曰。我雖富財產。將安授之。曾不若汝之爲福人也。未幾。伯爾父死。伯爾既得遺產。益以己所儲蓄。妻之奩資。居然小康矣。是時阿藏格有一田莊。衆咸目爲石田。然得能者善治之。固腴壤也。及爾滿因勸伯爾購之。伯爾既重離賢主人。又慮功之難成。頗猶豫。及爾滿再三慫恿。而後從之。事成。歸告馬爾脫。馬爾脫嘿然良久。伯爾曰。卿何憂耶。馬爾脫曰。我非憂。屬有所思耳。伯爾請其說。馬爾脫曰。自我之歸爾家。衣食粗給。未嘗知憂懼。能如此。願亦足矣。復何他求乎。且安知所求之必可得乎。其道甚危。伯爾曰。我非不知足者。我亦欲久居此耳。雖然。及爾滿遇我厚。卿所知也。我之爲此。彼實贊成之。我嘗語及爾滿曰。

我事子久矣。如我去。誰可助子者。及而滿曰。子事我忠。然子未可量也。我誠不敢久羈子。又極言阿藏格田莊之美。功可必成。馬爾脫曰。及爾滿之說。可信乎。伯爾曰。然。其值既賤。且固腴壤也。今雖荒穢。能變其土質。洩其積水。加之以糞。所獲當三倍。始事誠勞。然卿固健婦。我非懦夫。爲兒女成一大產業。意中事耳。馬爾脫曰。既如此。請各努力。伯爾握其手而語之曰。卿請勿疑。我與若好爲之。夜深矣。盍少安。明日之事。不可悞也。伯爾遂入臥室。撫視其子女。乃睡。天未明。夫婦兩人卽起。馬爾脫在室中清檢衣物。伯爾搬運什物。載之車中。時兩兒猶酣睡也。料理粗畢。馬爾脫詣兩兒床前。呼曰。速醒速醒。兩兒摩抄倦眼。馬爾脫又呼曰。速起速起。爾父購田莊。今日往遷焉。不見室中之空。無所有乎。麻里斯曰。莊安在耶。馬爾脫曰。爾亦聞阿藏格乎。曰。聞之。是邑之鄙。瀕河之地也。母曰。然。兩兒詰問其母。刺刺不休。其母殊不暇答。麻里斯備陳阿藏格田莊之美。以告其妹。衣履畢。兩兒詣庭中觀覽良久。心樂甚。且笑且舞。戲語其馬曰。爾將載我等至大田莊矣。正嬉笑間。忽

聞犬吠聲。卽有三大犬搖尾而入。兩兒呼曰。及羅姆先生來矣。趨而迎之。及羅姆者。及爾滿家之牧羊人也。畜三大。出入必與俱。年不過五十。而霜鬢柴骨。老態可掬。性疎放。不樂與人近。獨厚愛麻里斯與馬里。時爲演說故事。謂兩童天性未漓。眞我知己。平居寡言笑。除及爾滿與伯爾外。未有與談者。自奉儉嗇。所食飲惟清水。麵包乳餅。遇慶節乃食猪油少許。有戲詰之者曰。爾曷勿言爾之銀錢何往。則嘿然不荅。其裝束絕怪。大衣闊帽。黑夜見之。令人失驚。婦女中有疑爲方術士者。性專壹。舍牧羊外。雖咫尺間事。亦熟視無覩也。雖不知書。願習於畜牧之術。牧羊至五六百頭。中有病者。能立辨而隔別之。所以煦嫗之者甚至。故及羅姆之羊。不常病。病亦不險。偶有倒斃者。及羅姆則引爲大戚。數年前其羊病瘟。及羅姆傷痛不已。幾成顛症云。及羅姆見兩兒慰問畢。乃曰。爾將捨我而去乎。曰。將遷阿藏格。先生知之乎。白知之。今日來相送也。旋詣伯爾與馬爾脫前握手脫帽爲禮。曰。爾兩人今爲田主人矣。曰。然。阿藏格田莊之主人也。及羅姆曰。是良田也。曰。如已荒。



何及羅姆指伯爾曰。有子在庸。何傷。且以子之才。又得賢內助。何患無成。馬爾脫  
嬌然笑。及羅姆曰。吾不多言。言必有中。雖然。吾之友唯子。子今去。吾何以爲情耶。  
伯爾曰。願數顧敝廬。曰。如吾之疎野何。伯爾曰。我與若非忘形交乎。且吾兄厚愛  
子。何可忘也。及羅姆曰。諾。吾試問子。子在阿藏格。亦將畜羊羣乎。曰。羊羣吾不敢  
言。若叢棘地。不耕種而僅生短草之地。法語謂之木。或田中收成後。可畜數頭耳。  
及羅姆曰。他日有可以益君者。不敢不盡力。伯爾以溫語謝之而去。束載既畢。伯  
爾取雀麥餵馬。旋挈妻子詣及爾滿家辭行。抵門。引者導至聽事。時及爾滿早餐  
甫畢。訝其來而詢之曰。今日非子遷居之日乎。伯爾曰。蒙君厚遇。久今當去矣。敢  
無一言以相告。思吾在君家之樂。此別能無歉然。卽山妻亦殊憫惻也。阿藏格之  
事。非君苦勸。我其終身在蒲槐爾矣。及爾滿田庄名。及爾滿曰。子何情之深也。自子之入  
吾家。先人遺業。日益昌茂。今子去。誰能如子者。吾之不忍子之去。固也。然使吾羈  
子於此。令子不得自營殖。吾自爲謀則善矣。雖然。其何以對子。今我誠不能無以

失子爲感。而問心固無愧也。十年之內。阿藏格可觀厥成。馬爾脫曰。幸賴天佑。願如君言。及爾滿曰。夫人勿疑。伯爾之購阿藏格。必非無益之費也。我於伯爾之才。歷試而深信之。爾兩人終身安富。我亦與有功焉。自茲以往。彼此雖不免離索之感。然於兩家交誼何損哉。伯爾肅然改容。及爾滿又曰。願彼此頻頻聚首。爾在阿藏格。我將來觀爾之田事。我在蒲槐爾。當掃榻以待爾之來也。伯爾感其言。與及爾滿握手爲歡。馬爾脫既喜且感。潸然淚下。與及爾滿夫人行合抱禮。及爾滿語伯爾曰。子今事煩。不敢久留子。雖然。不可無樽酒以相慶也。旋于架上取壺一杯。斟以白葡萄酒。舉觴而祝曰。願阿藏格庶物繁昌。願賢夫婦身軀康健。時兩兒在旁默視。及爾滿夫人呼而進之。予以餅各一枚。伯爾告辭回家。置兩兒于車中。全家遂行。阿藏格與蒲槐爾皆巴爾維爾鄉之所轄也。鄉與其四圍皆沃壤。擅林木原藪之勝。蒲槐爾在高原上。與一村相屬。村有大道。迤邐至谷口。小水流其間。兩岸草場豐茂。阿藏格濱河。與蒲槐爾對峙。相距約兩啓羅邁當。啓羅邁當里名。合華里。

分一里之三。伯爾自蒲槐爾至阿藏格一路居民稱慶相屬。抵門則米賽爾已候於門矣。米賽爾者及爾滿家舊僕也。年四十。勤儉有常度。惟好議論。主人有命必斷。斷爭辯。雖未嘗不勉從。而容色悻悻。終事而後已。然固不失爲篤實勇敢人也。故伯爾賃之爲傭。伯爾引車至庭中。卽問米賽爾曰。有新聞乎。曰無之。曰牲畜無恙耶。曰主人且弗慮。廐中鋪草蓐矣。於馬牛羊豕所居處鋪草一層令獸臥其上以清潔爲貴若無草卽以乾葉木屑炭屑代之等料一可免牲畜致病。一可獲肥田不可少之料也。槽內投芻豆矣。且我已灑掃屋舍。唯塵積太多。驟不能清耳。伯爾曰。爾昨夜宿何所。曰卽在廐中耳。伯爾曰。爾必能分我勞矣。曰不敢不勉。語未畢。卽助伯爾卸車中雜物。馬爾脫執帚一布一。掃除一周。時因屋之第二層樓。尙未修繕。一切俱就平屋安置。事粗定。各就席午餐。食品唯豬油一塊。乳餅一枚。食畢。伯爾語其妻與僕曰。吾將往觀田園矣。先是阿藏格田莊。以繁盛稱。居宅雖僅存中屋。而外觀尙壯。旁屋已傾頽。毀成平房。改爲馬廐與草料房。屋前庭院寬大。繚以舍垣。庭前有大門。臨官路。門題作半環形。刻有

古時軍器遺像。然模糊不能辨矣。屋有三層。下層最寬。餘兩層差窄。屋後有園。僅數阿兒地。四周有牆。園外小山之麓爲田畝。與田畝毗連者。有荒地六埃克打兒。荆棘叢焉。附近山谷間。有草場五埃克打兒。土性甚濕。蘆荻與雜草亂生。春秋雨漲。則變成沮洳。水滄葑不流之地也。太陽陰氣。易爲毒氣。人受之。生癰疾。草場與田畝間有地。窪突不平者。則石壙也。此壙累年不採。成瓦礫場矣。舊莊主年老多病。鰥居無子。有僕二人。利其將死。終日不事事。唯飽食而已。初時主人雖病。尙能勉理庶務。已而病篤。不得已。以家事委之外人。由是收穫日微。屋舍日圯。牲畜之倒斃者日衆。主人以憂憤死。歿後遺產。疎親數人分受之。四俗死者無子。卽親戚亦得承受遺產。數人者。稔知田務久荒。非大加修整。恐無人領佃。決計將田莊及牲畜器具召買。伯爾聞而購之。值甚賤。除付價外。囊中尙有餘金。可爲修理要工之需也。伯爾謀周覽各地。先詣馬廐。則見馬二。牝牛二。骨瘦形穢。病態支離。喟然歎曰。病若此。將安用耶。廐中陰黑難識別。一一引至庭中。諦觀良久。自原主歿後。邑之登記官卽遣人監守遺產。其人將兩馬畧

加調養。故受病尙淺。惟兩牛囚閉廐中。無所食。顛連殊可憫。伯爾曰。牛病至此。尙能生乳耶。馬爾脫曰。今夕且試之。米賽爾曰。子尙未見其昨日也。飢渴之狀。度必十五日不得食飲矣。我喂以料。飲以水。予以草蓐。乃有今日耳。伯爾心忖。草料房中。必一空如洗矣。及入視之。則堆積甚富。喜出望外。舊農器甚簡略。惟犁二。耙。礮。大車。小車。手車。穢雜車。各一。內惟兩犁可用。餘則需修繕矣。伯爾曰。得此亦足以生利。雖然。有田園在。盍往觀之。時兩兒偕父母同行。麻里斯有一聞一見。則欣然意得。馬里執母手問曰。雞何在。米賽爾曰。昔嘗有之。自舊主人歿後。已盡食之矣。伯爾旋詣屋後果蔬園。荆棘叢生。幾無一花一蔬。蓋不耕已兩年矣。所存惟果樹數株。嫩條數莖而已。牆角蔽北風處。有桑兩株。不知其何自來也。繼至麥田。所種乃小麥也。伯爾謂米賽爾曰。此麥稀疎瘦弱。莠草雜生。豐收安可望耶。明日爾須鋤治之。最妙之策。莫若蓋以肥料。然費過鉅。且俟異日。田中別有雀麥。疎弱類小麥。伯爾先欲拔去。而易以春麥。

按麥類種以下種以

繼念要工尙多。不果行。亦令米賽

爾鋤之如治小麥法。又至萊田。西國舊俗以歲耕種易盡地方故伯爾曰。惜哉。

有地而任其閒曠也。米賽爾曰。地可不令休息耶。伯爾曰。加以糞。無庸休息也。米

賽爾曰。人畜無安睡時。尙能操作耶。伯爾曰。爾過矣。地乃大機器。不畏勞也。彼其

生物之料。誠不能無缺乏。然苟有以補其乏。即滋生不息矣。米賽爾曰。是固然。今

秋下種。明歲不患無收穫也。然欲令於今夏即有所出。其道何由。伯爾曰。深耕而

厚糞之。米賽爾曰。糞何在。伯爾曰。有之何難。且可購也。今姑就可播種之地。盡力

耕之。下番薯白菜子。餘則更番鋤治。使土鬆散。令得吸空氣中生物之料也。伯爾

與米賽爾。又至叢棘地。米賽爾曰。是可以牧羊。伯爾曰。我將畜數頭。而徐俟其後。

米賽爾曰。後將何如。伯爾曰。子謂我購此地。豈聽其無所出乎。米賽爾曰。何謂也。

伯爾曰。我將墾之。令產美材耳。米賽爾曰。竊恐折子之犁也。伯爾曰。現有之犁。誠

難保其不折。吾將購堅者用之。墾田。固不能用常器也。其萬不可耕而需費太昂

者。可種以雜樹。要之不拘何法。歸於修治盡善。使無遺利而已。然其道宜漸。不可

遽也。諺不云乎。欲速則不達。時天已晚。馬爾脫絮兩兒先歸。整備晚餐。伯爾順道至山谷中草場。省覽一周。米賽爾曰。此間若非濕地則美矣。伯爾曰。子言良是。雖然。吾有道以處此。曰何如。伯爾曰。洩其水而已。曰何謂也。曰埋管於地。令水流出。曰是將舉草場而盡翻之矣。母乃勞乎。伯爾曰。無庸。掘溝數道。埋管其中而已。曰水將安往。曰於草場最窪處鑿一渠。令水注其中。由此入河。曰子可謂善謀者也。伯爾曰。胸有成算。今且勿言。夕陽在山矣。胡勿歸。抵家。馬爾脫語其夫曰。頃將牛乳甚少且瘦。乳之含油少者曰瘦乳君試嘗之。伯爾曰。果然。明日可出牛於廄。引至草場。改其食品。受病已深。調養不可不至也。然不久當自改觀。卿其無躁。我等來此幸及其時。過八日。牛且死矣。晚餐畢。米賽爾仍宿廄中。馬爾脫眠馬里於床。麻里斯解衣將就寢。驚呼其母曰。有大物在此。母曰。勿驚。一蜘蛛耳。且殺之矣。麻里斯曰。彼其螫人乎。母曰。否。然穢甚。不可觸也。觸則肌肉墳起。伯爾取而蹂之。既又以火燭視。周覽全室。唯聞撲牆聲。擊地聲。時自語曰。又去其一矣。即語麻里斯曰。今已肅

清爾其就息。麻里斯曰：我懼甚。伯爾令同榻而睡。室中火滅。忽有細聲如鑽木然。未幾嚙物聲。往來奔逐聲。什物顛簸聲。相繼大作。旋有一物跳入床。伯爾掀其被。物墜地作聲。曰是乃鼠也。卽起燃燭。鼠見火光皆竄去。三人始得安寢。黎明卽醒。合家俱起操作。伯爾用耙一鏟一車。一聚庭中散糞。其妻將取牛乳。米賽爾往麥田中鋤地去草。須臾水工坊工木工皆至。伯爾與諸人寒暄畢。導引指示。各工中以居室爲最要。地板承塵板牆垣急須修葺。平屋計方八邁。一邁當尺二尺七寸九分伯爾擬分其半以安置書籍會計簿。並察視庭中各事。其上層用板隔分之。爲兩兒臥室。最上層亦如之。爲他日女僕臥室。伯爾計慮周密。不敢留毫髮憾。致重修改造之費。工程以堅樸耐久養生適用爲主。不加雕飾也。又命工人於庭中築土墩二。以堆糞料。墩作斜坡形。趨向庭中心。別設石槽一溝。一令糞汁由槽流入溝。溝上設吸水具。如風日揚晒。糞料乾枯。則汲溝中水以灌之。伯爾知畜糞爲肥田美料。須用法存積。故不惜費而爲此也。又因舊牛欄。因牛馬並居一屋故原文或稱馬廄或稱牛欄卽上



也馬底

卑隘無光。不通風氣。命增高至三。適當有半。離地兩適當處開數竇。可隨時

啓閉。又扣土令堅。雜以黏土。

即陶人所用之坭也。原質爲石灰。能消化於水。能燒

空氣中濕氣及炭養氣。

墁地面。使可耐蹄蹴與糞溺之消蝕。其地面畧作斜形。令溺得由管

流入溝。

計即上受糞汁之溝也。

庭北隅建車房一所。安設大小各車及農器。巴爾維爾前見居民

之來觀阿藏格者。數日間踵相接。見巴爾多所紛更。訾議蜂起。或謂巴爾居屋。殊

不類田舍氣象。或謂改造牛欄。徒費無益。王侯第宅。非牲畜所居也。其尤不滿意

者。則庭中堆糞之土墩。與溺溝。以爲巴爾若有餘財。可購新地。何爲效及爾滿之

浪費乎。且及爾滿富翁也。爲此猶可。巴爾豈其比耶。巴爾聞而厭之。一日語庭中

諸鄉人曰。公等不以我護惜牲畜糞料爲然。何其償也。欲多用馬力。多獲牛乳。不

當居之善地。令得養生而息勞耶。公等思之。馬偃臥不得壽。食又不足。輓犁必無

力矣。牛若餵養無法。欄中不通光氣。乳必稀少而劣矣。至土墩溺溝之妄費與否。

公等久且自悟耳。又指庭中一人而語之曰。君料我麥田收穫可幾許。其人曰。舊

主人不善經理。所獲不能豐也。然田固良。一挨克打兒得十六愛格刀里脫爾。

爾法益名約合華一升有餘愛格 刀謂言百星脫爾即一石有餘也 或易爲力耳。伯爾曰：以我爲之。雖二十五愛格

刀里脫爾可穫也。曰子戲言耶。伯爾曰：蒲槐爾。及爾滿四之所穫。旣然矣。曰此非

蒲槐爾比也。伯爾曰：君謂此良田。雖蒲槐爾無以過之。乃又曰：我不能比及爾滿。

是何言與。其人笑曰：願子之有成也。伯爾曰：君試觀之。鄉之民有名斐里伯者。數

至阿藏格觀伯爾所爲。獨無譏訕語。且歎賞焉。詣伯爾家。先施爲禮。窺其意。若甚

願訂交者。年與伯爾相若。其父亦業農。家計頗裕。斐里伯既畧知學問。而娶妻亦

賢。以勤儉稱。故斐里伯之所處。乃人生極順之境也。是時其父漸老。苟斐里伯能

助力作。壹意講求農務。家業卽日益饒裕矣。不幸常入城市。昵比匪人。以致在加

非館。坊中園茶之日多。而在鄉之日少。伯爾知其爲人。待之殊漠然。斐里伯不爲

忤也。一日。兩人薄遊田野。野兔突起於前。斐里伯故好獵。見之技癢。率然曰：一槍

而中耳。卽語伯爾曰：爾之地。與我父之地相比也。我與爾。請交易其地。以相獵。可

乎。伯爾曰。我不知獵。斐里伯曰。爾在及爾滿家則然耳。今非其時也。伯爾曰。依然故我。斐里伯曰。異哉。爾之爲人也。伯爾曰。獵固樂事。然軍器據有費。西例凡獵者須先向官府領軍器據槍藥有費。歲終則成巨款矣。所費時日且不貲。如我者。尙有可費之閒日耶。斐里伯曰。星期非閒日乎。伯爾曰。星期惡得閒。且我不自獵。我可賃地與獵者。斐里伯曰。何錙銖之必較耶。伯爾曰。所得無幾。亦一入款也。斐里伯曰。既如此。請勿復言。卽辭去。自此遂罕至伯爾家矣。與伯爾相厚善者。及爾滿夫婦外。則有女蒙師若萌。鄉兵郎培爾。鄉學師諾愛爾。若萌者。賢女也。以孝聞。母老而病。若萌終身不嫁。所以奉養之者。無不至。又善理家。物經其手。必盡其用。時出其心得以語人。皆至言也。故馬爾脫深自結焉。郎培爾之居巴爾維爾也。十五年矣。能盡其職。執法極嚴。而性特和厚。公事畢。則歸與家人相團聚。率妻子灌園以爲樂。數年前。民有被火者。一孩在室中。郎培爾冒火劫出之。獲賞銀牌。邑人無不知其勇者。諾愛爾年約四十。娶於巴爾維爾。生兩子。染喉風相繼病殤。其妻未幾亦卒。諾愛爾故

績學士也。政府屢欲拔致之。諾愛爾以巴爾維爾爲妻子魂魄所在。依戀不忍去。常伯爾之在及爾滿家也。諾愛爾深相器重。樂觀其操作。伯爾時或爲浮言所搖。諾愛爾則從旁激勵之。伯爾嘗語諾愛爾曰。我所爲固當理否。諾愛爾曰。人之多言。不足畏也。彼實忌子之出其上耳。忌子之屏棄舊習耳。能持之以恒。子之理伸矣。伯爾之知會計。亦諾愛爾教之也。諾愛爾嘗語之曰。田莊與店肆無異。會計不可忽也。苟無此。何以知事之實在耶。伯爾曰。如我不解何。諾愛爾曰。事無易於此者。如不鄙予。願以相告。不久子自習之矣。其道無他。每晚費數分時。錄出入貨款於冊上。此冊名爲日流。以其記逐日之事也。至星期則贍於別冊。分類清錄。如家用牲畜小麥雀麥牛乳家禽等類。此冊名曰草總。年終取而較比之。則獲利與否。或應變更與否。可一覽而知矣。伯爾曰。既承惠教。請嘗試焉。數日後。諾愛爾卽釐定兩冊。攜交伯爾。冊面一書日流。一書草總。皆結構分明之圓體字也。

第二章

伯爾在阿藏格三月。耳目一新。庭院清潔無糞穢。垣壁皆重圻。氣象可愛。負牆之車房。布列大小各車。及諸農器。齊整絕倫。牛欄已增高。可通風氣。牲畜猶是也。然大改觀矣。馬力比前多兩倍。牛乳含油而濃。日可得六七里脫爾。前見又割牛欄一分。圍以柵。爲羊圈。畜羊二十頭。每日引至叢棘地。覓食。欄之隅有隙地。不足容牛馬。則畜驢於其中。驢性節畜易畜。而爲用甚大。能馱載菜蔬與糞料。馬爾脫率駕驢車入城售物。欄之又一隅。建一小房。爲米賽爾臥室。便檢察也。初伯爾爲米賽爾布楊寧。頗費籌畫。米賽爾笑謂無益。至是形神暢適。自謂雖王侯無以過也。伯爾居室澄澈無比。雖明目人不能得些子蛛絲跡。馬爾脫一見塵穢。或蟲蟻。視如仇敵。盡去以爲快。平屋日必洗拭。入室者脫屣而後進。堂中央設大几一。旁設橡木長椅。爲家人用膳處。別有爐灶一。上置什器。皆瑩潔。緣壁有碗櫃一。麪包箱一。坐椅數張。旁有小房。內設寫字桌一。書架一。卷軸羅列。上層樓則伯爾夫婦榻一。女馬里榻一。大衣櫥一。寫字桌一。坐椅數張。樓中央懸大鏡一。擺鐘一。鐘兩旁置。

蠟炬兩枝。子麻里斯獨臥一室。頗以此自矜。其馬里臥室。暫儲什物。待其稍長而授之。屋壁僅抹石灰。俟有餘財。再糊紙也。屋後有玻璃門。由此入果蔬園。門前草坡長數邁。當許中植鶴喙花。狀其形而名之。或名鳳呂草。艷色照人。其餘則種生菜白菜紅蘿。葡小荳黃荳酸菜等類。藉佐盤殮也。別有地方數區。周遭種蘋果樹。各以小徑隔別之。徑鋪沙礫。又有桃梨杏各樹。皆種牆陰。馬爾脫獨任灌園事。佐之者女僕若奈脫也。若奈脫年三十五。新寡。有一子。一日忽失所在。遍索不得。人皆以爲被拐也。若奈脫自夫沒後。窮甚。求入伯爾家爲傭。雖不給值。不計也。伯爾時無雇傭意。特憫其困而留之。使居次層小屋中。日令引牛羊至牧地。工資甚薄。許以境裕。再增其值。若奈脫作事有條理。性又勤儉。伯爾頗賴其力焉。伯爾居阿藏格。合家大小上下。無一閒人。時值夏令。每晨除兩兒外。皆寅正即起。最先者伯爾也。故米賽爾嘗曰。我早醒徒然耳。主人每先我在庭中矣。既起。伯爾與米賽爾拭理牲畜。予之食飲。易其草葶。馬爾脫擄取牛乳。若奈脫羹早餐。晨膳畢。伯爾與米賽爾赴田。

力作。若奈脫往果蔬園。爲耕耨培灌等事。馬爾脫爲兩兒衣履盥洗。及拂拭屋宇。既畢。乃備午餐。至午。家人就中堂同席食。食品精約。常設者爲湯一盃。蔬和肉一盤。乳餅一枚。酒少許。卽若奈脫手釀者也。食畢。伯爾與米賽爾仍往田中。若奈脫引牛羊至牧地。令一犬監視之。已則手持針黹。薄暮乃歸。若奈脫在牧地時。兩兒常相隨。縱令跳躍。壯其筋骨。馬爾脫在家中。縫紉衣服。清理屋宇。日西沒。家人相聚晚餐。食畢。察視牲畜。收檢各器。然後安睡。馬爾脫每夜登記出入貨款於冊上。又必巡視一周。故於諸人中爲最後睡。每星期。早工畢。各整飾衣裝。兩兒亦於是日洗澡。易潔衣。如天晴無要工。伯爾則挈之出游。馬爾脫性不好遊。惟在家核帳目。作精饌而已。伯爾於是年收穫。本無奢望。加以天時不節。愈益歉收。刈草時適久雨。草料盡淹。雖翻曬數次。然卒無救。麥收亦殊惡。伯爾每日未明卽起。仰視天光。焦盼特甚。一日忽聞響。伯爾急呼集家人。同往田中。米賽爾割麥。馬爾脫與若奈脫取而束之。疊成小稜。卽穀之小者。法取麥一束。倒其頭上。可免穀粒洩漏之患。米賽爾極

言此法之無益。伯爾置諸不理。惟語以如此可免濕氣。卽有雨亦無害。穀粒可不至發芽。米賽爾則曰。與其徒費日力。孰若從早打穀之爲美乎。收刈已畢。伯爾旋雇打麥者。用機器打之。西俗收穀時有拖機器。米賽爾又曰。費錢何爲。埃冬令農隙時。擊之以耒可矣。伯爾曰。勿患冬令之無所爲也。且我急欲賣麥。以買好籽種耳。米賽爾曰。小麥種耶。穰麥種耶。何患無種。伯爾曰。彼皆非佳種。我不願明歲之再歉收。欲得豐收。非下佳種不可。打麥畢。以簸箕揚之。卽入市求售。得值昂於他家。蓋是年麥皆濕。惟伯爾之麥則否。此用穰之效也。一日。伯爾入城售麥。購泥土數罐。載而歸。罐上用字爲號。米賽爾不知書。甚異之。然不敢問也。星期數週。伯爾從車房中取出白色之物。携入田中。撒成數堆。米賽爾作驚疑狀。伯爾笑語之曰。我固知爾之不解也。雖然。我前日從城中携數罐歸。爾尙憶之乎。米賽爾曰。然我爾時早覺其可笑也。伯爾曰。何可笑之有。我未知土性。我已使人攷驗之矣。米賽爾不知所謂。伯爾曰。察驗後知我地黏土太多。北地卽開宜。欲有以善之。非補



其闕不可。我所撒之各堆。其名曰馬爾納。具泥土不外三質者即名馬爾納亦有偏勝之

一質冰凍時。此物即成細粉。春季則糝而納於地中。來歲之收穫必豐矣。米賽爾

笑曰。泥土可任意改變乎。曰。然。黏土砂石灰三者相其宜而用之。是之謂土化。米

賽爾曰。真可笑哉。遂復操作如初。阿藏格庭院寬敞。伯爾於車房對面。又造鷄屋

豬圈各一所。畜公鷄一。母雞若干。又豚四頭。一擬宰而鹽之。以佐肴饌。其三則餵

令肥碩而賣之。是時麻里斯年當就傅。其父即遣令入塾。馬里知兄之將離也。不

禁哭泣。然亦漸長。略知人事。數日後亦不復哭矣。麻里斯則甚以讀書爲樂。每晨

携筐一。及書簿等物。單身入塾。天資穎敏。性亦馴謹。諾愛爾師即鄉學知其必成也。

甚樂造就之。馬爾脫戒其子途中勿游玩。出館後逕即歸家。麻里斯奉母命惟謹。

每夕返舍。不失片時。一日忽聞道中有軍隊將過。麻里斯隨他童往觀之。惟見步

隊馬隊砲隊。絡繹不絕。不復念及歸家。其母初不之憂也。以爲必諾愛爾羈之耳。

待一小時。麻里斯尙未歸。始憂甚。遣若奈脫至塾中訪問。則曰。已與他童同時出

塾矣。馬爾脫憂急無措。倚門而望。寂寂無人跡。無可探訪。心揣其子必爲車壓斃矣。否則溺水死矣。不覺潸然淚下。若奈脫固嘗親歷其事者。見之不勝酸楚。至兩小時後。始望見麻里斯狂奔而至。蓋直待軍隊過畢。自覺違母命。乃始馳歸也。馬爾脫知其子無恙。卽入內拭淚以待。麻里斯瑟縮至母前。親嘴如平時。其母拒之曰。爾從何來。麻里斯曰。適與諸同學觀軍隊耳。母曰。我憂爾已兩小時矣。爾心何忍哉。我今知爾之不愛其母也。今罰爾食麵包一枚。母許食他物。食畢卽睡。麻里斯哭泣請罪。其母不爲動。麻里斯乃與若奈脫入臥室。若奈脫助之解衣。且撫慰之曰。今而後爾當知母命之不可違矣。爾特未見爾母憂急之情形耳。彼度將失爾。又以我所親歷者。易地而思之。宜其寒心也。麻里斯含淚汪汪。目注視若奈脫。若欲有所問者。若奈脫曰。爾尙未聞此事乎。麻里斯仍默然。若奈脫乃告之曰。我數年前。亦有一兒。可愛如爾。讀書如爾。其違命亦如爾。我戒以途中勿游玩。兒勿從也。吾邑有流丐者。常結隊至各村。託詞爲人修銅勺。乘機攫物。一日忽闖入邑

界鄉官法語曰英爾如開官也禁令入城。故即在近爾父田莊處之鄉間居住。其衣服言語舉止絕異。小兒皆樂觀之。我戒吾兒勿往。兒勿聽。是夕遂不歸。而流丐亦散。人故以爲被拐也。吾待之迫索之急。無所見。爾試思吾當時憂急之情。當何如耶。我度我兒死矣。繼有鄰人語我。以親見我兒遊行流丐之側。當可遣歸。政府知此事。亦即懸賞購緝。幸我兒額上有痂。右眉有缺處。故尙望我兒之或可生還也。久之杳無蹤跡。嗚呼。我兒之違命故。遂令我終身飲恨耳。若奈脫語此時。辭色淒楚。麻里斯心大動。抱其項而語之曰。爲我語母親。我終不復違命矣。我益親爾。愛爾。以滅爾之戚也。明日麻里斯至父母前。誓終身不違命。自此欲爲非禮事。念及若奈脫之言。則惕然而止。伯爾旋向保險行。爲房屋保火險。爲蔬菜保雹險。邑人皆匿笑之。一日。斐里伯遇伯爾於途。詰之曰。爾真保險耶。曰。然。曰。爾錢得毋太多與。曰。非也。曰。然則費錢何爲。彼行中人。不過欲多得錢耳。萬一雹災爾田。彼豈真能償爾耶。曰。否。及爾滿於數年前。嘗得賠償矣。曰。爾口常曰及爾滿。不知及爾

滿財多勢大。彼若責償。誰敢不應。爾一鄉人耳。可相比耶。曰。及爾滿與我同耳。曰。爾真妄人也。爾惜費而不獵。獨不惜錢之爲人所賺耶。試觀我邑之中。亦有受欺如爾者乎。曰。爾過矣。曰。爾好自爲之。我初無與也。伯爾擴充農務。開曠田前見。已播小麥種。可望豐收。又以三葉草西名位來勿爾葉以三瓣合成花有黃白紫各色種類有百二十可以餵飼禽畜種橫麥田中。草得麥庇蔭。秋間即可收刈。至明歲則大盛矣。時挈麻里斯至田間。手扶耜。曰。教以蔬穀器具之名。麻里斯心志靜專。有所聞見。必謹識之。一日伯爾忽停車。抱其子於膝上而語之。曰。爾於田家操作。亦樂之乎。麻里斯曰。然。曰。爾長大當操何業。曰。我亦欲爲農夫耳。我亦欲耬地牧牛馬耳。雖然。扶犁之事。難乎否乎。伯爾曰。難哉。然我能教爾。麻里斯曰。父不久當教我耶。曰。十年後耳。麻里斯爽然若失。伯爾慰之曰。爾弗憂。試爲其易者。田中事不論老幼。可分任之也。舊石礦地前見。泥土均經挖動。伯爾令遍種槐樹。其枝可作小桿。亦可爲薪。尤佳者種至二十年後。可伐之以供輪輿木器之需。雖獲利較遲。然種時費無幾。已種後其子若孫。即

可不費一錢而坐享其利也。伯爾又於此礦地四周圍以鐵網。以桿架之上。施鋒刃。令獸不得近。麻里斯在塾六月。一夕諾愛爾至其家。時馬爾脫正與其夫閒談。諾愛爾前曰。麻里斯已能讀書矣。此好消息也。麻里斯真我高弟。性亦馴謹。吾甚喜之。從此篤學不倦。即可超乎諸同學之上。而成一學人矣。伯爾聞之喜。與麻里斯親嘴示愛。亦稱謝諾愛爾之教焉。諾愛爾曰。毋庸謝。使我盡得如麻里斯者而教之。我且以教書爲樂矣。其足苦我者。乃彼不悅學之情人。與謔浪狂妄之惡少耳。總之無論何業。有可喜。即可憎也。數日後。伯爾購兔二。與麻里斯以賞其讀書之勤。且語之曰。今與爾約。凡餽養清理等事。皆爾一人任之。所獲之利。亦爾一人得之。如爾不能自檢。而仍賴爾母與若奈脫之助者。則利盡歸我。乃於庭中擇一地。土勢略斜。令溺得流。用木板界作數房。房甚寬。兔得遊動自如。上施鐵網。圈極密。以禦狸鼠黃狼。麻里斯每日清晨出外。拾道旁菜葉。携歸家中。又求若奈脫。與以紅蘿蔔葉。番薯皮。及白菜葉。每晨所得之菜。爲露所濕。兔食之必病。故先

在車房晾乾。明日而後與之。伯爾給之草。令納糞相易。每禮拜四放墊。麻里斯

清理兔房一次。伯爾於所養禽畜。同時整頓。庭中已畜圖爾根公雞一頭。雞之佳種及

同種之母雞數頭。善下蛋。可望獲利。舊有之牛。生乳稀少。冬令饑而肥之。肥則不復生乳

只可出糞易以新產之牛。獲乳甚多。日可得十二三里脫爾。法置名見前又以著蓬菜。即製

種細切之。令發酵。及打麥時所留麥殼。與稗皮。大麥。真珠米粉。雜投芻料中。令牛

食之。乳更多而且美。惟禁用豆餅類等物。防乳有臭味也。馬爾脫日以所撈乳售

於鄰邑。價廉物美。邑人爭購之。罄所有。尚不足。不得已。更購他家乳以給之。斐里

伯亦於每晨送乳售與馬爾脫。一日馬爾脫自城中歸。狀有戚容。詢其故。則曰牛

生何等乳。我即售何等乳。從未提取其油。作偽者每先將乳中油質提出。藏亦未

攪以雜質。人乃曰我之乳劣。我不解其故。是以戚也。伯爾聞之。亦懊惱。心疑甚。因

囑其妻往城中購一量乳表。器以玻璃管為之。底實以水銀或鉛屑。管上刻有分寸。量乳中視升降之高低。視乳質之純雜。明

日斐里伯送乳如平時。伯爾語之曰。人有責我乳之劣者。我不能再受此種責備。

一則人將謂我無恥。一則被巡司覺察。恐干究罰也。我已購一量乳表。此後非純乳誓不復出售矣。斐里伯聞之。有不豫色。伯爾旋取量乳表。察驗自將之乳。一一合式。取驗斐里伯乳。已攪雜質矣。乃曰。我不能收爾乳也。斐里伯曰。異哉。伯爾曰。我不願我妻之再受惱也。斐里伯怫然曰。爾欲我何爲。且爾妻先已許我購之矣。伯爾曰。誠有之。然欲得純乳耳。今爾雜以水矣。斐里伯曰。爾想當然耳。伯爾曰。非也。有表爲證。斐里伯曰。即有水。庸何傷。獨不可售於鄉人耶。伯爾曰。然則爾可自售之。我不欲干涉也。斐里伯廢然而返。自此遂不復至阿藏格矣。然兩人未嘗絕交。每相遇於塗。仍彼此寒暄。惟斐里伯時思報復。見伯爾所爲。輒加譏訕。一日。伯爾率家人捕滅螻蟻。凡蝶類之蟲。生時有三變。始爲繭。終則爲蝶。而死者爲蟻。時最爲植物之害。故西國有捕蟻之令。斐里伯怪而問之。伯爾曰。吾遵府尊之諭耳。法國官制亦有府縣。惟轄地小而權輕耳。斐里伯曰。官令何足守。吾邑中作此無益之事者。唯爾耳。以予觀之。爾不如休息之爲愈。捕滅何爲哉。且隣家之蟻。獨不能集爾處耶。伯爾曰。此言良是。吾亦知一家捕蟻。終不能免蟲害。雖

然吾欲奉官令耳。且令誠當。人人能守。即大災可免矣。斐里伯曰。如他人之不補。何伯爾曰。吾守吾分而已。斐里伯晒曰。爾一人守分。亦奚益哉。伯爾居阿藏格。一年有半。有名罷倫者。棄商習農。亦卜居於此。購田莊曰培爾和。向在巴黎作香水生理。驟致鉅富。然自其經商時。卽有息肩田野之志。擬積餘資以老農終其身。嗣見生理日盛。遂於暇日講求農務。間至學塾讀書。又赴各處游覽。以考校農業之高下。遇有賽會。未嘗不往觀。然罷倫於農學雖畧知一二。惟苦無師法。又素屬門外漢。故所得尙淺。性剛愎。惡聞逆耳言。讀書時。胸中早具一佈置農務底稿。於天時地土境段坐落與擲節之法。全不省理。此其大病也。而罷倫侈然自足。謂效可操券。見他農之穩練者。以守舊識之節儉者。以吝嗇識之。以爲惟敢於前進者。乃能集事耳。旣得培爾和。卽日辭去舊佃戶。自行經理。其妻久居巴黎。習於戲劇宴會之樂。一旦離其父母朋友。獨居幽僻。心頗怨望。且憂其夫之無結局也。兩女亦鬱鬱不樂。乃共在罷倫前。聲明不理田務。足跡誓不入田中。不願衣履爲糞穢所



沾罷倫聞之。亦甚願一人經理。可爲所欲爲。毫無牽掣。故母女居鄉。惟以造挽鬢作針黹。拉風琴。閱閒書爲事。暇則駕車出遊。意猶未愜。交謫之聲。日甚一日。而罷倫殊不爲意。志得甚。自爲天下第一福人。依照胸中所具稿。改造田莊。牛欄極美。觀能容馬六十頭。馬廄能容馬二十匹。羊圈則可容羊四百頭。豬圈以舊屋爲之。牲畜皆取異國種。如圖阿姆種。地虛來種。約克謹種。國之皆英美兩種。俟考。法國牛種。以強健著名。亦屏棄不錄。倉房車房皆鉅麗。農具如打穀割麥收穫播種各器。皆取其新出而盡善者。罷倫又擬廣種著蓬菜。此物可造醬。亦見前。蒸取其醇。即以其皮餵牲畜。故於田莊旁造蒸酒房一所。統計營造之費。過原揣價遠甚。迨工竣而資本幾罄矣。然罷倫之志不少灰。以爲費此鉅本。必獲厚利。是時巴爾維爾。見前名。居民聞罷倫在培爾和大興土木。多所更張。爭往觀之。議論蠶起。數日間一邨之上。及加非館中。所聚相語者。非罷倫。卽罷倫之牛欄農器及牲畜也。時邑民已悅服伯爾。恒以疑事相質。有卽以罷倫之所爲者。則告之曰。罷倫太欲速。終恐無成。凡業農

者固須腳踏實地。行之以漸。今罷倫之牲畜美則美矣。然頗難調餉。獲利恐未可必矣。未幾人言闕然。惟聞罷倫虐待工人。僕役中有以細故被斥者。若輩知主人苛暴無恩。惟以唯諾從事。不爲盡心力。甚者或至偷竊。故雞鴨及蛋時有遺失。芻粹草糲即獸所食穢麥。亦遭蹂踐。罷倫勢孤甚。一人耳目。勢難遍察各處。忽有決水以灌其田廬者。虧損甚鉅。云一日伯爾正在蘿薑田中鋤草。斐里伯之父年六十有五矣。老態支離。行近伯爾前。伯爾弗之見也。斐里伯之父曰。子何勤之甚也。伯爾曰。淫雨數日。莠草亂生。若不早除。將受其害。曰。子言誠當。彼培爾和之田。亦復如是。吾遇罷倫而語之。罷倫曰。後將鋤治。今有要工。未暇也。伯爾曰。罷倫過矣。不速除。收穫必減色。彼豈不知鋤地之事。有不可一日緩者耶。斐里伯之父曰。我語之。亦如子言。罷倫殊勿省。斐里伯之父且語且行。愈近伯爾前。附耳語之曰。有事奉商。伯爾棄其鋤而起曰。何以教我。曰。吾兒數數謂吾老。彼當代吾勞。因促我以田屋授之。並許館我於家。而給我贍養銀。我念區區資產。皆我老夫婦疲筋力而得。

之。一旦捨去。如剗心肝。雖吾子猶弗忍也。且吾兒所喜者。飲博耳。閒游城市耳。殊不類勤謹人。我恐其不能踐言也。不幸言而中。我老夫婦將若之何。我見世之父母。生而傳產於子。其子不能如約。因而後悔者多矣。子明眼人也。謂我計將安出。伯爾曰。干涉他人事。何利於我。今斐里伯知之。徒取怨耳。我實不能越俎而謀。斐里伯之父曰。子無過慮。決不令我兒知之。曰。既如此。請留爾產。爾子有所需。給之。毋使乏。惟不可假以權。後日之事。誰能逆料耶。且爾僅一子。爾之贖產。他日終必歸斐里伯之手。今何急急爲。曰。子言甚合我心。我唯依教而行耳。伯爾曰。勿使斐里伯知此說之出於我也。曰。謹如命。先是斐里伯之父已有讓產意。及聞伯爾言。乃止。斐里伯夫婦多方促迫。其父不爲動。故父子間時有齟齬。甚或怨詈。斐里伯曰。父親已許我矣。今忽變計。得無有唆使者耶。其父弗答。一日斐里伯聒聒不休。其父不能忍。乃曰。我商諸某君。某君教我如此耳。終不舉其名。然斐里伯已心揣伯爾必與聞此事矣。數日後。途遇伯爾。怒容語之曰。請君弗干預他人之事。伯爾

已知其情。爲具道前日語。且曰。尊公如再見詢。我仍將以此說告之。斐里伯曰。爾必欲爲此。亦無不可。然須知爾爲此言。損我非淺。我父讓產之志已決。見爾後乃幡然變矣。且緘口之事。有何難哉。伯爾曰。甚難。我誠不願人之有所商於我。願人既不鄙予。予亦必盡言。不敢昧天良也。斐里伯曰。爾欲以天良害朋友乎。遂怫然而去。麻里斯所蓄兔。孳生蕃。兔屋中已有四十頭。因飼養太費。決計僅留一牝一牡。餘則餵令肥而售之。伯爾以淨皮三葉草四名脫來穢麥予麻里斯爲肥兔之料。麻里斯約以售價償其值。是年麻里斯所售兔。除費用外。計獲利三十佛郎克。法國銀錢照時價每佛郎克約值洋半元麻里斯得此鉅款。思一用之之法。愈想愈幻。久之計遂定。請其父買一山羊予馬里。以償其助役之勞。伯爾以山羊性兇野。所過無不殘破。未允其請。既而許之。惟戒其子女勿縱令馳驟。必以繩繫之。或拴於樁上。其尤宜加意者。勿使近石礦地。此地新種各樹見上文因山羊之性。最嗜草木之萌蘖也。約既定。乃購一無角之白山羊。此羊與兩兒甚相狎。其乳勝于母牛。馬爾脫教其女撈之。

馬里以纖弱之手。將取羊乳。亦一趣觀也。時麻里斯之三十佛郎克。除購羊外。尙有餘資。其父勸令分爲二股。麻里斯得其一。一以予馬里。一日清晨。借兩兒携款

投銀行納之。

此種銀行法。謂曰甘佛那克。巴爾月。譯音存錢之箱也。專代資戶。收存餘款。以免滲洩。自一佛那克。起均可收存。生利其利。除國家所設之郵

局。銀行外。概作三厘。至四厘。半凡存款者。均執有一帳簿。簿上法。明收。款付。利各項。每存款。至若干。可由銀行。作主。或本人。自請。將此款。買一國家。銀行。股票。此法。創始

於一千八百十八年。因于法。國。舉行。第三次。民。主。之。時。自。有。此。法。而。存。款。者。可。逕。向。郵

局。納。矣。伯爾于田務竭力經營。修改。雖所獲較之他家略豐。不爲失利。然亦無幾。殊

不能滿意。因悟糞壅耕耘之法。尙不足恃。又多方籌畫。將土性細意研究。始決計

專力于牛乳生理。因地近城市。銷路便捷。可日日獲利也。于是取其地之大半。以

種草料。而以餘地。輪種小麥。穰麥及著蓬菜。時草料田中。惟首蓆一區。尤爲豐美。

法取極佳之首蓆子。投穰麥田中。至明年則鋤去惡草。令易吸水氣。又於春日晴

和時。每一挨格打爾。法。就。名。見。前。撒以一百五十計羅格蘭姆。法。權。名。一。計。羅。蘭。姆。一。斤。有。半。石膏

粉。明年春亦如之。歲以爲常。先是米賽爾見伯爾携石膏歸。疑爲修造房屋之用。

及見伯爾撒播田中。則愕然曰。異哉。爾之爲是也。將何益哉。伯爾曰。爾謂我枉費錢財。作爲無益耶。米賽爾曰。非也。爾用心良苦。特我未見有以石膏糞田者。故不之信也。是又一新法歟。伯爾曰。非新法也。惟不甚古耳。人之知以石膏糞田。將百年矣。今且一一爲爾言之。昔美國格致家名法蘭格倫者。以創新法著名。歷經試驗。因悟石膏一物。最能肥草。苦勸世人用之。無如時人固執成見。多不之信。於是法蘭格倫就道傍種三葉草。上見至明年春。潛取石膏粉撒於田中。使成 *Patte* 四字形。譯言此處已撒石膏凡已撒石膏之處。其草更茂盛。四字明白可誦。而石膏之功用。遂顯于時。米賽爾聞而悅之。然猶不甚信。以爲此特記載家之說耳。欲驗其實。請于首稽觀之。時馬里年已五歲。父母亦遣入塾。塾師曰雅萌。乃處女也。其塾距諸愛爾之塾不遠。麻里斯每日往返。必與妹俱。出入提携。禦外侮甚力。一日兩兒自塾中歸。途遇同學諸兒。諸兒以麻里斯在塾中。常爲之寇。心頗啣之。因大相譏訕。一兒曰。麻里斯又挈其妹而歸矣。非其妹之保護主耶。一兒曰。彼欲歸則

歸矣。從不肯與同學游玩。一兒曰：彼兩人不居然好夫婦耶？一兒曰：請先生安。請夫人安。或推麻里斯之背。或摔馬里之衣。馬里驚而啜泣。愈曠近其兒。麻里斯乃謂諸兒曰：爾等勿擾我。我不與爾等談也。諸兒聞之。以爲懼已也。舉足踢麻里斯。麻里斯側身一閃。馬里倒於地。于是麻里斯拋去書籍。見一兒在旁。奮身擊之。未幾羣兒盡至。麻里斯拳足交加。卒以衆寡不敵而敗。幸諾愛爾適至。羣兒乃竄去。諾愛爾正欲前往。忽見麻里斯雙淚交流。怪問其故。則曰：衣服盡裂矣。恐母親之見責也。諾愛爾曰：勿憂。我見爾母而告之。遂挈麻里斯回阿藏格。

### 第三章

時及爾滿夫人。及爾滿即爾滿主獲生一女。名曰須若納。闔家歡喜非常。遵例至鄉長處呈報。即請伯爾爲證人。法例兒生三日內須至鄉長處報驗並遊鄰右作證及爾滿喜語伯爾曰：家無兒女。如無火之爐。夏雖勿覺。冬必受苦。幸哉我之獲有此兒也。乃今始得一結局矣。麻里斯與馬里聞之。亦樂甚。渴欲一見。須若納。與共遊玩。父母力阻之。始止。不料須

若納生甫三日。及爾滿夫人忽患傷寒症。勢危甚。遍請名醫。多方調治。馬爾脫亦左右侍奉。不離頃刻。然卒不起。下棺之日。即須若納領洗之明日也。西例凡始生之四子須洗地

牧堂領

及爾滿自此屏棄百務。壹意悼亡。時年已漸老。即撫養女兒事。亦不欲聞。

問。壹以委之馬爾脫。麻里斯與馬里聞及爾滿夫人之死。亦忽忽不樂。一日晚餐後。馬里見其父母相對歎。因低聲語其兄曰。爾見母親之啜泣乎。麻里斯曰。母親固愛及爾滿夫人者。馬里曰。及爾滿夫人誠賢。惜哉其女之不獲識其母也。人生不幸事。有甚於失母者乎。麻里斯聞其言。心爲之動。馬里曰。我母如不諱。我等將若之何。麻里斯止之曰。勿爲此言。馬里曰。父雖愛我。然不能不出外幹事。若衣我食。我省視我。惟母親是賴。設有不諱。將若之何。馬里言此時。淚如雨注。麻里斯又慰之曰。此不足慮也。母固無病。我等能從命率教。勿令惱怒以傷其身。即日益康健矣。馬里曰。謹如兄教。時馬里泣聲漸大。爲其母所聞。其母乃抱而語之曰。兒何泣。馬里曰。恐母親不諱。我等亦如須若納之不幸耳。其母曰。兒勿憂。我體尙健。



殊不似將死人。雖然兒固甚愛我耶。兩兒曰然。母曰。今我與若幸得親嘴以示愛。彼須若納。將不識此樂矣。他日彼長大時。爾等必厚待之。勿甚其失母之哀也。兩兒曰諾。時須若納年已漸大。紅鬚碧眼。果佳兒也。每日放塾時。其乳母必携至塾門外。令得與兩兒相值。兩兒亦不遺餘力。以博須若納之笑樂焉。一日諸兒正在及羅姆。見上。字者之側。集觀羊羣。麻里斯忽不見。旋取一物至。以授須若納。視之。乃福佛脫鳥巢也。歐洲鳥名。棕羽。銳喙。善歌。專以害稼之蟲類爲食。須若納見之大喜。及羅姆則蹙額而語麻里斯曰。是非爾所爲乎。曰然。將以博須若納之歡笑耳。及羅姆曰。爾過矣。曰巢固不當取耶。及羅姆曰。然。巢中之雛弱。不能自食。必死於爾手矣。凡非人所必食之物。而其物又無害於人者。斷不可無故戕其性命。况福佛脫鳥柔媚善嚙。又能爲人驅除蠹賊者乎。麻里斯曰。福佛脫固何等鳥耶。及羅姆曰。是能食田中之螟蟻者也。凡此類之鳥。均爲農家之保護主。故多鳥爲地方幸事。若居民以弋鳥爲樂。則其地之收穫必不佳。然則鳥也者。匪特不當害。不更當從而護惜之耶。麻里

斯曰。我苦不知耳。今且還之矣。及羅姆曰。竊恐其母之不復來耳。曰。我能安置安帖。令不見有移動之迹也。麻里斯即馳去。歸而語及羅姆曰。可喜可喜。我携巢置原處畢。即潛身林後以伺之。旋見老鳥飛入巢。遍哺其雛也。及爾滿悼亡後。已百念俱灰。至是見其女漸長。知識漸開。頓覺有生人趣。每顧其女。輒含淚而笑。其女日益可愛。及爾滿屬望之情日益殷。一日須若納偶抱微疾。及爾滿驚惶過分。未幾遂愈。然愛女之情。則自是而日切矣。及爾滿屏棄家務。幾及一年。至是重理舊業。經營不輟。其意無非欲增其女之福樂而已。時携須若納至阿藏格。令與伯爾兩兒共相遊玩。已則與伯爾縱談農事。一日午後。伯爾正在草場中刈草。及爾滿語之曰。此草場未爲盡善也。伯爾曰。然。土性太濕。非用洩水法不可。及爾滿曰。子何故不爲。伯爾曰。年來收穫不佳。而房屋牲畜農具等類。均須以時修改。再加洩水之費。則力有不逮。故不能決計爲之也。及爾滿曰。曷不借錢爲之。曰。借錢爲破產之道。何今日忽爲此說耶。及爾滿曰。農人以產業抵借款項。如能按期付息歸

本耗費已鉅。設或不能如約。患將不可勝言。此借錢之所以易於破產也。然若用  
 本利合歸之法。則借錢反爲有益之事矣。今子之草場。約五挨克打兒。見法款名非  
 有二千佛郎克。不能用洩水之法。子若借此款項。年息須一百佛郎克。以常年計五  
 屆期又須如數歸本。此法仍不妙。蓋恐屆時或因收穫不豐。或別有不測。不能  
 如數清償也。若接年付息一百二十佛郎克。滿二十五年。卽作爲本利俱清。豈非  
 妙策。子又何惜此區區而不爲此有益之事乎。伯爾曰。何謂也。彼借錢者豈肯得  
 利而失其本耶。及爾滿曰。本係五釐起息。今改作六釐。不得謂之失其本也。伯爾  
 曰。卽以六釐計。至二十五年。每百佛郎克。僅歸還二十五佛郎克耳。非虧本而何。  
 及爾滿曰。子殆忘此爲本利遞減之法耶。譬如第一年之年終。每百佛郎克付息六  
 佛郎。內以五佛郎抵息。其一佛郎。雖名爲息。實則歸本也。故第二年。其本已減至  
 九十九佛郎。至年終仍付息六佛郎。內以四佛郎九十五生丁。生丁即佛郎百分之一抵息。  
 以一佛郎五生丁歸本。如此逐年遞減。至二十五年而本利俱清矣。伯爾曰。是已。

雖然款安從貸。及爾滿曰。政府可貸也。一千八百五十八年定議。預備銀一百兆佛郎。存儲借錢局。專備民間貸款洩水之用。此與中國青苗法同一便民之政而制尤善。惟政府必先遣工程師勘驗。是否有利。如果可行。即由工程師繪成圖樣。再由民人繕一契據。呈送册房。俟有興工日期。其款即可交付也。伯爾曰。恨我之不早見此也。草場洩水後。其值當可二三倍。我何惜此區區之息而不爲耶。他日我入城。必首舉此事矣。未幾工作遂興。於是繪圖者。掘溝者。埋管者。一時齎集。巴爾維爾<sup>上見</sup>居民大挪笑之。以爲惟及爾滿富翁。方克爲此。伯爾中人之產。乃欲鹵莽從事耶。伯爾置若罔聞。惟命於草場低窪處。築一蓄水池。以受洩出之水。池旁鑿一溝。溝有活塞。水溢則啓之。使入大河。是時於草坡高處。獲一泉源。水停蓄不得出。伯爾則導之使流。更多爲引水溝。俾得逕入蓄水池。遇盛夏乾暵時。又可引以灌溉。工既竣。伯爾命米賽爾。收聚道旁及溝中之泥。和以木灰與石灰。木灰含石灰與鐵質甚多。爲養田佳品。攪令勻細。撒於草地上。自是蘆葦不生。而美草茁矣。伯爾又種水草於引水溝中。而納魚

數頭於蓄水池。如鱸魚、鯉魚、大頭魚之類。數年後。孳生繁衍。除供膳外。尙可售以獲利。雖爲利無幾。然農夫固不當遺小利也。蓄水池得泉水引灌。清冽異常。每當夏日炎暑。農功粗畢。伯爾教兩兒以泐水術。兩兒甚樂之。常執泐水衣預待。及見父至。卽馳赴。解衣待命。父必撫摩其身。察其汗已止否。乃令入水。兩兒一聞父命。卽躍入水中。歡呼笑逐。父亦隨之而下。兩兒笑語旋止。靜聽其父之教。教畢。縱之使去。兩兒喜欲狂矣。麻里斯學之甚速。不一月。卽能橫過池面。且喜泐入深處。馬里志稍嫌。見水略深。卽攙持其父。或退回近岸。其父促令沒頂。馬里殊不願。曰。恐致耳病也。麻里斯則最喜沒頂。其父時取白石子投水底。以試其能。麻里斯輒能拾取之。伯爾既廣種草料。多養牲畜。乃於居屋旁。別築牛欄。獨令牛居其中。而以舊牛欄畜馬羊各牲畜。既得美食。肥健自倍。卽山羊乳一項。已足供伯爾全家之用矣。每末一次刈草後。其半常置欄中。故生乳益多。日獲十二里脫爾。法地名爲中數。每日清晨。馬爾脫駕驢車。載雞、兔、雞子等物。向各主戶求售。售得之利。卽以

添購牲畜器具。擴充農務。自是收穫極佳。而阿藏格乃有豐盈之象矣。然伯爾所得銀錢。亦不盡用於田務。常存儲幾分。以備不時之需。且爲相機置產之用。時值冬令嚴寒。馬爾脫侵晨出外。遂得傷風症。漸變爲肺管發炎病。伯爾延醫調治。醫戒勿早出。否則有性命之憂。乃以售乳等事。委之若奈脫。見上條無如若奈脫雖竭力招攬。而各主戶。終以不見馬爾脫爲恨。因此生意漸減。幸天已轉暖。馬爾脫之病遂痊。然伯爾已慮及來冬。恐其妻血氣漸衰。不復能耐寒。謀變通牛乳生理。因取架上書讀之。復商於及爾滿。決計造一牛乳房。以製乳油。遂於花園向北處。建樓房一座。其下層專藏牛乳。入地深兩邁當許。窗與地面平。關閉甚嚴。護以銅鐵絲布。以極細之銅鐵絲爲之。取其通氣而蟲不得入也。以禦蠅蟲。上層分大小兩間。其一爲洗淨之用。其一爲打乳之用。打乳間地鋪石片。勢畧斜。水可流出。此屋概用空心磚造成。便於通氣。上蓋以瓦。其屋頂與承塵板之間。留一空隙。使不至太熱。又設火爐於打乳間之一隅。令室中常得應有之熱度。且可煮水。以洗滌各器。牛乳房所用之水。卽

草坡之泉水也。阿藏格所產乳，含油極多，以製乳油，必成佳品。况如馬爾脫之潔淨精細，更助以功多力少之器具，獲利定可操券。伯爾熟思既久，乃購打乳盛油各器。他若瓶、甕、策、勺之屬畢具。初次所製乳油，殊未滿意，較之他家所製者，無甚軒輊。經馬爾脫及若奈脫細意研求，提淨小乳。之乳中不能凝結於是阿藏格之油，質良味美，能經久不壞矣。馬爾脫將此油製成餅。打出之乳油成粒形，或長條均可製成餅形。每枚準重五格蘭姆。法權名裹以潔白棉布，入市求售，常得善價。銷路既廣，盡以所有乳製油，尚不足。因購之於鄰村各戶。然伯爾稔知鄉人貪利，且有鑒於斐里伯之事，故購乳時，必親選牲畜，非用量乳表試驗，則不購也。各戶見伯爾刻意挑剔，頗滋不悅。惟因其能付現錢，故願與之交易焉。馬爾脫又以提去乳油剩下之質，製瘦乳餅。乳中有兩質，一即油，一名加西，衣尼者曰應乳餅，其用加西衣尼者曰瘦乳餅。售之邑中。及田莊居民，伯爾之教兒女，常於消遣中寓訓誨。一日授以一盒，盒中有灰色蟲數十兩，兒見之愕然。伯爾告之曰：是名爲蠶，我購自城中，爲爾等之樂於養之也。今

春氣候和暖。園中桑葉沃若。爾等能加意飼養。不兩月即可得絲矣。兩兒不解養蠶法。頗有難色。其父又曰。我於育蠶事。亦屬門外漢。唯知其所需者熱。所食者桑葉而已。我邑氣候稍冷。素不養蠶。法國南方諸郡。以蠶絲爲物產之一大宗。彼及羅姆者。見上。南方人也。爾等可就而問。明日兩兒往園中摘桑葉。投之盒中。卽奔赴及羅姆家。具道來意。及羅姆曰。爾將何以飼爾蠶。兩兒曰。我家園中有桑二株。可以採而飼之。及羅姆曰。初摘之桑葉不可用也。恐有濕葉。將致蠶病。又蠶房必暖。冷則蠶死。今日相告。唯此數語。少頃將親詣爾家。爲爾佈置蠶房焉。是夕及羅姆至阿藏格。兩兒出蠶示之。及羅姆笑曰。是區區者不能獲利也。兩兒曰。有二十五蠶矣。及羅姆曰。我將教爾養之之法。如養二萬五千蠶也。兩兒曰。誰能養二萬五千蠶耶。及羅姆曰。蠶子一兩。可得蠶三萬。我南方小蠶戶。亦必養一二兩也。唯育如許蠶。卽須摘如許葉。至末數日。則食葉尤多。我今授汝兩筐。爾試以桑葉鋪其上。乃置蠶於一筐。視葉將盡。卽取又一筐承其下。蠶自能往覓食矣。如是者



日必兩次。蠶既就筐。即棄去殘葉。易置新葉。凡育蠶以通風氣爲要事。遇晴日必開窗戶。數日後見蠶不食。不必憂疑。蓋將蛻矣。蠶自長大至吐絲。必蛻四次也。四蛻後見蠶昂頭欲上。爾以小樹枝投之。蠶卽上山作繭。至此蠶不復動。爾可少休。繭成後。取置爐上烘之。蛹已死。其絲可用也。若欲令成蛾。則取繭置布上。或盒中。二十日後。蛾刺繭而出。生子傳種而死。至明春。則子出而新蠶生矣。兩月之內。巴爾維爾之學童。赴阿藏格觀蠶者。絡繹不絕。諸愛爾與若萌俱鄉學亦挈其學徒。先後來觀。時蛾正生子。諾愛爾語羣兒曰。蠶自中國來。乃我法國南方物產之一大宗也。往年法國歲出繭二十兆。至二十五兆。計羅格蘭姆法極名一計羅格蘭姆。值五佛郎。卽歲得一百兆佛郎矣。忽於一千八百五十四年。蠶得瘟病。出繭之數銳減。國人急謀去病之法。百試無效。於是育蠶家日少一日。蓋非巴斯端法人創得新法。則蠶業幾絕矣。巴斯端驗出受病之蠶。其身均有微點。病蠶卽生病子。故欲去其病。非絕其種不可。法取生子之蛾。用布連紙包之。至夏或冬時。取出其蛾。

和水搗碎。用顯微鏡諦觀之。見有微點。即燒去其子。不用。此法今已通行。凡業蠶之家。必用顯微鏡察驗。然後留種。法國蠶務既衰。而得以復振者。皆巴斯端之功也。是歲夏令甚熱。麥成熟較常歲早三星期。西歷七月初。已可收穫。農夫額手相慶。預計今歲利息。皆喜溢眉宇。彼此相遇。必問何時割麥。告之者不曰八日後。即十日後也。然農事最難逆料。田中之麥。尙未入倉。即難視爲必得。一日。日間酷熱。入晚忽見黑雲自南方來。雲中有白點。經巴爾維爾。即化爲大雹而下。田中之麥。及樹上之果與草。均受損傷。飛鳥爲雹所擊。皆臥地歛。被災之戶甚衆。紛紛向政府求賑。政府則按其收穫之值。而給以百分之五。唯及爾滿罷倫及伯爾三人。有保險行償其值。獨不受虧。頗爲他家所嫉。一日有人語伯爾曰。子何其幸也。伯爾曰。何謂也。其人曰。有人償子之麥價矣。伯爾曰。然。君曷勿效我之所爲。當我保險時。君等皆笑謂無益。今日之事。果何如。凡人以有識爲要。君能防患未然。則善矣。其人曰。雹災不常有。何妄費爲。伯爾曰。君好自爲之。我則明年仍須續保。不

敢蹈無恒之弊也。是年斐里伯促其父讓產。聲言若再堅執。卽不理田務。且將離去鄉土。其父聞言而懼。不得已。以產授之。旋赴册房訂立合同。書明房膳等費。悉由斐里伯供給。並歲與津貼銀六百佛郎。斐里伯得產後。豐衣美食。日高未起。惟專游蕩。若忘其身爲農夫也者。所用工人。視昔加倍。然不能以身先之。遇獵時。手挾鎗彈。擊一犬往田中督工。見有耕耘不力。輒以惡言詈之。工人不服。見斐里伯已去。卽懈怠如故。甚或反唇相譏。遇有他就。卽叛而去之。罷倫之治田務也。與斐里伯同性刻薄寡恩。故亦不能得人力。然罷倫殊自滿了。不省悟。及爾滿初以好言規勸。嗣見其人狂傲。卽日益疏之。培爾和田庄氣象蕭索。罷倫之妻與其女。不樂居鄉。遇岑寂時。輒有怨言。每家人團坐用膳。從無談笑聲。唯彼此默然相對。深恐以口舌啓釁。一或不慎。忿爭隨之。罷倫卽不得不離席而起矣。罷倫既厭聞交謫。決計於冬季之三月。遣其妻女居巴黎。夏季之一月。居江海之濱。妻女大喜。如脫樊籠。凡戲園跳舞場。及音樂會。幾於無夕不赴。所費殊不貲。然罷倫自此得安。

靜無事。故不以爲嫌也。其女居巴黎日。求婚者踵至。唯因罷倫財產盡在田中。不能以現錢爲奩贈。故婚事卒不就。其女益恚甚。怨父之不近情。將誤其終身也。此時與罷倫交好者。唯斐里伯耳。斐里伯早知罷倫所爲多不合理。乃故作諛詞以媚之。極誇其牲畜器具之美。且以罷倫爲農夫中最有實學者。而以及爾滿與伯爾之規勸。爲出於嫉妬。罷倫聞之。以爲眞譽已也。大喜。愈親暱斐里伯。許其在田中游獵。斐里伯亦自以獲交罷倫爲幸。因購一極佳之田犬。每日以應辦諸事。指示工人。卽往訪罷倫。同詣田中。獵取野兔鷓鴣諸物。斐里伯之父。見其子不務正業。屢加責讓。其子反以惡言相向。怫然曰。今日我爲田主。一切唯我爲政。且詆父不能自食其力。若忘其所得之產。乃老翁從勤苦中得來者。斐里伯之父。見其子不可教誨。遂不復言。唯時向隅獨坐。於田事一切勿問。翁素性勤動。一旦呆木若此。見者以爲瘋也。實則鬱極使然。惟日以田業日荒置胸臆間而已。一日斐里伯携田犬至村中游獵。忽聞驚駭聲。向後一望。則見村民四處奔避。屋戶皆閉。視之

乃一瘋犬也。口流涎沫。兩目鮮紅。狂奔而至。斐里伯不及回家。急裝藥鎗中。詎料機未發而瘋犬已噬其田犬。卽見兩大倒地。且號且滾。斐里伯恐傷其犬。不敢發鎗。幸鄉兵耶培爾適至。出腰刀殺瘋犬。斐里伯察驗田犬。並無傷痕。正擬携犬前行。耶培爾止之曰。不可。斐里伯曰。何也。耶培爾曰。當殺爾犬。斐里伯曰。未被噬。焉用殺。耶培爾曰。雖未被噬。然已倒地矣。國法當殺。斐里伯曰。國法耶。我固語汝無傷矣。爾可自觀之。耶培爾曰。我不敢決也。斐里伯曰。我以五十佛郎得此犬。奈何殺之。耶培爾曰。爾誠不幸。然爲居民平安計。固不得不爾也。請速殺爾犬。母俟遲勒而爲之。斐里伯曰。不可。不可。卽快然而去。明日。耶培爾奉官命。擊殺犬之被噬與已倒地者。衆皆勉從之。唯斐里伯不可。耶培爾控之於官。旋入斐里伯家。搜犬欲殺之。斐里伯攘臂而往。其妻恐肇巨禍。奮力揪持。斐里伯切齒曰。何物槍子。敢殺吾犬。不報此讐。有如天日。耶培爾若爲弗聞也者。然不欲故激其怒。旣殺犬。卽從後門出。罷倫是時家業日衰。其修建之費。常過原定之值。多買田器。而不能

得其用。廣購異種牲畜。而販賣時恆有折閱。每年經理人繕付清帳。出款常浮於進款。加以妻女數人。浪費無度。益難支持矣。論者皆謂罷倫經營田務。雖不合法。然餵養家禽。料理牛乳等事。固婦女所能爲者。苟其妻女能降心相從。又知節儉。爲致富之本。不論居城居鄉。皆同此理。則罷倫家業雖不興盛。尙不至一敗塗地也。然罷倫見此虧空情形。初不爲意。彼以爲建置之費未及收效使然耳。及見數年之內。無歲不虧。始怒焉憂之。然猶未知其咎在辦理不善。而反別籌彌補之方焉。罷倫平日罕入城。及是數數往麥市。爲糴賤販貴之術。常於價落時囤積居奇。及漲價。則賣之。雖一愛格方里脫爾見法名之麥。漲落似無幾。然買賣既大。即獲巨款。此種壟斷之法。損人利己。有礙市價不淺。故人皆目爲商務之蠹。昔罷倫在巴黎日。早習此術。用之於生意淡薄之地。業此者少。尤易把持市面。故罷倫之所獲。頗足補田務之虧空。果能始終小心。於己未嘗無益。然此法無異賭博。凡賭博者必無知足之心。一年田事數收。罷倫料麥價必漲。遂將市上之麥。搜買一空。市

價即騰踊。鄉民聞知此信。爭出其麥以求售。大獲利益。而市上之貨。遂致阻滯。罷倫恐失利。又見價有漲無落。因又盡買市上之貨。滿擬可獲大利。不料一日價忽跌落。而罷倫急於付定貨錢。不得已。將其麥陸續出售。因此市麥愈多。價即愈落。罷倫此次共虧二億五萬佛郎云。麥價所以驟跌之故。乃因美國知法國缺麥。急運多麥進口。當電線鐵路之未興也。消息不靈。且其時國法禁運麥自此省至彼省。故往往鄰境陳陳相因。而本境嗷嗷待哺。今日則不然。別國之貨。畧費稅錢。即可運運進口。故饑荒之事不常有。而各處市價漸歸均平。五十年前。法國佛朗斯公德勃來大月兩處麥價。常差二十佛郎。今則五洲貨價。幾無此差池矣。如歐洲何國缺麥。電信通至別國。即可運麥進口。此數年前美國所以有販麥歐洲之事也。即英屬印度。不久亦將販米歐洲。彼處工價甚賤。其鄉人無他嗜好。有米一握。即可度日。故成本輕而物價賤。歐洲各國。若欲阻其銷路。不得不加重稅則。而業農者益當講究農學。使所產饒沃。而後可與爭衡也。罷倫虧空之鉅。鄉民聞之。無

不嗟詫。以爲如此富翁。倒敗不應如是之速。蓋鄉民唯知農業之盛衰。在辦事之勤怠。不比經商者千萬金之產。可早得而暮失也。故初聞此事。疑信參半。而斐里伯新與罷倫爲莫逆交。沾其利益不少。亦力爲掩飾。未幾村中及培爾和田莊牆上。遍貼告白。聲明罷倫之產。已爲一富商所得。約計罷倫存貨之本。營造購置之費。及買產賣產價值之差。共虧八十萬佛郎。鉅富之家。遂變爲赤貧之戶矣。富商得產後。將田地及牲畜器具。零星出售。所獲甚鉅云。

#### 第四章

富商之售罷倫之牲畜器具也。邑民視爲大舉。皆先期柬邀親友。至日。家家燃爐火治盛饌。凡通巴爾維爾之各路。大車小車。輻相擊。員周十利安內之居民。亦利安里名即四計。聯袂而至。罷倫之鉅禍。變爲地方之盛會矣。遊客中。有志在購貨。挾羅通也賞而來者。亦有僅志於流覽者。皆以一見鹵莽業農。驕夸懷諫者之結局爲快。伯爾稔知罷倫之牲畜器械。俱係上品。故於是日之前夕。入城向銀行提取存銀。便



於相機購貨。時邑民籌集田莊。歷觀各物。終不解倒敗之由。彼不歸咎於罷倫之躁急。疏忽。貪利虧本。專歸咎於擴充修繕之費。故相戒勿多置貨物。價值緣是大跌。伯爾乃以賤價購良馬二。豬一。爲改良其緒種也。播種具一。耙一。犁一。爲闢草萊之用也。伯爾携各物至阿藏格。米賽爾見播種具。愠曰。主人豈以我爲不能播種。而以機器代之耶。伯爾曰。不然。爾之善播種。我固知之矣。米賽爾曰。主人不屬我以事。是必以我爲不才也。伯爾曰。我求撙節耳。米賽爾曰。費可法亞愛哥名亞購一器。可謂撙節耶。伯爾曰。試問種一挨克打兒之麥。需種子幾何。米賽爾曰。自一百八十至二百里脫爾不等。伯爾曰。播種以手。不論手段如何。其種子相間之遠近。不能勻稱。耗失多矣。惟用機器。則均勻齊整。所需種子之數。可以預定。既播之後。萌芽必速。收穫必豐。且爾既知一挨克打兒必需一百八十至二百里脫爾種子矣。若用機器。僅需一百四五十里脫爾。是每挨克打兒。省五十里脫爾也。今我所種之麥。不下十挨克打兒。卽歲省五愛格力里脫爾矣。加以播種合法。收穫自倍。

購器之費。轉瞬可償耳。初伯爾之地。有與罷倫地犬牙相錯者。及是乃請於富商而購之。富商知伯爾意在必得。索價頗昂。伯爾不以費鉅中止。蓋深知罷倫之地。糞壅最佳。善種之。必獲大利。又知田地一項。最忌零星錯雜。致不能獨享利益。反須小心防範。以免侵越。如是必多荒曠之處。且地既零散。則往來奔走。必費時力。若種整塊地畝。即無此弊矣。國法准承受產業之人。分佔田地。此事有利亦有弊。其利在公平而不偏枯。其弊即在零星錯雜。礙於耕種。欲救此弊。唯有收零作整一法。法令各地主交出田畝。請局外公正人。按地之大小肥瘠。均分兩三股。務使每一股地。皆與大路相值。可省防檢。可免錯亂。雖分割之時。不無費用。然地段勻整。即一切建路築垣之費。悉可從省。其數亦足相抵矣。近各邑中間有用此法者。民頗稱便。然終不免為疑忌者所阻格。罷倫倒敗未久。即值公董局公舉局員之期。公董局即今租界之工部局。鄉民多推伯爾。時邑中分兩黨。其一黨專舉才識兼備有益地方之人。其一黨惟舉工人個戶。而斐里伯實為之魁。彼謂公董局中。惟工作者

宜居之。彼大田主專顧已利。且家道殷實。籌賞便易。即使賦歛煩苛。足爲窮民之害。彼必視之漠如。自此議一出。衆口同聲。黨勢張甚。幸伯爾素負時望。遂衆爭推之。以敵斐里伯。蓋因伯爾之與斐里伯。其爲小田主也同。其田地大小亦同。其視地方之利弊。當亦無不同也。伯爾固非無意於世事者。每次公舉。持說堅定。始終不偷。唯因農務甚忙。勢難顧公。且公舉之事。必啓鬻爭。伯爾恬淡人。心竊厭之。故始聞衆之推已。拒而不納。及爾滿知之。即至伯爾家。諷之曰。以予論之。事苟有益於衆。不可諉也。子亦知今日兩黨之情形乎。凡黨於斐里伯者。皆係無聲望之人。一旦權入其手。必爲地方之累。且彼之所欲爲者。子亦聞之矣。彼將盡取邑之蒙師鄉兵而易之。擾亂伊於胡底。其一黨則皆明理之人。彼所以求子之助者。一則以子才堪任事。一則以鄉人中。唯子可以敵斐里伯也。人旣生於此世。獨不當割棄嗜好。以求有濟於世乎。伯爾曰。君才勝僕十倍。何弗往耶。及爾滿曰。我非子比也。我之田產。幾居全邑四分之一。邑民中。備於我者居太半。故人必不願我入公

董局。子則不然。巴爾維爾之人。必以子爲巨擘。阿藏格田莊。即吾子見才之地。人以子之才而求助也。於誼爲不當辭。伯爾曰。僕於君之有所規也。未嘗不從。從之未嘗不利。今日之事。敢不遵教。斐里伯知公舉冊上。已署伯爾名。深恐公董一缺。爲伯爾所奪。遂親詣各議員家。肆口謗訕。冀以挽回衆志。且終日奔走於酒肆間。對浪子醉漢。講說條陳。伯爾則仍在田中刈麥割草而已。公舉之前一日。斐里伯遇米賽爾於途。邀入加非館。米賽爾性雖儉。然亦非不費一文者。因從之。斐里伯習見世之爲僕者。往往仇視其主。因於坐次語及公舉事。欲令米賽爾揚伯爾之醜。以衆辱之。乃進而言曰。阿藏格之眞主人。及爾滿也。凡事無不聽及爾滿之命而行。即他日伯爾入公董局。亦及爾滿假其名以行事耳。總之爾主人豪無志氣。守舊自足。其所苛求無厭者。唯工人之勞役而已。爾主人非號稱刻薄者乎。米賽爾初不解斐里伯殷勤之意。及是洞燭其奸。乃宣言於衆曰。伯爾乃阿藏格眞主人也。非但不聽及爾滿之命。且及爾滿亦屢求其指誨焉。爾旣與伯爾相識。獨不

知其爲勇往不撓之人乎。試即今日阿藏格情形。回溯伯爾未至之日。作何景象。即可知伯爾之才矣。爾謂伯爾守舊自足。伯爾誠深於閱歷者。然邑中實未有能如伯爾之維新者也。每有變更。我必與伯爾爭辨。究之我常曲。而伯爾常直。今雖伯爾不在坐。其敢昧良妄語乎。至謂伯爾刻薄。尤爲大謬。伯爾誠爲爾仇。然天下甯有誣謗善人之理耶。伯爾性寬和。雖以我之狂躁。尙涵容不與較。每月薪金。未嘗蒂欠。彼謗伯爾者。能如是乎。明日公舉。我必首推伯爾。竊願他人之步我後塵焉。蒙招飲加非。本欲一領盛情。然伯爾之爲人。我愛之敬之。爾必欲損其聲名。區區之心。不敢叨惠。請從此辭。遂付錢而出。座客鼓掌稱善。斐里伯素以刻齋稱。聞米賽爾之言。羞愧欲死。而伯爾之名益著。及公舉屆期。伯爾遂哀然爲舉首矣。是年又值巴爾維爾農學會舉行賽會之期。是會每及爾滿爲會董。力勸伯爾以農務呈請攷驗。伯爾從之。會中派員至阿藏格閱視一切。見伯爾田莊之美。糞壅之佳。安置牲畜之合法。收穫之豐。及草場洩水之效。無不擊節嘆賞。及期會場之四

周。遍插木杆。繚以青綠樹枝。杆上則三色國旗。臨風飄曳。旁有木欄。安置肥碩牲畜。稍遠。則陳列農具。五穀。羊毛。乳油。乳餅等物。會場之中。張設布幔。內架木板。上列大椅。飾以紅絨。乃郡長及本郡官員之坐位也。時本村及鄰村之民。來赴盛會者。皆在場中歡呼笑逐。當會員按驗各物之時。唯聞農夫談論爭辯聲。更雜以鐘聲。幻人作樂聲。跑木馬者弄風琴聲。鐘鳴三下。郡長戎服佩刀。身穿金線衣。其前導則有鄉兵。救火兵。樂工。既蒞場。鄉長會長肅之入。就入座。郎培爾鄉見上與他鄉兵。屹立於下。時伯爾亦挈妻子而至。場中人聲忽靜。司書者手捧會員按驗冊。口誦應得花紅各田主名姓。隨加獎勵語。又舉未盡善之處。陳說一番。語畢。頒賞。有記名嘉獎者。有得銅牌者。亦有得銀牌者。迨司書者語及阿藏格田莊。辭氣忽變。唯聞贊嘆不絕聲。乃宣言曰。我等之臨視阿藏格也。可謂一時盛會。自有農會以來。未見有辦理如此之善者。繼核其帳目。其收效之巨。可推獨步。伯爾費八年之功。得賢妻之助。以有今日。此後之日。進無疆。定可操券。我會中人皆謂伯爾宜受

佛郎于圓金牌一面之賞。以爲鄉人矜式。場中人皆歡呼贊歎。樂工歌馬賽爾曲。曲伯爾從人叢中出。升幔受賞。郡長起立。親授以金牌。語之曰。敬賀敬賀。并賀鄉長之得君相助也。時伯爾入公堂語畢。重復頒賞。伯爾又以所畜牛豕得花紅。及會事已竣。衆皆欲散。郡長留而語之曰。我意中尙有一當賞之人。雖爲衆議所未及。然公等聞之。必以爲是其人。固公等之鄉人也。忠直端方。衆目共覩。其生平捨身救人。已非一次。妙在從容赴險。純任自然。郎培爾殆其人乎。其爲我伯理璽天德賞之以功牌。場中人聞之。歡呼舞蹈。樂工作樂。會事始畢。及夕。大張筵宴。伯爾坐郡長之右。郡長舉酒。爲得彩諸君祝無恙。並祝法國日進無疆。席散。伯爾歸家。時家人鵲候已久。及見伯爾之歸。皆趨前親嘴。歡笑逾平時。伯爾語家人曰。幸哉。我之獲有此賞也。然非馬爾脫若奈脫米賽爾之力。何以得此。米賽爾曰。我何力之有焉。我於子有所修改。未有不以爲非者。子而從吾言也。何以有今日。雖然。小人無識。誠何足責。子升幔受賞時。我唯知鼓掌爲樂耳。伯爾旋以賞銀。爲其妻購金鍊。

金表各一。贈米賽爾。若奈脫各有差。餘則爲修繕房屋之費。明日及爾滿亦詣伯爾家道賀。敘語畢。即謂伯爾曰。君之農業。實冠我郡。我會中人願得子爲會友。倘荷見許。僕當作保。伯爾首肯。及爾滿曰。我會章程妥善。經營盡力。凡農務中新獲一物。新創一法。會中必討論而詳究之。月有一會。君試往聽之。必有可以益君者。近已設試驗場一區。專爲試種植物。攷驗新法之用。尙擬於各鎮遍設勸農場。令衆人知選種糞壅之效焉。伯爾既知入會爲有益之舉。每遇會期。未嘗不往。會中人皆知伯爾精於農者。遇有疑難。輒就商榷。伯爾自此遂得遍閱各種書籍報章。苟有新法。無不知者。時麻里斯年雖幼。已能習田務。及見其父得賞。心力益奮。伯爾推知其意。即以牛欄事任之。以分米賽爾之勞。麻里斯心猶慊然。每晨入塾前。輒往田中。助父操作。故於推耙。轉礮。及一切不甚勞力之事。俱優爲之。一日父子兩人赴草場曬草。畢。伯爾憩息河濱。呼其子而語之曰。爾今年已十三。小學將次卒業。爾師諾愛爾。常謂爾聰敏好學。苟爾性之所好者。習之必有成就。我故聽



爾自擇一業。以爾之齒論之。正當爲終身之計矣。麻里斯有囁嚅狀。伯爾曰。言之母有所畏。如一時未能定見。可熟思而後語。我亦未晚也。麻里斯曰。計已定矣。將爲農夫耳。伯爾曰。言之得無太易乎。麻里斯曰。兒思之熟矣。伯爾曰。此勞苦事也。凡勤於農者。若糞。若鋤。若播。若壓。壓。匹子。使深入。若耙。若穫。若飼牲。畜日出而作。日入而不得息。此皆爾之所親見者。時或有水旱不測之變。則前功盡棄矣。爾細思之。如爾之志與力。能堪此勞苦乎。麻里斯曰。力田之苦。兒固知之矣。雖然。大人言其苦。兒請言其樂。疲力以耕之。未幾而秋收豐矣。未幾而汗菜變爲沃壤矣。未幾而沮洳變爲草場矣。此亦兒之所親見者。頃者農學賽會。大人獨膺上賞。兒心歡甚。竊願兒他日亦受此賞。以博親之歡也。而田家之樂。尤在吾行吾志。絕不寄人籬下也。世間職業。雖廠主之尊。亦不能不隨人之好惡以行事。唯業農者。乃真有自主權耳。且清曠之氣。野草之香。太陽出入之狀。鳥獸馴擾之態。彼城中人。能領略及此乎。伯爾曰。予聞汝言。甚樂。農事固辛勞。然其樂處。亦世所僅見。他事無與匹。試

觀八年前之阿藏格荒穢奚似。今氣象一新矣。汝既有意繼我業。此予所甚慰也。汝年漸壯。可助我。此後盡我兩人之力。必有奇效。可觀。予老矣。汝能法我之所爲。以昌我業。予死無恨矣。始予爲汝言農事之勞苦種種。特以試汝耳。而汝所言。竟如我意。快哉。語畢。抱麻里斯示親愛意。兩人復工作如前。時須若納及爾滿之母曰死之女年漸長。已六歲。幼時受馬爾脫撫養。故呼馬爾脫爲母。甚善麻里斯與馬里三人互相驩愛。暇日麻里斯兄妹必往婆槐爾。與須若納同嬉戲。或無暇。則招須若納至其家。及爾滿所望。只此女。甚溺愛之。一切惟其所欲。不爲限之。然須若納天性甚美。不以姑息故驕縱。惟浮動好弄。設令巾幘而出。幾與男孩無別。愛攀高樹。馳駿馬。或自駕輕車。或超躍籬柵。人以危險戒之。勿聽焉。其傭媪無能爲力。惟惴惴懼不測而已。及爾滿嘗與以英式兩輪驢車。俾作玩具。一日將外出。車已駕矣。值傭媪入室。取所遺衣飾。須若納乘其不在。驅車獨往。從巴爾維爾山坡疾馳而下。東西衝突。幾釀人命。車亦幾覆。及抵伯爾家。馬爾脫見而大驚。讓之。卽遣歸婆槐

爾時其家人已焦急萬狀。及爾滿見其歸。欲責之。須若納卽手抱父項。輒然言曰。兒初欲獨往。傭媪執不允。然兒迫欲一試其能。遂不聽其言。今果安然無恙。可不謂兒之能乎。及爾滿聞之默然。須若納每至阿藏格。輒喜往草坡下小渚中垂釣。其父所與釣具。頗精良。而每釣輒無所獲。然興甚佳。釣罷恒自語曰。今雖不得魚。後必有大者來矣。又數數往訪及羅姆。見其顏色儼然。鬚髮如雪。頗敬憚之。及羅姆亦愛之篤。於羊羣中擇一最稚者。恣其戲弄。須若納輒取物飼之。以紅皮圈繫羊頸中。懸一銅片。鑿其名曰麻篤。乃脫。卽須若納所命也。及羅姆常取故事爲之講解。須若納聽之甚驩。每飼羊畢。謂及羅姆曰。我今日安靜。未嘗生事。如不信者。可問我傭媪。先生其爲我講一故事乎。及羅姆方踞坐枯樹。應之曰。七星故事耶。阿乃蒙女后故事耶。抑一羊二羔之故事耶。須若納云。卽一羊二羔之故事。何如。須若納於此節故事。聞之已二十次矣。然不以爲倦也。及羅姆正色曰。昔者盧培隆山。有一羊生二羔焉。毛色妍麗。母矜寵之。異常。遂一切任所欲爲。時或頑戲過

甚。方欲呼止之。二羔歡躍母前。作乞憐狀。母意卽解。二羔最喜放蕩自由。此其大病也。常相謂曰。若我等遠游。尋獲新地。更得肥美草場。豈非大快。母則戒之曰。勿遠離。獐犬在旁。狼熊在前。甚可畏也。二羔終不聽。殆與人聞小兒。不從父母之命者無異。一日。乘牧羊人及守犬他往。離羣前行。母羊急追之。咩而曰。爾等何往。勿遠離也。二羔置若罔聞。見道旁叢草。且嚼且言曰。草味之美。風景之佳。自由之樂。乃如是乎。復屈曲前行。竟至日暮。失道不知所往。惟抗首長鳴而已。其鳴聲與向者絕異。純作驚惶憂急之音。二羔亦懼甚。母子三羊。相與攢簇而行。正在倉皇失措時。忽聞有聲自遠來。月下視之。則見一熊自穴中出。將前相攖。母羊趨令二羔居後。以己身當其前。大聲呼救。惟其地距人太遠。迄無應者。母羊知不免。卽挺身而出。將捨身以救之也。熊攫之以爪。將啖之。忽遠聞人犬聲。熊卽舍羊而去。時牧人見羣羊中。忽失三羊。正在山谷中。嗾犬尋覓。既至。則見母羊神志已昏。二羔驚戰未定。遂挈之歸牧場。自是二羔卽不復敢他適矣。須若綱曰。曷爲不殺此熊。及

羅姆曰。殺與不殺。書中却未道及。當馬里須若納戲弄小羊之時。麻里斯輒與及羅姆閑譚。及羅姆以飼羊之法。選草之方。及羊種之美惡。有宜留者。有宜饑肥而售諸屠戶者。一一指示之。又爲語其幼時。常在加里爾噶法國亞爾及爾省名。鄉間牧羊。每至盛夏。則驅羊上山就食。及天寒雨雪。則仍回平地。其時山上有公牧場。凡牧羊者。出費少許。俱可驅羊就食。此良法也。後人以爲有弊。欲革古風。及羅姆每語及之。恒三太息焉。麻里斯聞及羅姆所述之法。非今世所有。心竊異之。時麻里斯年漸長。胸已知所別擇。故雖自幼敬愛及羅姆。然聞其言。不能無疑焉。因折衷於其師。諾愛爾。諾愛爾曰。及羅姆所言是也。此冬夏易居之法。名曰脫耶聚曼斯。凡熟地之名。如阿爾及爾。西班牙。及法國南方諸邑。其牧羊皆用此法。因原隰之上。惟冬季有草可食。及夏日燥烈。草皆枯萎。勢將坐斃。故不得不上山就食。而山上之民。率皆貧瘠。以牧地租人。可得錢以佐生計。惟此法亦有大弊。蓋草經羊嚼。其根必起。其蹄又能蹂土。使鬆。雨易衝刷。如此則山上之水。不爲土養。勢不得淳蓄。大

雨一至。傾注而下。平地成澤國矣。欲免此病。惟有於童山之上種草。及樹。此法近已風行。防水之策。可用磚石或木料。以作堰。間有種種柳樹者。亦可殺水勢也。凡見有泥土之處。必皆種樹。餘則聽其自生植物。自有種樹之法。前此苦瘠之地。近皆安然無事矣。然欲行之有效。必先禁羊上山。芻食獸種。如牛之食草。不傷其根。故有以牛易羊之法。法於山上建乳餅公司。凡牧牛者。各出其乳。送之公司。製爲熟乳餅。如所稱壽呂烟兒瑞士區名即乳餅之類。售去之後。除費用外。即按出乳之多寡。均分其利。是時麻里斯學程初畢。新得卒業。性極好學。於書法算學。皆精達。諾愛爾甚器之。商諸伯爾擬授以格致化學。及動植物學。以爲此數學者。皆業農者所常有事也。伯爾從之。嗣是麻里斯日則助父操作。夕則詣諾愛爾家受學。日率一二小時。一日旁午。須若納至阿藏格與馬里垂釣。或告以日光太烈。不宜釣魚。殊勿省。約歷二小時。一無所獲。忽覺釣鉤深入。若引而去者。須若納喜甚。謂可得大魚矣。俯而前。欲鈎致之。乃猛拽其竿。竿不得上。須若納粹不及備。身爲

之側。遂墮入水深處。備媪情急。不知所措。惟驚呼而已。馬里欲救之。惟不善游水。甫入水。心悸甚。急攀岸邊草。呼救。須若納身有圍裙。在水中輾轉片刻。旋即深入。自遠視之。則見其浮沉兩水間。時麻里斯已歸。聞其女弟呼救聲。知有變。馳突而至。馬里大呼曰。須若納溺水死矣。麻里斯奮身入水。三躍而至。須若納之旁。掖之抵岸。置草坡上。側其身。令水流出。又竭力摩擦其體。須若納竟無更生意。麻里斯乃張其口。吹氣使入肺。又撫摩其胸。作翕張狀。約歷十五分時。須若納始瞠目一視。有太息聲。麻里斯呼曰。須若納生矣。又大聲語之曰。須若納爾其聞吾呼乎。乃命馬里走告其父母。已則與備媪撫摩如初。及伯爾夫婦至。須若納已蘇。漸能呼吸。水從口中時時流出。馬爾脫先回家。預備衾褥。伯爾置須若納於胸前。令暖。遂挾之至阿藏格。須若納寢於馬里之牀。神志已甦。及爾滿亦聞信而至。及爾滿初謂其女已死。及見其已蘇。有笑容。心大動。幾不能起立。稍定。乃與須若納親嘴。旋語麻里斯與馬里曰。生吾女者。爾兩人也。大德誓不敢忘。是夜。伯爾以厚衾裹須

若納遣回其家。越二日。卽見其在園中戲玩。顏色美好如平時。幾忘其爲性命垂絕之人矣。須若納溺水之明日。麻里斯卽患肋痛。至晚寒疾大作。胸膈煩悶。乾咳竟夜。急延醫診視。醫謂診屬刺肋傷寒。乃汗時入水。未去濕衣。感受寒氣所致。未幾病益劇。熱甚。神昏譫語。伯爾夫婦憂急萬狀。跣步勿離。噤不敢作聲。偶一相覩。各覺慈容滿面。及爾滿聞之。馳詣伯爾家。盤桓竟日。時醫者日必三四至。及爾滿見則必問病狀。醫具道其實。伯爾又延他醫診視。醫謂前醫治法不誤。惟病情甚惡。難於見效。幸病者體氣尙強。或有萬一之望。逾一星期。病勢畧轉。醫者保其無礙。惟云大病之後。調攝爲要。秋涼伊邇。宜暫居南土。以避寒霧。庶元氣易復。及爾滿在旁應曰。謹如所言。麻里斯可居南土。以三越月爲期。此事某當任之。伯爾夫婦若不解其意者。及爾滿又言曰。麻里斯捨身以救小女之命。是大有德於某也。某義當報之一俟。麻里斯病體稍愈。某卽當偕往地中海濱。俾受南土之日光。則氣體強矣。麻里斯驟不得痊。復調護百方。久之病良已。戒行有日。馬爾脫與若奈



脫治行裝時馬里與須者納亦偕往。告辭之日馬爾脫念兩兒南行之樂。頗以為  
 喜。既念兩兒有生以後。未嘗一日離膝下。今且一別三月。不禁潸然涕下。及爾滿  
 與三兒行。抵里昂。法國名邑沿羅納江濱而下。且歌且行。恐長途勞頓也。過名勝地。即  
 勾留為遊計。或徜徉曠野。或登陟山巔。至華格盧士及蒲虛都羅納兩邑。遊覽良  
 久。其地有克拉波納及阿爾比納兩渠。水濱草場肥美。一歲四刈。每一愛克打兒  
 可獲一萬二千計。羅格拉母。熱地植物。必先購引水之法。或穿渠。或開引水法也。又  
 登文都山嶺。但見橡樹成林。脫羅佛。苗類。或曰即秋苔。生地下。不即生其下。世人  
 皆嗜之。然其滋生蔓術之法。尙未可考也。又過聖來米城。其地以早熟之果蔬著  
 名。種果蔬者。或用肥料糞壅。或用玻璃罩。可使早熟。若其地天氣本暖。即不用人力。亦可早熟。旋入克勞城。此城地多沙磧。田  
 疇希少。人烟寥落。兩兒見而異之。及爾滿告以此地自用淤土培壅。不毛之土。已  
 日少一日矣。須者納曰。何謂以淤土培壅。及爾滿曰。山上之土。被江水衝刷而下。  
 可用引水法。引之使入平地。土融於水。水即不易化散。淤泥日積。即成可耕之土。

矣。麻里斯曰。須幾何年而成。及爾滿曰。此事關乎水性。或二年五年。或十年。難預計也。如克勞者。本爲無水草之地。然一俟溝渠交注。培以淤土。語未畢。須若納呼曰。大人謂此地無水草。兒乃遠見一水。狀似大湖。湖邊皆樹。此何物耶。時及爾滿與三兒。皆坐車中。起而望之。果見一湖。湖水中樹陰翳蔚。房屋參差。及爾滿笑曰。此乃空中幻影。卽所謂海市蜃樓也。有沙漠地者。數數見之。俗所謂海市蜃樓者。不均太陽所照折光參錯。將地面物影。攝入地平之上。故有此異。沙漠之地。日光臨空。氣之近地面者。恆較高處爲熱。熱則必薄。故有厚薄之異。故物之在地平者。能破陽光攝入空中。其影必倒而直。昔我國兵士遠征埃及。途中渴甚。俄而遠見一大湖。喜欲狂。及馳抵其所。湖已不知所在。如是者。蓋不止一次云。又自克勞至加馬爾。噶卽昔年及羅姆牧羊地也。其地牛馬成羣。牛皆野獮。牧人皆騎。有赤鳥。形如鶴。赤羽。止則編束如隊伍。飛則排列如三角形。甚可觀覽。行抵加爾郡。其地有及爾滿之友。以種葡萄爲業。詣其家。勾留數日。時葡萄已熟。收穫期屆。馬里與須若納。執剪助採。摘納諸筐。筐滿。則授諸工。工以車載歸。投大桶中。麻里斯見所植葡萄。皆堅壯。自

能直立。不藉木扶。每株相距甚遠。與他處所植者迥異。果亦繁碩異常。或語之曰。此處葡萄。每一愛克兒打兒。可得酒八十至一百愛克刀里脫兒。然一愛克打兒。僅容葡萄四五千株。是每五十株。能出酒一愛格刀里脫兒也。其繁碩可知矣。又見其釀酒房。位置得宜。境地清潔。其酒桶絕大。每桶可存酒三四百愛格刀里脫兒。及爾滿向園主人道。主人曰。此十年來第一豐年也。頃者比歲不登。大局幾不可問矣。十五年前。君曾來此。尙憶當年繁盛景象乎。彼時自羅納江至加羅納江。園林綿亘。暢茂無比。忽有天災自美洲來。我邑葡萄園。先後零落殆盡。然衆皆莫測其故也。識者屢加考驗。始知咎由微蟲。名曰非羅格賽拉。其體纖細。目不能見。專嚙樹根。故三四年樹即萎矣。及蟲已生翼。即自土中出。飛集園中。散一子於樹皮上。來春子化爲蟲。即復入土。據樹根。滋生繁衍。至不可數。約計每蟲可傳生數千云。滅蟲之法。不止一端。如在平地之上。可用引水法。決水入葡萄園。約五十日。蟲可盡死。如不宜用引水法者。則用炭硫或鉀炭硫藥水毒之。否則用美國樹

秧。代法國樹秧。因其性較堅。能耐蟲嚙。惟美樹所產葡萄。有品佳而堪製酒者。亦有惡劣而不能製酒者。則人當用法國種接之。自有此數法。後我邑遂無蟲患。可復觀昔日之盛矣。勾留數日。及爾滿率三兒。由馬賽至加納而稅焉。麻里斯時有竹報寄家。一日復作書致父母曰。

謹稟者。男等在此。均各無恙。此行可謂極樂。所惜者。兩大人不在左右耳。每抵一處。所聞所見。耳目一新。此間天日清明。略無點雲。氣候之佳。殆無與比。惟時作塵沙。爲足憎耳。男自覺體已復元。咳嗽已全愈。當可回家。重理舊業。男每與及爾滿先生。語及體氣之佳。先生輒莞爾而笑。常屬男須加意保養。男欲早起。先生輒不許。每晚餐方畢。先生即強男就寢。男在此無所事事。身已發胖。他日相見。兩大人當不復識男矣。每日日間。常出外遊覽。此間種田之法。與家鄉絕異。前日偶行至野。見有打麥者。其法絕奇。不用機器。亦不用連枷。惟束麥作圓堆。中柱一柱。上有橫竿。以拴牛馬驢等物。使旋轉其旁。畜蹄所觸。穀粒迸落。

及爾滿先生謂此法甚古。然男心謂法殊不善。一則因穀粒不能全脫。一則因畜蹄踐觸。不免汗穢也。家鄉氣候如何。種子諒有起色。兩大人福體康健何似。男等均甚懸念。惟望時賜佳音爲盼。米賽爾及若奈脫。均請道候。男麻里斯謹稟。

時麻里斯體氣漸復。日在地中海濱。但見橙櫨滿樹。景物清澄。故精力益健。及爾滿故健步。察麻里斯漸可習勞。因命傭媪偕兩女在海濱遊眺。已則率麻里斯時行曠野。或上愛斯得來山。則見松椽成林。或遨遊花園。一望皆紫金茉莉玫瑰等花。爲是地物產之大宗。因赴格蘭斯城。遊覽香料廠。時青果已熟。收穫期屆。麻里斯見採摘者不用器。而用手。頗異之。及爾滿告以用竿擊下。恐傷樹枝。且積果芽。則來歲之收穫必減。又告以青果一物。爲地中海濱土產大宗。獨法境諸邑。此物無甚生色。差強人意者。惟數處耳。至如西治里<sub>地中海島名</sub>。希臘天尼恩<sub>希臘島名</sub>。阿爾及耳突尼斯<sub>北非地</sub>。則所產最饒。其樹歷年最久。日漸高大。木性堅澤。文理美好。中製

器鑲物之用。亦可燒火。力甚壯。葉可餵羊。羊嗜食之。及爾滿。又挈麻里斯。至搾油廠。一觀搾油之法。當視青果皮黑。知其已熟。乃摘取置樹下。羊毛旃上。旃以入搾床。搾之。以潔淨爲貴。油出。卽盛大餅中。嚴閉其口。可歷久不壞。青果之備生食者。當乘未熟時取之。以免苦味。惟當用鹽水漬之。南遊忽忽。已及西十二月。遂刻日遣反家園。既至。馬里斯。馬里於父母前。道別後思母意。又詣諾愛爾。若萌。及米賽。爾。若奈脫處。各陳款曲。兩兒精神健旺。加以久客還鄉。意興益壯。具將南遊聞見事。瑣瑣陳說。窮日夜不倦。

### 第五章

伯爾經營田務。性既勤儉。又勇決。有條理。門戶日益昌盛矣。斐里伯。性疎懶。放蕩無節。故家計益落。伯爾之田。糞壅肥美。修治精潔。故收穫倍豐。其所養牲畜。選種既精。飼餵亦合法。故乳多而肉美。斐里伯家田疇荒穢。故收穫歲減。其牲畜皆先後出售。不復補。故爲數日少。鄉之人。早知斐里伯之不善治產也。聚相語曰。斐里

伯必敗矣。先是斐里伯遇父無禮。所許養贍銀。不以時付。後遂輟不與。其父每切齒語人。至是其父忽不出。亦不語。惟形影相弔而已。客有詣斐里伯家者。見其父昏默不語。狀類癡呆。莫測其故。皆曰。矍鑠翁乃一德至此。是殆年邁積勞所致也。遂寔不理。斐里伯終年遊蕩。費遂不貲。勢不得不舉債。債限滿。則更舉新債以償之。及逋負山積。計無所出。乃以半價變賣田產。以至生計日窘。坐困愁城。遂日日往酒肆。以麴糵遣悶。其遇傭僕也甚暴。不以時給值。傭僕相率引去。故田莊百務皆斐里伯一身任之。然地廣事繁。一人力難兼顧。田事遂益荒。斐里伯見此情形。心益煩亂。既不欲與家人相見。惟恃杯中物。暫釋愁腸。及酩酊而歸。步履蹣跚。神情昏昏。一言不稱意。則鞭妻撲子。毀擊什物。無所不爲。必至憊極思睡。頽然欲倒。乃止。其妻一意忍受。從未以惡言相加。一日夫威逼之。乃驚遁至阿藏格馬爾脫見其來。驚魂尙未定。急問之。嘆曰。何妹之不幸也。問何所苦。曰。良人今日爛醉而歸。妹責其無行。良人竟持刀相向。幸妹早避其鋒。稍遲則不知命在何所矣。妹之

良人心術無他。特爲境所窘。欲以酒消愁耳。然長此不已。將安所底止耶。馬爾脫喟然曰。操行若此。何以教其子。曰。妹久不得錢。無以度日。以告阿翁。阿翁坐視不語。目瞪視。似相詬詈者。言之真可寒心。談話間。斐里伯之妻。悲從中來。不能起立。遂頽然倒於坐。馬爾脫慰解之曰。嫂勿憂。彼非無人心者。且夕且悔改矣。曰。不然。不可改矣。門衰祚薄。妹實不知死所矣。妹生平勤儉。雅不好修飾。自分不應餓死。斐里伯而亦如伯爾之勤敏也。妹方以相助爲樂。與嫂無異焉。曩之勸阿翁析產者。將求悅於良人耳。實非妹之本心。回憶當時。門戶興盛。合家歡悅。何樂如之。而今已矣。斐里伯而在家也。惟聞詬譟撲責之聲。如其不在。惟有一呆木之老人耳。嫂乎。嫂乎。妹欲癡死矣。馬爾脫曰。嫂其少安毋躁。妹聞嫂言。心實惻惻。然且如之何哉。無已。其使伯爾往見斐里伯。善言規勸。或者其幡然改計乎。曰。謹謝謹謝。妹本已絕念。今聞嫂言。知尚有一線之望。何幸如之。當以尊意歸告良人。良人而能從伯爾之言。蕩滌前非。歸於正路。則如天之福矣。馬爾脫以所謀告伯爾。伯爾不



悅曰。子謂我何以勸之。彼昏人也。債負纍纍。日沈醉不事事。殆不可救藥矣。今勸之而不從。猶之可也。萬一彼逞其忿。無禮於我。我既不能忍受。必且有爭鬪之事。豈不成話柄乎。子明眼人也。奈何不早見此。馬爾脫曰。其妻遇人不淑。劇可憐憫。頃以所謀告之。彼便歡喜異常。君且往。斐里伯若無禮於君。聽之而已。庸何損乎。伯爾曰。諾。一日途遇斐里伯。遂造其家。從容語曰。日來頗無恙否。阿藏格久不見君之迹矣。斐里伯訝其來。厲聲曰。爾欲見我何爲。曰。亦談叙相討論耳。曰。爾不求益於我。我亦不求益於爾。討論何爲。曰。恐未必耳。問何故。曰。聞君業日衰矣。故敢效愚者之一得。曰。我之業衰耶。誰實告爾者。曰。無之。某懸揣若此耳。君家田疇荒穢。比歲不登。而君常愀然不樂。其有之乎。曰。誠然。命運蹇塞。百無一成。故心煩意亂。不知所措耳。曰。君不當自引咎耶。斐里伯蹙額言曰。我何過。其速告我。伯爾曰。請勿罪。君家計荒落。某亦心焉憂之。長此不變。恐遂不支。今者逋負山積。旦夕必且追比。君上有老父。下有妻子。將何所聊賴乎。某故不妄語者。惟君亦自知之矣。

竊觀君愁眉不展。日日買醉消愁。倘不爲日後計者。亦何至於此。斐里伯默然良久。伯爾察其意。似稍動。因益婉導之曰。及今猶可爲也。請從此痛改前非。專力農務。君爲人聰明幹練。不須相助。然令子年已及丁。尊嫂亦非懶婦。君可督令操作。須念前日之行。妻子不免凍餒。力戒荒醉。勿入酒肆。爲今日第一要義。君但能棄邪歸正。某等大家歡悅。無不樂與効力也。語未竟。斐里伯驟止之曰。勿來相擾。爾有何名分。絮絮來教我。爾命運亨通。事機順遂。誰許爾責讓人。作學究面目乎。我謂世人祇分兩等。一命運佳者。爾也。一命運不佳者。我也。故我與爾。永遠不能相合。且我實怯人也。忌爾功效。忌爾福分。不見爾則已。見爾即令我相形見絀。能無憤恨。我方日日詛咒爾。此後勿再見我。亦不得交一語。言次握拳作欲毆狀。遂竟去。伯爾嘆曰。眞薄福人也。時及爾滿獵場。無人守禦。盜獵甚多。適鄉兵耶培爾休假在家。及爾滿稔知其人。忠勇可恃。因延爲監獵官。此官專司巡察獵場。由大田戶選充。今法國大田戶漸少。此官亦已。裁撤改設守野守林等官。知此官職事較簡。頗於耶培爾人地相宜。及

中國古時虞人林衛等職由公宗選充

此官亦已裁撤改設守野守林等官知此官職事較簡頗於耶培爾人地相宜及

爾滿賞其鎮懾。宵小即知斂跡。惟定例。凡充此職者。必先至官署。當堂自矢。奉公守法等語。日後遇有違法之徒。方准控理。耶培爾即遵例先往。然後就職。號衣隔巾。持械往來。梭巡不稍息。耶培爾既得百佛郎之銀牌一枚。又歲得養恤銀。所公家與及時又受及爾滿優俸。其妻亦在及爾滿家。司喂哺浣濯炊爨等務。亦得厚值。故耶培爾在巴爾維爾鄉城中。居然一人物焉。其長子曰斐理格司。在武童學塾肄業。已投効海軍步隊。次子曰查爾士。先在佛爾賽藝花學塾肄業。至時學成歸。亦入及爾滿家爲園丁。麻里斯年漸大。發長太速。體爲之弱。屢因勞動過甚。驟致昏厥。其父任以家中瑣屑。及牛欄馬廄等事。取其勞逸適宜也。又以灌園事任之。取其勞心不勞力也。麻里斯甚以灌園爲樂。與查爾士年相若。深相結納。暇則詢以藝花術。甚得裨益。時伯爾園中。多植蔬果。以佐盤飧。而查爾士習於速成果蔬之術。故及爾滿家。於復活節內。在春分節後已得蛇莓青豆豌豆等物。麻里斯戲效之。蔬果皆怒生。售之市。得善價。然已大費經營矣。伯爾田土。備用各種糞壤之法。鋤治

亦勤。故土性鬆軟。麻里斯取牛羊猪鷄等糞。分別收存。隨宜培壅。其所用玻璃幔。必察驗寒暑表熱度。以時啟閉。或遇驟寒驟雨。恒中夜而起。細意防護。果樹之新結者。一遇春霜。即便枯萎。故夜間必用布遮護。以免熱氣傳散。又以時修剪。悉中程度。所護之利。豈不足償麻里斯之勞。然產果頗佳。伯爾見其子。意興甚濃。心甚悅之。壹任其所為。以為麻里斯勤苦若此。若移其培植蔬果之心。用之他途。亦必終始不渝也。速成果蔬一法。必相土宜為之。如潑羅文斯。法國南境舊名今改阿爾及耳。其地日光燥烈。又如勃來大納。法國北境舊名今改溫水所經。大西洋有溫水一道從美洲終年無霜。始可用此法。阿藏格冬季苦旱。春霜不斷。為之必煩費矣。麻里斯不知也。故得不償失。伯爾因其好學深思。遂不之阻。米賽爾偶值暇日。或麻里斯有要工。即助之操作。然心勿善也。一日情不自禁。面詰麻里斯曰。爾枉用氣力。將欲逆天行事乎。蛇莓青豆豌豆。皆六月中物。西六月爾必令先兩月而生。物既不佳。且太勞費矣。麻里斯曰。何傷乎。復活節出售之蛇莓。一枝可值兩蘇。至六月。則一計

羅格蘭母。僅值二十生丁耳。蘇與生丁皆法國貨幣名。生丁爲幣之百分之一。蘇值五生丁。時適值果蔬賽會之期。伯爾命其子出手植果呈衆覽。得銀牌一枚。以故志益勵。米賽爾初雖誚讓麻里斯。及見其得賞。心大歡悅。遂揚於衆曰。麻里斯所植果大佳。不得金牌。未爲公允也。麻里斯益求其父擴充園圃。將大展所長。其父急止之。並告以前日小試輒效。可見心專力勤。無事不可成就。然獲利不豐。卽不必更求進步矣。且剴切導之曰。種植之事。宜詳慎。勿輕躁。爾受銀牌之賞。此足徵果蔬之佳耳。至爾之獲利與否。不能以銀牌爲據。且成本首須估計。既知成本。然後視得利之多寡。以爲進退。今試將爾所得價銀。與所費之工。及所需畜鳥糞。玻璃幔。玻璃罩之價。彼此比較核算。則爾所剩者。不過數佛郎耳。然惟心精力果如爾者。方克有此。可見此事難而鮮功。爾宜熟思審取。順土性而爲之。不可孟浪。且爾尙憶罷倫之所爲乎。彼其爲人。非不聰明幹練。牲畜器具。無一不佳。然不久卽敗者。祇緣冥心孤往。逆天行事。豈知土性不可力爭。必欲強而就我。能無敗乎。麻里斯聞父言。大失望。又念

經營園務。心力交瘁。而所獲甚微。意興亦索然。其父急慰勉之。曰。爾心精力果。我實喜出望外。前言乃以實告。不可因此敗興。爾年幼體弱。尙不能服田力作。正宜濟心灌園。藉資歷練。惟不必更求進步耳。麻里斯曰。兒又得一策。問何策。曰。擬試種菌耳。我家有石礦焉。與其棄於無用。不如嘗種此物。效可操券得也。伯爾曰。善。好自爲之。雖然。將安所得菌苗。麻里斯曰。查爾士有友。專售此物。兒可託其代購也。伯爾曰。甚善。麻里斯即延查爾士相助。擇石礦中最幽暗處。鑿土使平。鋪以馬糞。作斜面。約厚三十至三十五生的邁當。分即一當百先用足踐踏。以辟濕氣。且令堅韌。即易發熱。乃沿牆根。將馬糞鋪成長行。時灌以水。上蓋柴草。免受空氣。令易發酵。酵後。以竹籤穿孔。納菌苗其中。復壅以糞土。糞土已成土形者逾十日。菌即怒生。其地居民罕見此物。所食菌皆林麓間野菌。收取時。雖細意抉剔。然偶有疎舛。即易殺人。而有毒與無毒之菌。外觀無甚分別。非有識者。不能辨。故麻里斯以嘗菌入市。頃刻立盡。麻里斯雖田務碌碌。然常獨遊曠野。採訪種植陳法。良者效之。否

者改之。遇生平創見事。尤屬意焉。偶於卑隲地。見麻田一區。頻往觀覽。但見雄花如球。雌花如穗。高自一邁。當有半。至二邁。當不等。適值穫麻期。麻里斯亦往相助。其麻皆用手拔取。捆束成稜。漚麻之法。取麻浸大溝中。其溝距屋宜遠。浸十五日。則麻皮絲質黏性盡融。能與莖分離矣。植麻家延麻里斯助漚麻事。卽有大車。從麻田載麻至溝邊。乃束麻稜如筏。沈溝中。以重石壓之。束麻筏之法。初下手尤難。法取麻兩稜。束成十字形。爲基址。旋取他稜橫架之。稍高。束麻者跳舞其上。令平。則易架他稜。而工易竣。如基址未固。駐足不穩。束麻者卽翻然墮水。衆必笑謔。及筏成。束麻者即乘之而去。岸上人皆鼓掌稱善。時麻里斯在旁審視。具得其術。適衆工中。有一人思難之。要之束麻。麻里斯許諾。筏成。竟無恙。衆驚服。皆謂爾日漚麻一役。當推爲首功云。是年伯爾得其兄愛顛書一緘。書詞甚長。愛顛者卽在巴黎大肆司帳者也。先是伯爾父歿後。兄弟久不相見。析產時曾團敘數日。以後蹤跡遂疎。愛顛既不來。伯爾亦無暇至巴黎。兩家妯娌子姪。幾不相識。乖違日久。宜

其疎闊乃爾。雖音問往來。然書詞淡漠。殊鮮真意。伯爾以富家子視其兄。不敢率意相待。愛顧不加細察。意其弟特一蟲鹵之鄉人耳。至是乃致書曰。

老弟手足。兄知弟孔懷。誼篤。故敢以一事相懇。丙子與兒女輩。氣體失調。擬令乘假館之暇。在鄉間居住數禮拜。俾得呼吸清氣。運動筋骨。即可復元。弟家房屋寬敞。定可位置。不似巴黎之地。窄人稠也。但得有兩榻之地。令丙子與小女共一榻。兩男又共一榻。其餘均易措辦。兄最小一男。名曰如兒。現年十二。體極弱。常患眼花。遇寒即嗽。兄實不勝焦灼。醫者謂須加意調養。不可用功。宜在鄉間居住。奈兄爲家境所累。勢難鄉居。兄一妻三子。度日維艱。丙子亦勞頓殊甚。兄每日八句鐘進肆。七句鐘回家。進肆之前。尙須襄理家務。薪水之役。事事躬親。日間如照料兒女。伴送進館。及炊爨等事。皆丙子一人任之。入夜則爲兒女清理衣服。恒至中夜而睡。丙子天性和易。勤不言勞。每見兄作愁悶狀。慰勉倍至。兄念兒女漸長。培植之費。日以浩繁。草草勞人。不知何時得了。後事方長。亦



願內子稍節勞苦。保養精神。備將來之用。世人恒情。都願入大城市謀生。卽先父在時。亦願以兄之在巴黎爲是。弟之業農爲非。及今思之。弟實有先見之明。曷勝豔羨。使兄今日爲農夫。雖所入之款。僅得其半。儘可支持門戶。而氣體當益健旺矣。竊念兄在肆中。薪水頗豐。然尙自悔其失計。彼世之勞而鮮獲者。不知當作何等想耶。內子輩渴欲一見弟夫人。他日相處既久。情意定可和協。所懇事是否可商。望速作覆。不勝盼切之至。兄愛顛手。

伯爾得書驚訝。循誦再三。先是其父母。數數語伯爾。以愛顛生計之饒。稱道不絕。口愛顛亦從不以情實語相告。故伯爾意其兄非富家翁。卽小康戶。常退然自以爲不如。及得愛顛書。始悉艱窘狀。幸災樂禍者聞之。且沾沾喜矣。伯爾則引爲己戚。立告其妻馬爾脫。馳書致愛顛。招其妻子。馬爾脫有難色。曰。彼大家婦也。妾山野鄙人。恐露醜爲笑耳。伯爾曰。卿才地敏幹。而德性溫淑。無愧大家風範。且吾嫂亦賢婦也。育兒女。操井臼。志行非甚相遠者。何慮不契合乎。麻里斯與麻里。知從

兄弟且至。喜欲狂。日夜謀娛客具甚備。斐理伯之稱貸於人也。以田產爲質。及時期滿。當贖。無以應。求緩。並許以厚利。不允。明日。有吏詣其家。逼索無所獲。遂封禁其田產。初斐理伯之父。既以憂傷故。兀坐不語。狀若譚瞽。其媳時因薪米不繼。怨詈交作。翁置弗問。如無所見。或有與翁語者。翁但領之。見者謂翁癡。不復醒人事。故斐理伯夫婦。時在翁前。絮絮譚拮据狀。絕無避忌。然翁實不癡。惟目見家道中落。故鬱極至此。常以傳產太早。爲生平大錯。其心目間。惟有田產一事。他事概不聞問。語次。或聞人偶述田產事。翁卽凝神傾聽。暗記其語。翁早知其子負債纍纍。然初不知產已盡質於人也。至是忽見索逋吏至門。點檢田產。呈遞封禁狀。吏之以始知禍在眉睫。翁不禁目瞪面熱。默不一語。惟隨吏點驗室中什物。錄於簿。翁者一一注視。惟審及吏與斐理伯出外。翁兀坐不動。如平時。斐理伯夫婦。自是始悟翁癡顛之情形矣。及夕晚餐。家人皆有戚容。斐理伯伏案臥。其妻遞湯與翁。翁推而起。步至斐理伯前。呼而語之曰。頃紛紛者何爲也。斐理伯久不聞父語。瞥見在

前如見怪物然。翁又語曰。頃所見者吏也。何爲乎來哉。斐理伯始驚悟曰。乃我父耶。翁曰。爾債負纍纍。今且籍沒矣。斐理伯默然。翁又曰。曩者爾急於得產。要求再四。予不得已。曲從所請。爾乃漫不經理。假手於人。以至粒穀不登。荒蕪滿目。游惰之罰。將安所辭。人情尙施報。土地亦然。其護惜之者。則報以豐年。其不能者。則報以饑饉。爾之罹禍宜矣。雖然。予豈不知爾之好游蕩而惡力田哉。所以傳產與爾者。冀爾得產後。知所遷改也。不料信爾太過。以致自貽伊戚。自產入爾手。蔬穀不登。牲畜瘠乏。年甚于一年。合門有凍餒之憂。今則官吏臨門。禍在旦夕。予一生勤儉。自分不應延此困辱。命實爲之。夫復何言。所恨者。僅有一子。冀其克昌我業。而反敗之。天乎。天乎。何弗令予速死也。斐理伯曰。父弗過慮。何困辱之有。翁曰。然則吏來何也。此輩臨門。豈是佳兆。我試問爾。爾究負若干。斐理伯曰。何問爲。翁曰。使吾知之。若何。爾其實以告我。斐理伯曰。有何相告。父但坐而晚餐可耳。翁詰之曰。爾爲我子。理當順我。斐理伯怫然起曰。今日之事。我爲政。誰敢相詰者。且產旣屬

我當惟我是聽。卽變賣庸何傷。翁曰。爾欲變賣乎。斐理伯曰。然。誰敢阻者。翁曰。我傳產與爾。遂許爾變產耶。斐理伯曰。父傳產時。無他條款。是明以全權授我也。欲賣則竟賣耳。翁曰。逆子。膽敢作此等語。爾破產蔑親。何以庇妻孥。示兒女乎。此皆吾姑息之過。以至於此。爾無他技能。既無恒產。將何以度日。且懶惰無行。放僻邪侈。勢將無所不爲。言次。復戟指罵曰。非吾子也。吾恨入骨髓矣。遂逡巡就坐。默不發一語。籍沒法條理。纂繁頗費周折。故自封禁。以至變賣。其限甚長。翁心謂事隔已久。疑遂寢息。一日忽見有人詣田莊。手捧色紙。黏貼牆上。卽變賣之招貼也觀者如堵。議論紛起。翁乃蹶然起。斐理伯之妻趨止之曰。阿翁欲何往。翁不顧而出。詣牆前。衆見翁至。皆引退。翁讀畢。始知產已籍沒。扼腕歎息曰。吾之血產盡矣。遂遽仆於地。視之已殯。越二日而葬之。葬之日。斐理伯妻子。隨柩步行。鄉之人執紼相送。及抵墓。行灑聖水禮畢。衆即退。無與斐理伯握手爲禮者。皆曰。陷父於非命者。此子也。斐理伯以變賣所得價。償債款。給公費。適盡。無以爲生。不得已。傭於人。其子

爲人牧牛。其妻以斐理伯嗜酒無行。知難仰以終身。亦自覓生計以餬口。

## 第六章

愛顛自巴黎寄書阿藏格。告行期將至之晚。鐘鳴六下。馬爾脫與若奈脫布食具。熬爐火以待。米賽爾洒掃庭中。伯爾則馳車至火車站相送。兩兒欲同往。因車窄不能容。故在道左迎候。良久未至。麻里斯立道中。遠望之。麻里曰。來未。曰。否。曰。遲矣。曰。此不足異也。曰。恐其失火車期耳。曰。不然。火車約四下鐘可到。既下車。安排行李。亦費時刻。加以自城至鄉之路程。計必六刻鐘。乃抵此也。且火車亦有遲速。或車載太重。馬不能疾馳。則來更遲矣。語畢。復注目諦望。呼曰。逾五分鐘即到矣。麻里歸告其母。其母急盥洗而出。馳抵道左。無何。車隆隆至。止門外。伯爾扶嫂下車。馬爾脫與親嘴爲禮。各以子女相見。兩家兒女初覲面。頗忸怩。未幾即交相歡愛。伯爾與米賽爾卸車。收檢箱篋。馬爾脫延嫂入坐。謂曰。姪女與麻里同寢一室。兩姪與小兒。又共一室。嫂在我家。不必拘泥。尤望擺脫煩惱。安心靜養耳。逾一刻。

許家人同席就餐。伯爾曰：承嫂枉顧，深以爲快。相待之誠，惟在衷曲。山居鄙畧，幸勿見怪。屋舍甚窄，故炊爨食息，同在一室。此兩人者，一名米賽爾，一名若奈脫。傭於我十年矣。始終勤懇，若一向與賤夫婦同席而餐，自聞嫂來，即請別食。弟謂無妨，未允其請。欲使知嫂畧分尙義之雅量也。嫂曰：叔能脫畧形迹，不以外人相待，甚善。甚善。嫂等來此，本無他求。所求者惟此間清氣耳。伯爾曰：善。雖然，嫂飢矣。盍就食。三兒各知飽啖，母以路途勞頓，且性拘謹，不能多食。因謝曰：嫂初到此，頗念丈夫離索之苦，故鬱鬱不能自怡，非憂他也。幸無疑慮。晚餐畢，相率至園中散步片刻。及夕，各就寢。翌日黎明，麻里斯不欲驚兩弟，屏聲息，披衣獨起。兩弟欠伸問曰：此何時耶？曰：四下鐘耳。曰：兄日日黎明即起耶？曰：然。盛夏之時，鄉居者日出則起矣。曰：然則冬令其晏起乎？曰：遲至六下兩刻鐘，亦必起矣。曰：矇朧不能辨色，雖起何爲？曰：將餵牲畜耳。曰：如不能見何？曰：我有鑑在，且去糞餵料，不煩細視也。長弟曰：兄其少待，我亦欲起矣。麻里斯曰：弟程途勞苦，可稍睡。逾兩小時，兄當來此。

相攜。次弟曰：我兩人皆已酣睡矣。且此乃趣事也。必往觀之。長者謂幼者曰：弟體弱善感冒。可稍睡。清晨恐涼露侵人也。曰：我領圍幅巾。足穿革履。何畏涼露。且晨氣甚佳。益人正不淺也。兩兒遂共起。時其母尚熟睡。乃與麻里斯緩步下樓。恐驚其母也。及至庭。則伯爾已先在矣。三兒各問安畢。伯爾曰：姪早起甚善。惟事非素習。得毋太勞乎。兩姪曰：麻里斯已起。願助之操作。伯爾曰：兩姪在此。麻里斯不必操作。今收穫已畢。農務稍閑。我與米賽爾自足了之。旋語麻里斯曰：爾但與兩弟遊玩可也。麻里斯導觀牛欄馬廄。豬圈兔穴。及家禽場。又將農具機關。及其用處。一一口講指畫。復從果園至牛乳房。適馬爾脫與若奈脫以牛乳至。曰：乳尚溫。願領畧其風味乎。兩兒曰：善。麻里斯馳取兩盞。馬爾脫斟之滿。兩兒同聲稱美。幼者曰：牛乳何用。曰：將製乳油耳。長者曰：可一觀其製法乎。曰：留此片刻可矣。兩兒諦觀良久。又問其法於麻里斯。麻里斯爲述各器之用。長者曰：已去油之乳何用。麻里斯曰：可製乳餅。卽昨晚席間所食者也。旋見若奈脫以勺挹取凝結之乳。置各

磨中磨圓有孔。磨滿卽取置木案上。案略斜。邊有孔。乳漿由此流入桶。乳之不能凝結者曰漿。曰。世間無廢物。然則乳漿何用。曰。可以餵豚。幼者呼曰。真大趣事也。時麻里與從妹以筐至園中。諸兒各相親嘴。幼者曰。妹情人。起何晏也。我等今日四下鐘卽起。游覽已久矣。麻里曰。非也。我等起亦久矣。方在室中整理拂拭。且捋羊乳耳。爾輩早起。徒爲遊玩計。何足道哉。長者曰。妹得麻里爲護身符。我等其無辭矣。麻里曰。我辯才無礙。爾等若有意相誣。必不能默爾息也。從妹曰。適嘗羊乳而來。幼者曰。羊乳何如。曰。大佳。兩兒謂麻里曰。其許我一嘗之乎。麻里曰。如不復誣我妹者。請如約。兩兒謹諾。麻里曰。今晚當各奉一杯。兩兒曰。以筐何爲。曰。取青豆作早餐耳。卽謂麻里斯曰。試取箸菌來。母親欲之。馬里斯曰。諾。俟我等游田中畢。歸途可經石礦也。麻里曰。將安所置菌。爾以我筐。我往取其他。於是三兒出田莊。迺適至小麥雀麥田中。露積在焉。幼者見而問曰。此穹然者何物耶。曰。麥稿耳。曰。曷弗以之入倉。得不爲雨淹耶。曰。不然。麥稿雖暴露無損也。且用露積者。有蓋足矣。其價



約十佛郎。若以入倉。非極大者不能容。不獨費鉅。且防火險。曰。得毋虞盜竊耶。曰。竊一二束。所直幾何。且非易事。此物不能從中抽取。必自上而下。其勢必用梯。而露積所在。離屋舍不遠。彼竊盜者必駕車而來。易於發覺。故甚難也。且鄉間正人居多。竊盜之事。固罕有耳。曰。然則麥何在。我未之見也。曰。穫後已脫售矣。所以省費也。曰。何費之有。曰。麥在倉中。易於發熱。須時時翻動。且防蟲鼠嚙食。故以及早脫售爲妙。大田莊主家有打麥汽機。其麥可隨時激打。如蒲槐爾之及爾滿是已。若我家之麥。隨穫隨打。僅留麥稿。作獸蓐耳。三人復詣一圃。圃種著蓬菜。葡即紅葡兒見而異之。麻里斯笑曰。兩弟殆未見此物乎。幼者曰。此生菜中一種耳。曰。非也。長者曰。此非可以製糖者乎。曰。然。可製糖。亦可作醇。母牛食之。則乳多。而味佳。其製糖作醇後。所餘渣滓。冬季可以餵牛。談話間。忽聞葉漸瀝有聲。卽見一黃色物。馳而過。伏匿田中。長者謂幼者曰。爾見家兔乎。幼者曰。然。麻里斯曰。此非家兔。乃野兔耳。幼者曰。其形絕相類。麻里斯曰。不然。野兔較大。毛色亦不同。三人且語且

行。遂抵草坡。兩兒見而異之。草坡有天生者。有人造者。阿藏格草坡。乃人造者也。兩兒不能辨。所植零陵香。苜蓿等物。皆生平所未見。且自幼居城。習見園囿中草。意所謂草坡者。亦平蕪沙草之類耳。麻里斯乃推誠相告。無自矜色。兩兒亦虛心領受。三人正在劇談。瞥見羣鳥驚起。稍遠乃撲地。幼者曰。此鷓也。麻里斯曰。此乃鷓鴣耳。長者曰。鷓鴣耶。遂移步至其所。復驚起之。幼者曰。伯父亦好獵乎。麻里斯曰。父親無暇及此。且茲事太費。故賃地與人。非貪錙銖之利也。旋登高原。先礮礮地也。今成腴壤深林矣。麻里斯告以改良時所用剝砂深耕土化糞壅諸法。又導觀石壙地。經營八年。蔚然成林矣。遂入壙內。採取響菌。幼者悄然曰。此菌可食耶。麻里斯曰。然。此響菌也。曰。人謂鄉居者。食菌宜慎。何也。麻里斯曰。林麓間野菌。探者不能細辨。食之宜慎。若此間之菌。與巴黎所食無異。保無礙也。三人遊久。腹飢。乃回家早餐。食量加於平時。伯爾語兩姪曰。今日之遊樂乎。導者其有未遍乎。兩兒曰。此遊益我不淺。所可恥者。我等愚昧無知耳。伯爾曰。何也。曰。苜蓿零陵香。番

薯及著蓬菜。一物不能舉其名。巴黎人愧欲死矣。伯爾曰。此常事耳。脫令麻里斯生入城市。亦且羞愧欲死矣。凡事總由習慣。姪輩居鄉日久。於鳥獸草木之名。不患不能辨析矣。一日者。伯爾見其嫂取麪包。蘸乳油。啖之。問曰。乳油尙適口乎。曰。甚美。曰。此弟婦之長技也。先時所製者。殊不甚佳。今則盡美無疵矣。然非力勤心專。曷克若此。嫂力讚馬爾脫素飪之美。伯爾曰。此間肴蔬。一皆取諸家園。所沽之市上者。惟麪包。牛羊肉耳。然不能謂市上之肉。與麪包。必不出自我家所植之麥。與所畜之牛羊也。父子夫婦。躬耕自給。與世無求。豈非樂事。園中有池。畜魚繁多。不日當盡取之。以佐盤殮。且使嫂共垂釣之樂也。早餐畢。伯爾挈家族。至蒲槐爾。謁及爾滿。須若納急出相見。與愛顛之女尤親愛。盡出玩器示之。及爾滿導客游園中。款以茶點。客將歸。及爾滿謂諸兒曰。幸數相顧。某當掃徑以待。須若納亦在假中。可共暢游。以破寂寞。每日由爾輩自定游計。計已定。或諸子至我家。挈須若納同往。或令須若納至阿藏格。各適其便可也。客歸。須若納即營營籌游策。日日

翻新策成。質於父。父喜甚。畀以馬車一乘。備遠遊之用。乃先期函約麻里斯等。作竟日遊。並約清晨出外。以撈蝦蛙爲戲。卽就草坡上早餐。至日。及爾滿挈須若納。赴阿藏格。車甫抵門。麻里斯等。卽躍躍而上。伯爾戒諸兒自慎。點驗畢。卽驅車往臨行。諸兒各脫帽揚巾。作辭別語。其父母又諄諄戒之。須若納坐兩女間。刺刺語游事。約兩刻許。車聲漸緩。諸兒亦肅靜無譁。回首一望。去家門已遠矣。初及爾滿在車中。寂然不語。聽諸兒譁笑。及時恐諸兒苦途遠。思有以問之。乃與共語。並叩巴黎三兒以所學何事。願習何業。長者曰。我願業商。方在專門學校肄業。所習者爲國文史。記地理圖畫。格致物理。及鈎稽帳籍等學。並習別國方言。我今已能通英日。巴日新亞文矣。兩年之後。卒業得憑。謀生異國。當有生色也。及爾滿曰。尊公已俯允否。曰。然。家母不欲我離膝下。頗欲我在巴黎謀一司帳之職。以紹箕裘。惟此事殊不易得。且所入不足資餬口。非我願也。今國人之設肆外國者。皆紛紛在巴黎招選學徒。舍彼就此。不較有把握乎。須若納曰。爾獨不以離鄉爲苦乎。曰。離鄉

去國之感。恒情不免。我獨何人。而能遣此。然而自立之道。何可已也。方今輪船通行。自哈佛爾法海口北至紐約。一葦可杭。尙不及百年前巴黎至馬賽法海口南路程。作客他鄉。豈不易易。且此不過數年事耳。數年之後。造回故土。乃以異域聞見之所及。施之於用。不亦妙乎。及爾滿。又問幼者曰。幼者答以雅好圖書。願充工程師。惟體弱善病。恐所學無成耳。須若納謂女曰。我輩閨閣中人。不必如男子之定操一業也。女曰。不然。家道清寒。不欲重累父母。妹方當應試。求蒙師之職耳。須若納曰。然則爾爲我師可乎。如許我者。請速至蒲槐爾。定當虛心領教。以圖進益。顧問其父曰。大人以爲何如。及爾滿曰。此事甚善。倘蒙許諾。當以兒爲托。然此事不必汲汲。逾四五年。未爲遲也。兒今從若萌先生受業。亦已足矣。車中且譚且行。忽忽已抵約所矣。甫解車。諸兒各挾釣絲而至。絲端皆飾紅呢。須若納所手具也。巴黎三兒見之。殊錯愕不解用法。須若納鼓勇先登。馳至溝邊。羣蛙聞聲驚竄。匿蘆葦間。須若納呼曰。蛙乎。蛙乎。今日必大獲矣。女曰。如何而後可獲。曰。此易易耳。水中

如見蛙鼻。卽以紅呢抵之。蛙必怒嚙。乃曳絲而上。擲於岸。納網中。曰。獲之何爲。曰。將以果腹耳。女蹙額示意。麻里斯曰。蛙味甚佳。今日如能得獲。我等可大嚼矣。然此物惟下半體可食。烹調合法。實與鷄味無殊。語次。須若納。適見蛙鼻。卽抵以紅呢。曳而上。呼女觀之。旋向後一擲。躍距二丈許。蛙戰栗。復躍起。須若納馳而前。執其足。投之網。曰。爾試觀之。捕蛙非大難事也。諸兒各先後垂絲。麻里斯等技最良。發無不中。巴黎三兒演試半刻。遂獲數蛙。與會倍進。獨女以曳絲太急。屢獲屢失。卒得一蛙。亦向後擲之。女兀立不知所措。蛙遂竄入草際。復入石中。羣兒呼曰。速捉此蛙。不然遁矣。女如其言。蛙驚跳。女復恇怯不敢動。如是者乃數次云。羣兒大笑。促之曰。人食蛙。蛙不能食人也。捉之何怖。麻里斯趨而前。捕蛙置女手中。女跳躍却避。蛙遂竄入水。女曰。其體如冰。吁可畏也。其兄嘲之曰。誠然。恨未炙熟耳。無何。女竟獲數蛙。計諸兒終朝所獲。至兩大網之多。復駕車迤邐向樹林前往。麻里斯見水邊柳條。割去其柔直者。以與從兄弟。從兄弟以行囊累贅。却之。麻里斯盡

取柳條置兩手中。不足。復以口銜之。從兄弟見之。笑曰。麻里斯口中銜鐵矣。麻里斯曰。爾輩但相訕笑。我不恥也。曾亦知我之意乎。曰。不知。請示。曰。凡遊者必執器。脫有殘枝敗葉。藉此掃除。其用不已便乎。及入林。但見峯巒競秀。萬木成陰。其樹高下參差。以大小成列。其色亦斑駁陸離。不名一狀。風景絕佳。眺賞間。愛顧之女。方席地坐。忽蹶起。失色而呼。適見一蝮蛇。尾立而鳴。羣兒皆咄咄。及爾滿聞聲。至麻里斯。卽取柳條擊之。折其腰。蛇負痛而盤。蠕動片刻。卽殞斃。及爾滿呼麻里斯。語曰。壯士。臨變不亂。見害不避。非麻里斯。其誰能之。時女驚魂尙未定。及爾滿謂曰。麻里斯有功於爾。不可忘也。諸兒爭向麻里斯道賀。麻里斯赧然謝曰。此非大難事。爾輩亦自能之。乃張蛇喙。指示毒處。須若納曰。蝮蛇螫人。豈足致命乎。其父曰。未必致命。然足致大病。時諸兒方欲早餐。適遇蝮蛇。不思食。事定。乃各大嚼。惟女尤惴惴。未能飽也。麻里斯曰。頃者。我口銜柳條。爾輩但知相笑。今謂何如。遊曠野者。席地而坐。固不可不慎也。須若納曰。被蛇螫者。有解救之法乎。及爾滿曰。人

身有衣遮護。本不易受蛇螫。所可慮者。惟臂與脛耳。凡被毒者。急取手巾。緊扎傷處。令血不流。則毒不傳入他處。最妙之法。莫如口吮。惟口中無傷破者。方許爲之。毒入喉內。和血消化。不能爲患也。否則以刀割破傷處。放出毒血。再以阿魔尼亞蘇名烙之。凡居鄉與遊野者。宜常備阿魔尼亞一瓶也。傷定後。再服牛乳。或溫酒少許。可無事矣。今此女幸未受傷。即可不必醫治。惟當飲酒一杯。以壓驚耳。女曰。我生平初次見蛇。如見怪物然。凡冷血蟲。如長蟲。蝦蟆等物。我見之。未嘗不慄慄也。麻里斯曰。蝦蟆豈可誣哉。有功之蟲。非蛇類也。曰。蝦蟆何功之有。曰。是能食蟲。豸蠅牛等物。園中無蝦蟆。則蔬果荒矣。及爾滿先生以爲然否。及爾滿曰。然亦有無此物而購之他處者。幼者曰。蝦蟆可作貨耶。諸兒且食且談。早餐已畢。兩女就泉水中洗滌食器。以回車中。更取撈蝦具。及爾滿導諸兒至河濱。其地樹林陰翳。清水漣漪。乃擇善地。投釣具。每十分時而起之。必有一二蝦。上而食餌。諸兒爭取之。以投於筐。忽有一蝦躍上巴黎兒之指而拊之。兒搖指大呼。羣兒皆笑之。兒曰。



蝦拊可畏。麻里斯教之曰。無怖。惟不可搖指。指搖則蝦懼墮而拊愈緊。爾宜以他指拊其身。則解矣。兒如其言。蝦遂脫指。兒急以指入口中吮之。曰。狡哉此蝦。入火之後。方當謀飽啖之樂耳。歷兩小時。蝦遂盈筐。先是須若納與諸兒約。所得物統歸須若納。明日。伯爾當挈眷屬來家早餐。遂盡取蛙蝦。載回蒲槐爾。既至。各劇談及爾滿語。諸兒以蝦病甚多。孳生遂以不繁。國中已有數處竟不產一蝦。其受病之源。尙未察知。近今博學家。方殫心此事。苦無端倪。異日如有治病之方。則善矣。數日後。伯爾命開池中水門。水盡洩。魚歷歷可數。上下橫疊。以千百計。跳躍動盪。爭向尺水中求窟穴。須若納曰。魚戢戢若此耶。我自垂釣以來。未嘗獲一魚。甚矣我之無能也。魚已盡。皆售之市。僅留少許。備傳種。及池水涸。伯爾取池底泥。和以石灰。爲糞土計也。諸兒出外遊覽。馬爾脫妯娌在家中。學作果脯。是年園中產果甚多。無顧者。幾失利。蒙塾師若萌假期多暇。日至伯爾家。教馬爾脫作李脯。葡萄。乾梨。脯乳。油酥等法。遇諸兒遠游日。各女兒則留家中。助去果皮。須若納性稍躁。

勤無事不干預。託言助勞。動爲牽掣。工程遂至留滯。馬爾脫不能容。戒以安靜。須若納婉容語曰。我欲略食果脯。可乎。馬爾脫見之。不忍責。遂任所爲。妯娌間相得甚歡。愛顛妻盡吐衷曲。語馬爾脫以巴黎度日之艱。培植兒女之費。其夫薪水雖優。並有微利可收。然僅能支持日用。竟無積蓄。其夫自朝至暮。嚴閉室中。光氣不足。一日不得休息。因之體氣不佳。極羨馬爾脫居鄉之美。曰。田事雖勞。其樂處正復不淺。萬非巴黎所能及。鄉人一遇豐年。不患無利可圖。巴黎則不然。商務盛。我夫與其勞。不與其利。商務衰。卽有賦閑之憂矣。時已屆秋分。天氣漸涼。且多雨露。艱於遠行。野游者僅逾數刻。卽思家中爐火之樂矣。是年蒲槐爾所產栗。核桃。蘋果等果。繁碩異常。正當採取之期。及爾滿細心監護。禁工人猛擊。以免損傷。栗與核桃。甫墮地。卽去皮。納大屋中。備發售。栗爲法國中土諸邑物產大宗。其地居民有糞而食者。亦有磨粉而食者。核桃則乘其未熟時。剖殼取肉。而後出售。有鮮者。有陳者。或榨油而後售之。法人之用核桃油者。幾居全國之半。此兩種果樹。生六

十年而後大盛。一核桃樹能生八十里脫爾。一栗樹能生六十計羅格拉姆。及爾滿方與諸兒講述。須若納問曰。榛子亦佳果也。其用安在。曰。採取之法。與核桃栗子同。待其乾而後售之。亦可榨油。香料廠及畫家。有專種此樹者。其所產之果。較林中者爲大。林中之果。皆野果也。及西歷十月初。蘋果已熟。當及爾滿卜居蒲槐爾時。卽令種植蘋果樹。今已繁茂可觀矣。其所售之蘋果酒。精心製造。遠近馳名。先期及爾滿命將已墮地之蘋果。收存一處。不令攪雜。免損酒味。乃擇晴日。遍招工人。視涼露已晞。各執鞭竿。以次擊樹。果墮盛囊中。或筐中。以車載之。歸田莊。入倉房。散播成小堆。令速乾而熟。並命輕手握取。免致損傷。及果已熟。用磨軋之。成小塊如榛子大。復取置榨床。流出之汁。盛桶中。巴黎兩兒渴欲一嘗其味。甫沾唇。盛額言曰。是何味之淡也。及爾滿筭爾曰。酒尙未成。何味之有。會須發酵。而後有酒味也。兩兒問發酵之法。及爾滿爲之縷述曰。發酵之法。盛之以桶。置小室中。寒暑表熱度以八至十五爲率。須令與外氣相通。然後瀝酒兩次。而人可食矣。及爾

滿復取梨釀酒。其法與蘋果酒畧同。將以和入蘋果酒內。令其香味發越者也。時巴黎兩兒假期將滿。深以不及嘗酒爲恨。及爾滿許以酒成時。當送一饅至巴黎。諸兒謹謝。計諸兒自至阿藏格。忽已兩月。遂定期過返巴黎。諸兒雖嗜好不同。然甚以此游爲樂。與伯爾等連旬相處。一旦言別。不覺凄然。伯爾等苦意挽留。以數日爲約。愛顯妻以其夫索居已久。諸兒當理舊業。辭不允。伯爾等遂罷。母子四人居鄉日久。飽受日光空氣。且多運動。故體氣遂佳。神采煥發。阿藏格之遊。勝千百服補身劑矣。其幼子尤覺改觀。初至時。飢不能食。倦不能睡。至是。則食量如老。饜渴睡如醉漢。深以歸家爲苦。恐病勢復至也。伯爾等留之。其母不欲久擾。遂托故辭謝。馬爾脫預備各筐筥。盛蔬果鷄子果脯等物。及須若納所饋贈之物。行李太重。一車不能容。遂別以大車載之。行之日。伯爾與嫂及各女兒同車。諸男兒則坐大車。已至火車站。諸兒各親嘴而別。車行。又各脫帽揚巾。至不相見而止。時麻里斯兒妹及須若納。猶兀立道旁。遠望天末。盤桓不忍去。歸途各相視不一語。既

至家。惟默想行客返巴黎之程途。及兩月中聚首之樂。幾無日不思也。

### 第七章

麻里斯年已十五。先以投水救須若納。感受肺炎病。且發長太速。體爲之弱。至是始告痊。壯健輕捷。嫻於農事。一田務中能手也。其父甚依賴之。時伯爾家業日盛。歲有贏餘。可謂得志矣。然自視常敢然。見其子天資穎異。冥冥獨造。益思有以進之。一日商於及爾滿曰。我兒年近成丁。篤嗜農業。先生之所知也。某常詢以何好。兒必以習農對。觀其志氣振奮。不憚艱辛。以愚見度之。異日長大。必成上農。某所不滿者。我兒所知。僅皆得諸閱歷。竊欲進之於學問之途。以遂其志焉。先生其謂何如。及爾滿稱善曰。今日者。藝學大進之世也。農人無學問。何以釋疑難而去故見。何以盡天時地利之宜。村夫一知半解。便沾沾自喜。亦知物理之繁變。無有過於農業者乎。令子天資絕慧。子不自足。而必以學問進之。鄙人之所深許也。伯爾曰。此事甚善。然有甚難者。麻里斯於小學初卒業。今在諾愛耳先生處肄習格致。

化學及動植物學。高等農學堂課程較深。即令投考。恐遭迸棄。且肄業此中者。率皆大農戶子弟。於某之境。地頗不相宜。而尋常農學堂課程。皆詳於法。而畧於理。恐無益於我子也。及爾滿曰。是也。雖然。高等尋常二學校之間。不尙有實驗學校乎。其必有當於尊意焉。伯爾曰。此殆新創之學校歟。某未之前聞也。及爾滿曰。此等學校。乃一千八百七十五年所創。專收中等農戶子弟入學肄業。其中課程。平分工作讀書兩節。均勻合度。使心與身。無偏勞之病。我邑鄰郡。即有實驗學校一所。若令麻里斯肄業其中。離家既不遠。所習農法。亦不甚懸殊也。曰。學費幾何。曰。未知其詳。約在四百與六百佛郎之間。兩年卒業。曰。學費既重。而麻里斯入學後。更須雇傭相代。豈非兩損。然此事既於我子有益。某亦不暇顧也。曰。子且勿憂。彼中肄業生。亦有不取學費者。令子當可援例邀免。然此事可緩譚。某有一友。與總管學校者相識。當致函詢問細章。數日後。可悉底蘊矣。伯爾告辭而歸。定例出學費之生徒。已得小學卒業據者。可免投考。欲免學費者。不在此例。麻里斯先期預

備試事。諾愛爾令溫理地理史記。習練文法。並令溫習格致化學及動植物學淺說。此數學者。雖考試細目表不載。而試官率以命題。故及之。若數學及度量權衡法。麻里斯早已瞭然矣。諾愛爾又策勉之曰。爾父令爾入學肄業。獲益定非淺鮮。他日爾自知之。爾爲我高足。必不負子期望也。逾六星期。伯爾遂挈麻里斯入實驗學校。臨行。麻里斯赴親友家謁別。親友爲之惘然。及羅姆年邁多病。聞麻里斯且行。拊而語曰。我老邁。幾不支。恐不復相見矣。曩嘗自思不幸填溝壑。下筇之日。得爾執紼相送。慰幸多矣。今何望乎。惟以敦品勵學爲囑。忠厚正直。福澤之原。不可忽也。馬爾脫愴然不樂。臨別之日。忍淚相送。及車已遠行。乃與馬里若奈脫相對大哭。米賽爾與伯爾同往。車中竊語麻里斯曰。主人令爾入學肄業。真覺可笑。豈以爾所知者爲未足耶。以吾觀之。爾之學問已與諾愛耳相埒。不知爲師者將何以教爾。然主人頗明理。所爲當不誤。我所以如此云云者。由我性好議論。且見爾遠離。不免戚戚也。語畢。遂出懷中書夾遞與麻里斯曰。贈此識別。物雖不佳。留

爾用之。庶念故鄉老僕平日相愛之雅。別後悵望之忱。麻里斯稱謝曰。思我之誠不在禮物。既承厚贖。永佩勿諼。薄暮抵學舍。明日已屆試期。麻里斯獲携伯爾乃欣然而返。學舍本故宮遺址。地勢高聳。田畝皆在其下。旁立各廠。舍中臥室膳廳。課堂講堂。及試驗房。佈置皆精當。校長年尙少。性勤敏。其待學生也。如慈父。如嚴師。供養精腆。調護周至。麻里斯在家習於勞苦。於學中起居飲食。皆極稱意。時而讀書。時而力作。敏捷無比。同輩皆敬服。學之中有偷惰者。麻里斯則從而策勵之。塾師見麻里斯於耕田灌園術。無不嫻習。恨無以相益。麻里斯絕不自矜。深明學問無窮之理。聽塾師講解。必虛心領受。無怠容。本課已畢。同輩中有不能完課者。輒從旁指授。或進而助之。有不率者。則溫言慰勉。不加誚讓。以故學規益寬弛。而生徒皆勤學守規。不勞校長之督責焉。學中課程嚴密。自早至暮。無暇晷。生徒晨起。卽入牛欄或馬廄。刷理牲畜。加料於飼棚。形如枹橫置槽中。以盛飼料者。除糞易新。寧。既畢。往田中工作。午膳後遊散片刻。各入學堂讀書。所課者如史記地理算學繪圖。



尋常律例財理學以及種植畜牧氣候物理格致化學經理田務學。皆分日肄業。頗稱精密。麻里斯從諾愛耳受業。於以上各學。先已刺得大致。入學後。默識心通。獲效甚速。每月課。輒膺首列。獨於繪圖學。限於天材。終輸人一著。麻里斯性靈敏。於試驗化合之術。以及金工木工。無不得心應手。惟不善丹青。諾愛耳雖悉心指授。然卒無效。學堂種植之物。品類繁縟。小麥圓麥雀麥之外。首稽零陵香以作芻料。大麥以製皮酒。蕎麥一物。法境中有充食物者。此間以作肥料。植於沙地。乘其未熟時。翻而埋之。工料植物科中。植物之可供製造者皆屬工料植物科則有著蓬菜可製糖及醇。霍布花蔓生。其實可入皮酒。油菜以榨油。胡麻以作布。暇日塾師令生徒遊覽鄰近田地。及製造廠。以廣聞見。一日學中。以大麥售諸皮酒廠。校長率生徒往觀。俾習製法。法取大麥漬以水。令易發芽。芽已發。曬令乾。置鐵礮礮中。軋之。投於筒。沃以熱水。用物攪之。令和。取其汁。入以霍布花。使有香味。復取出沸之。傾水盤中。俟其冷。加以麪。令發酵。皮酒廠中傾棄之廢料。其用甚繁。大麥渣雜以他物。可餵牲。

畜牝牛尤嗜之。其麩可作酵料。蒸醇製麪包者必用之。學中所種薯蕷菜皆售之。製糖廠及蒸酒坊植物中可蒸取其醇者甚多。其物可分三類。一卽酒。如葡萄酒。皮酒。蘋果酒。梨酒之類。一植物之含糖者。如甘蔗等類。一其物雖不含糖而含有他質。可用法使成糖者。如五穀小粉及一切含小粉之果品。提醇之法必用蒸。所謂蒸者。乃取流質加熱。使成汽質。復加冷。使復流質之謂也。一日麻里斯偕諸同學往觀蒸酒坊。坊內專取薯蕷菜製酒。其蒸出之酒乃雜醇。非淨醇也。法取薯蕷菜洗淨。切成細片。投筒中。漬以水。並和以硫強水。復取上次酒瀝。亦係流質卽已提雜醇之廢質也加熱入之。旋取他筒。令汁自流入。加以皮酒麩。使發酵。然後用醇蒸之。其蒸出者謂雜醇。再蒸之卽成淨醇矣傾棄之。薯蕷菜渣埋藏窖中。備作牲畜肥料。凡糖廠所在之地。其地居民必多種薯蕷菜。廠主先與農人立約。必以含糖較多者送售。以免虧折。製糖之法。先取薯蕷菜洗而切之。榨取其汁。傾銅鍋中。和以石灰少許。加熱。令沸。其沸出之沫。隨手撇去。俟汁已淨。再加熱以去水質。乃用濾器濾之。盛以大鍋。

其濾器以羊毛布爲幕。及冷結成晶形大塊。是爲粗糖。尋常食用之塊糖。皆以精製之糖。此等糖廠。分爲兩類。一爲蔗糖廠。多設在海口。一爲薯蕷菜糖廠。多設在大都會。糖之爲物。食之若不過度。於身有益。然惟近今始知用之。卽以蔗糖論。由來較古。然食至第十七周時。而其用始顯。至第十八周時。銷路遂廣。爲印度斐洲等國開一利源。二百年前。惟藥肆中售之而已。拿破倫第一絕英之時。時法始激勵其民創製薯蕷菜糖。前此五十年。雖解製法。然不甚精也。五十年來。製法日精。俄法德奧等國。爭奇角勝。而蔗糖之銷路。幾不能與薯蕷菜糖相半矣。麻里斯之在學也。有師友講習之樂。然不能無思鄉意。適逢假期。遂欣然而返。歸未數日。父病不能出。麻里斯代父理田務。其御下也。寬和有度。以身作則。一如其父。故不煩督責。而人自樂爲之用。雖好議論。如米賽爾者。亦唯唯聽命。無一語相難。麻里斯異之。曰。爾何所見。而一無遠言也。得母病乎。米賽爾曰。不然。自至阿藏格。習見非常之事。今恬不爲怪矣。卽欲有所言。輒自創曰。我平日好議論。往往有失言之

悔。何復嘵嘵爲。今者爾卽誑我曰。我有新法。可不下種而得穀粒。我亦且信之矣。斐理伯之子。麻里斯舊同學也。麻里斯素知其偷懶任性。雅不願與交。此子幼無父教。又素爲母所溺愛。幾爲其父之續矣。幸自祖父歿後。習見其父種種窘辱狀。遂惕然深省。決計棄邪歸正。爲幹蠱子。是時爲人牧羊。頗勤謹。而其父自變產後。依然遊蕩。不治生計。惟以盜獵爲生涯。一日至及爾滿林中。竊捕鳥兔。爲守獵卒。耶培爾所見。執之。控於官。監禁十五日。罰鍰壹百佛郎。或語其子曰。爾父鼠竊狗偷。今爲獄囚矣。獄囚之子。恐爲主人所逐也。其子情急。遂走訪麻里斯。請曰。我父游蕩無行。子受其累。不當復任其咎。且我豈能一日賦閑哉。我母房膳之費。皆仰給於我。母子二人。相依爲命。母無我。早爲溝中瘠矣。幸我年已及丁。方以應募入伍。遠適他方。脫離家累爲樂耳。今日相訪。敢求我子一見。及爾滿君。此君與敝主人相識。得其一言。重於九鼎矣。麻里斯曰。子請勿憂。父過不及其子。此事自有公論。旣承誑誘。定當爲子言之。曰。我與子無交。權之雅。本不敢以瑣事相瀆。今蒙鼎

諾銘感靡涯。尊公實賢主人也。願效犬馬之勞久矣。惜離家太近。恐被父親纏擾。致方職守。異日如有機緣。幸勿忘也。時假期已滿。父病亦愈。麻里斯卽遣返學堂。同學皆以久別相見爲樂。麻里斯精心向學。尤屬意於畜牧一科。數年前已習於製乳油法。至是請於校長。修蓋學中牛乳房。校長從之。遂獲奇效。學中所製乳餅。皆係軟乳餅。物頗精美。惟因厩房太濕。不能久存。故質不甚純。時已五月。邑中舉行農會。衆推校長爲會員。校長挈麻里斯同往。俾得參校各種牲畜之異同。並資其臂助焉。會事極盛。麻里斯終日在會場流覽。聽考驗官及牧人之評論。默識於心。引爲己益。會中所列牲畜屬馬類者。曰怠米生種。曰奴耳曼提。所產最多。可騎。可駕輕車。曰大耳特種。曰比里牛斯種。軍隊用之。曰里母生種。亦軍隊所用。曰挨耳特南種。以駕砲車。此外能引重之馬。曰蒲老乃種。可駕重車。曰勃爾東種。弗郎岡多槐種。可駕塌車大車。曰彼爾希隆種。可駕四輪大車。上下山坡。雖數千斤不餒也。馬之外則有騾。菠槐多。及比里牛恩兩邑所產最多。南方諸邑專作引重之用。

他國亦購用之。每歲出口約一萬八千匹。價值十六兆佛郎。屬牛類者曰奴爾蔓特種。產乳最豐。且易饑肥。曰弗羅蔓特種。其乳亦美。尚有一小種曰勃爾東種。此外則有灰滿倫種。謔羅來種。毛白。可以耕田。其肉甚美。曰巴爾脫乃種。產沿海各郡。曰加斯高納種。曰加羅納種。比里牛恩種。皆南方產也。曰薩來種。梅藏格種。凹勃拉格種。皆中高原產也。其產於薩和挨郡者。曰他里特種。爲阿耳魄山所產各種之一。其爲異國之種。而生長於法國者。曰荷蘭種。曰弗里蒲爾種。曰培爾納種。皆瑞士產產乳甚美。曰豆哈姆種。英產易長而肉美。羊類。則有克來翁種。培里鄉種。沙羅奴種。拉爾若格種。羅拉甘種。排爾培倫種。皆本國產也。曰美利奴斯種。多而且良。本西班牙產。舊有出口之禁。違者罰極重。千八百年間。西班牙王查禮第四。以羊一羣遺法王魯意第十六。王令德西愛牧之時。蘭蒲牧場之名。爲各國所共知。法國之有美利奴斯種。實始於此。其羊毛豐而細。曰地斯來種。薩五斯騰種。皆英產也。最易饑肥。其肉極美。豕類甚鮮。近有克勞乃種。培格希爾種。約克希爾種。家禽

種類甚繁。雞則有安南種。呼丹種。弗來希種。克來佛葛種。圖爾根種。橫濱種。巴都種。鴨則有羅痕種。鵝則有都羅士種。麻里斯奮志力學。農具有所注意。故於會中所列機器。皆能精心考察。指陳利弊。時伯爾亦至會場。與麻里斯相見。麻里斯勸其父購一牡牛。價頗昂貴。麻里斯再三慫恿。伯爾遂購歸阿藏格。牛性頗猛。故不令與他獸同處。特關一欄拘之。欄地寬敞通風。令易生長。麻里斯學期已畢。出學時。考試列首先。遂欣然而歸。及抵家。則從兄如兒在家已兩月矣。如兒自歸後。病體尪羸。百藥不效。醫者謂非得鄉間清氣。恐不能瘳。伯爾知之。遂招致阿藏格。

## 第八章

麻里斯離家兩年。家人寂寂寡歡。日間一意治田務。尚可排遣離懷。日暮晏息。輒思念不置。或冬寒夜永。馬爾脫與若奈脫擁爐閒話。伯爾攤書獨坐。見麻里斯不在側。則悄然不樂。一日三秋矣。及歸。合家歡喜。如困始蘇。歸之明日。甫黎明。麻里斯蹶然起。赴田中鋤地。預備下種。若忘其身之久客而歸者。田中語米賽爾曰。子

亦知家居之樂乎。我昔在學堂。校長寬厚愛人。同學亦藹然可親。未嘗不心焉樂之。然終不及家居之萬一也。故知最親切者。莫如生長之鄉。最眷戀者。莫如手所營殖之地。子以爲何如。其父母戒之曰。兒試後辛勞。宜靜息。何急急爲。麻里斯曰。不然。兒近日讀書頗勞神。今得舒動筋骨。呼吸清氣。正可怡養天機。且兒在田中見菜花豆莢等物。心目俱爽。若令我一日袖手而坐。必病矣。伯爾聞而避之。遂不復阻。父子兩人。周覽阿藏格各地。討論修蓋之方。麻里斯以所見質於父。父嘉其學識之大進也。急從之。議定分年易種法。芻料可倍收。前在會中所購牡牛。專令孳生傳種。並精選牲畜。汰慮留良。以成佳種。麻里斯又知農人能自將動植物產。製造成貨。而後售之。較之未經製造者。獲利可三倍。並以石礦中窟穴涼爽通風。可窖藏乳餅。令益純良。遂以試製乳餅。請伯爾允之。如兒性善布局。嫻於繪事。深以病體不能作畫圖飾爲害。及時與麻里斯共謀布置。議暫以家中倉房改作乳餅房。隔分兩室。其一作暖房。其一作風房。暖房設火爐以取暖。置几一。几面畧斜。



縱橫琢槽。以溜去乳漿。乳之不能凝結者如兒又善攻木。風房中隔板及石礦中地板。皆其所手造也。麻里斯與米賽爾預備模子。籠罩木板。蘆席草席等具。田事稍閑。即並力爲之。如兒既以體弱不能力田。則終日在家中鋸鐮木料。三人者恒至夜分始睡。如兒與麻里斯同室寢。寢前又往復討論。娓娓不倦。如是者約一月。規模粗具。不能盡美也。然麻里斯以成效尙難預決。不敢輕率嘗試。擬俟小試獲利後。卽以所獲利匯積成款。然後謀建置耳。麻里斯先取牛乳數里脫爾。加以犢牛胃汁。視乳已凝。用勺挹取傾模中。旋取出置板上。溙以細鹽少許。三日後。移置風房中木枷上。令得通風。日必一翻。乳餅漸生霉點。逾三星期。乃取入石礦。如兒與麻里斯晨夕一往察視。初製乳餅頗肥美。然不甚純。麻里斯歎然曰。物雖美。不能勝他家。非計也。我家乳油。名馳遐邇。今舍乳油而置無人顧問之乳餅。不亦愼乎。然事方創始。利弊固難洞悉。當逐加考驗。以求審藏久暫之度耳。計自半年以來。研求製法。今日小試。亦以半年爲期。半年而猶不效。卽決然舍去。未晚也。一日麻里斯

忽得一法。取牛乳和入山羊乳百分之五。以製乳餅。已而不復省憶。某夕晚餐。麻里斯出乳餅遍餉家人。家人稱道不絕口曰。餅色純白。香味發越。即精於辨味之老饕。食之亦必稱快焉。麻里斯求其故不得。急語如兒曰。試取記事冊檢閱第七十二頁。即得矣。記事冊者。如兒所記逐日試驗各事之冊也。如兒捧冊至。翻至第七十二頁。朗誦曰。十二月十四號。和山羊乳二十分之一。麻里斯恍然悟曰。是乃羊乳之功耶。我始念不及此。今始得配合之法矣。麻里斯又以乳餅遺及爾滿。及爾滿食之稱美曰。能常此不渝。不患無銷路矣。凡兩月而利弊盡顯。所製餅一律完好。惟名未揚耳。如兒爲麻里斯草定商標。中繪阿藏格田庄圖。風景宛然。邊書巴爾維爾伯爾氏阿藏格田庄字樣。稿成以示家人。伯爾夫婦。麻里斯兄妹。見之連聲讚歎。麻里斯曰。得此商標。既絕假冒。又飾外觀。豈不甚善。所惜者太費耳。伯爾曰。我意伯爾氏下當加父子兩字。麻里斯曰。父親阿藏格之主人也。兒何敢僭。伯爾曰。乳餅之得以收效而獲利。非爾之功而何。且又有一說焉。乳餅雖美。名譽

未揚。尙非講求外觀之事。爾如入城。當攜取乳餅若干。分贈旅店主及食物商人。令其一嘗風味。彼以爲善也。訂購者必接踵而至。名既播矣。然後謀飾觀暢銷之事。未爲遲也。麻里斯如其言。卽有商人定購乳餅二十五枚者。每枚價五十生丁。依此核算。乳餅之利。大於乳油多矣。一里脫耳牛乳所製乳餅。除乳漿不計外。可得二十五生丁。若製乳油。僅得十二生丁。雖已提乳油之乳。尙合他用。然爲利無幾也。馬爾脫見製法已備。鎖售日廣。亦就習其法。如兒爲麻里斯代操會計。檢閱帳目。知試驗之費。差已收回。以後所獲。皆贏餘法。贏餘之利。悉數存儲。備建造乳餅房之用。成麻里斯之志也。加兒又爲麻里斯繪圖估價。議建屋於石礮側。附近窰房。價約一千五六百佛郎左右。時交八月一日過午。忽聞車聲隆隆。止門外。客下車。問伯爾爾在家否。如兒肅客入。告以他適。客曰。某來面呈要事。可促令歸乎。如兒急遣若奈脫踪跡之。須與伯爾爾偕麻里斯至。客曰。某巴黎乳餅大賈也。素性樸誠。不善周旋。昨寓旅店。啖乳餅甚佳。問之。知出自君家所製。竊願購存肆中。以公

同好。聞其價每枚五十生丁。然乎否乎。伯爾曰。然。客曰。然則每一星期。請寄百枚。如原價。郵費在內。如兒在旁。知此事大可居奇。恐伯爾父子之輕諾失利也。急趨前曰。每枚五十生丁。指自鄉至城。無包費運費言之耳。且初承惠顧。不敢不貶價。以副雅意。日後牲畜器具。時有增修之費。成本既重。貨價不得不漲。非六十生丁不可。火車運費。由客自理。客聞言愕然。見其年幼。頗異之。伯爾曰。此我姪也。如兒曰。我忝操會計。恐叔父妄成本之重。輕於一諾。不敢不爲此言。若定價之權。仍自叔父操之也。客曰。請依六十生丁之價。運費由我自理。惟君家乳餅之入巴黎者。須盡歸吾肆。不得他售。如兒曰。此約萬不可行。客欲撓吾自主之權。脫有巴黎他商。求售於我。勢必坐而受損。安得不取償於客。必行此約。非八十生丁不可。客曰。價太昂矣。佛然而起。作欲去狀。伯爾懼。有貶價意。方欲啓口。如兒復曰。客請平心思之。客之惠然肯來者。豈不以吾家之貨爲可取乎。且客欲求利而禁他人之分利。是壟斷也。壟斷之人。何吝重價耶。况我家乳餅創製時。尙無把握。今則成效昭

然想巴黎商人必有願出六十生丁。而不撓我自主之權者。客之願與不願。不足計也。客曰。子言良是。旌願伯爾曰。然則七十五生丁可乎。伯爾首肯。客曰。明日請臨敝廡早餐。餐後同詣註冊官處。訂立合同。公同簽字。可矣。伯爾曰。諾。客曰。君家乳餅亦嘗命名乎。伯爾笑曰。未也。客曰。貨不可無名。君家田庄既名阿藏格。即名之曰阿藏格乳餅。不亦可乎。既立名號。可作標記。其乳餅當用錫紙裹之。斯善矣。伯爾語如兒曰。試出畫稿示客。客見之。擊節歎賞。曰。此子繪事之精。辯才之敏。可稱雙絕。畫稿盡善盡美。不煩點竄。某當攜歸巴黎。付之石印。隨用隨印。亦甚便也。客既去。伯爾憮然曰。頃客所言。真耶。夢耶。我未敢信也。誰謂一乳餅值十五蘇蘇幣名每蘇值五生丁耶。然則客轉賣時。當索何等價。如兒曰。一佛郎二十五生丁。伯爾曰。區區一小乳餅。乃值此數耶。曰。然彼大旅店中。有嘗至三佛郎者。曰。今日之事。若之功也。我之幸也。脫非若我。早以千蘇相許矣。若長於貨殖。聽頃者辨論之言。令我驚服。如兒曰。如能相持片刻。即八十生丁可得矣。曰。我心有不安耳。若視我家事。

如已事他日之利。當共分之。任其勞者食其祿。義無所讓也。如兒曰不然。語未及畢。伯爾止之曰。若不必復言。我已知之矣。爾父以爲若在我家。願我供億。若以歲入之利。與供億之費。兩兩比較。區區者安足道耶。明日立契後。當函告爾父。備言若功。供億之費。不必掛齒。頰。此後我家會計之事。悉以相委。兼理筆札。售一乳餅。卽以一蘇奉酬。語畢。顧麻里斯曰。我兒以爲何如。曰甚善甚善。父親此舉。先得我心矣。如兒謙讓不敢當。然心竊喜。一則樂於自見。一則以畧沾餘潤。可分家累。伯爾又固要之。遂不復辭。明日伯爾等赴旅店。早餐。客取阿藏格乳餅和葡萄酒少許。食之。盛稱其美。遂釋然於價昂之故矣。謂伯爾曰。製造之法。宜秘勿洩。僕役輩不可深信。此事於某無所損益。誠恐馳名之後。必有爭利之人。起而仿效者。利權在握。勿落他人之手也。餐後。同詣註冊官處立契。事畢而散。伯爾命於石礦側建乳餅房一所。屋凡兩層。下層分兩房。一作暖房。列什器甚備。一作烘房。設涼廚若干座。上層亦分兩室。軒暢精潔。一爲麻里斯室。一爲如兒室。各設床一。書櫃一。几

一石礦與園圃毗連。伯爾命擴其垣。盡圍乳餅房。窖房於其中。田旁有隙地。凡豬圈兔屋家禽塲皆在焉。伯爾以畜牛較多。乃就其地。圍新牛欄以居之。復就河濱。選草塲一區。租而用之。爲牧牛計也。馬爾脫以事繁不能兼理。雇斐理伯之妻爲傭。若奈脫專任乳油事。習其法甚精。更得其夫相助。措置益裕如焉。麻里斯勇健似乃父。加以年少氣盛。精力自倍。時而赴田中督率工作。時而入牛欄。拭理性畜。時而入乳餅房。料量器物。時而至草塲。檢視牛畜。百務營集。終日奔走無暇。暑伯爾又年邁。時患風痺症。率以田務委麻里斯。麻里斯身任數役。毫無倦意。如兒常居一室。專司買賣。客至。剖決如流。事具以啓伯爾。惟取裁決而已。伯爾與麻里斯稔知其精敏。故言無不從焉。冬日之夕。家人圍坐聽事。爐火騰燄。燈光燦然。朋舊亦至。各就案旁環坐。女子手執針黹。口說米鹽瑣屑。及閭里近事。男子則談耕穫。占豐歉。討論農學新法。客之數數至者。諸愛耳若萌。及郎培爾之子也。或天日晴和。及爾滿亦挈須若納。間一至焉。諾愛耳性厚重。不喜譁諧。請以讀書代

譚謹伯爾家故富於書。自入農會後。又羅致種種書籍報紙。誦愛耳披而讀之。興未盡。則莊誦古文辭數篇。須若納厭其寡味也。每至。輒以佛爾納小法國近世小說數冊。朗朗讀之。聽者忘倦。一堂之內。家人師友。情話纏綿。幾不知夜之永矣。及時鐘報亥。客興辭。乃分道而歸。時麻里斯任牧事後。除舊布新。煥然改觀。盡退劣種所留者。皆上上品。犢始。麻里斯精心剔抉。分別去留。牲畜中有稍不合格者。立卽出售。不使容留。恐謬種流傳也。伯爾知其子識解過人。輒傾心聽之。以故阿藏格牧場。名噪一方。鄉之人欲改良其牛種者。皆就而購之。牛欄爲之一空。求者紛紛。至不暇給。則昂其價以應之。阿藏格又闢一利源矣。一日麻里斯詣屠沽處核帳。途遇斐理伯之子。詫曰。爾豈賦閑耶。曰。我方投伍耳。曰。然則爾父曷爲不告我。曰。家父未之悉。我方作書報之耳。曰。阿藏格久不聞爾之足音。何也。曰。我何面目見人乎。如子之忠厚正直。不相菲薄者。能有幾人。彼若見我。必且揚我家醜。令我羞愧欲死。災悔餘生。豈復堪此侮辱哉。我父以盜獵故。至今尙在獄中。我頃者詣



獄辭別了不見憐。聞其語。皆怨望報復之言。恐變生不測。必遭株累。不如遠離之爲愈矣。曰爾直過慮耳。曰不然。情狀已顯。恐不幸言而中也。然事已至此。亦且聽之而已。所求於子者。我母生不逢辰。劇可憐憫。我入伍後。恐從此不復相見。明日請其來此一訣。且我自數年以來。卽有微賞。亦當親致其手。惟區區者。恐於事無濟耳。設有不測。勿以我父之故。累及我母。仍請留在君家。免其轉於溝壑。我即死於軍中。知我母不致凍餒。瞑目無恨矣。曰爾且勿憂。爾母在我家。必不至中道相棄也。雖然。爾何語之苦耶。曰子家有賢父。承義方之教。榮名歸之。身處極樂之境。安知他人之苦乎。如我者。羞見人面。畏聞父名。遇稠人廣衆。則低首吞聲。以避之。義爲人子。而衆矢集於所生。子獨何心。甯不愧耶。往事堪悲。生不如死久矣。言訖。嗚咽。兩人執手道別。麻里斯悵然而歸。具以語告伯爾。伯爾曰。善。爲我語斐理伯之子。其母遇人不淑。我意亦憐。安有相棄之理乎。此子幼無庭訓。幾蹈覆轍。憂患之餘。遂成令器。亦可嘉也。明日斐理伯之妻。以麻里斯書詣其子處。書辭甚簡。其

文曰。

仁兄足下。昨歸備述尊意。家父已允所請。望安心投伍可也。麻里斯頓首。

斐理伯之子得書已慰。遂行。阿蘇格田務日見繁昌。邑中亦陰受其福。既製乳油乳餅。用乳較繁。售乳者率得善價。欲售乳必畜牛。牛多則糞亦多。以之肥田。豐收立致。且鄉間庶務如枝榦指臂之相聯屬。故一興則百興。所需執役之人日衆。工價騰踊。邑中無窶人。無游民矣。惟斐理伯以嗜酒無行。特見擯棄。卽傭於人。亦不能久也。先以盜獵故下獄。及時期滿得釋。然卒不檢。遇金盡時。則遍走邑中。尋逐蹄跡巢穴。恣意搏擊。有所獲。輒市之以賣醉。惟守獵官培即及巡卒。邏察甚嚴。故不得逞。然心甚銜之。尤所切齒者。則郎培爾也。嘗以險語逼之。郎培爾笑曰。汝直狂吠耳。烏敢囓人。一日侵晨。郎培爾忽聞銃聲。馳往覘之。則斐理伯方擊一野兔也。讓之曰。汝甫脫繯。又復爾耶。眞不可救藥矣。步而前。斐理伯曰。速走速走。不然。死我手矣。曰。是何言耶。是何言耶。且語且前。斐理伯舉銃儻之曰。我已爾故不

得逞。切齒腐心。非伊朝夕。復仇之舉。正在此日。不速走。銃且發矣。郎培爾呵曰。勿爾勿爾。騰蹕而前。方欲執之。忽然一聲。已倒地矣。斐理伯亦自驚絕。兀立不動。口中喁喁曰。我亦不得生矣。然彼何相逼太甚耶。且我窮困無聊。一死何足惜乎。乃收野兔納懷中。由間道潛歸。旋取野兔並銃售之。得錢。入酒肆酣飲。飲時如見郎培爾臥地狀。聲數瓶。竟不得醉。斐理伯既自知不免。又窘乏無生趣。且洩忿後。心亦內愧。遂赴警察署投首。鄉之民赴工次者。途中見郎培爾僵臥於地。流血殷然。共昇至其家。時其妻正在庭中。聞之以爲受創也。呼而語之曰。郎培爾。何故至於此。握其手如冰。知其斃也。大慟仆地。昏暈幾絕。衆先昇尸於牀。倉卒間。人徒駭亂。有灌救郎培爾之妻者。有走告其子者。有通知及爾滿者。有馳報營兵者。未幾。郎培爾之子。狂奔而至。其母亦甦。母子相持大哭。正哀慟間。郎培爾之子忽收淚大呼曰。殺我父者斐理伯也。不報此讎。有如天日。奮身而出。適遇及爾滿。及爾滿慰譬之曰。尊公死於其職。行路同悲。子之復讎。亦固其所。然殺人者死。自有國法。刑

人之權不在我輩。幸從我言。少安毋躁。遂止。先是斐理伯之婦。以其夫既無行。若一無依賴。則饑寒窮蹙。勢將亡命求生。且夫婦分定。繆紆炊爨。理當任之。故雅不願與斐理伯異居。意謂貧賤相守。猶可稍戢野心。敝廬疏食中。保全當不淺也。自入伯爾家爲傭婦。晨興赴工。午歸作食。率以爲常。一日歸家。其夫尙未至。然斐理伯素放蕩。出入無定晷。亦不之異也。執爨如常時。忽聞人聲鼎沸。則巡卒至門矣。問斐理伯何在。婦駭絕。幾不能起立。實告曰。不知。衆卒搜捕殆遍。或發衾褥。或擊恒壁。竟無所獲。婦詰其何爲。曰。郎培爾在蒲槐爾遇害。衆皆疑斐理伯。故來捕之耳。婦曰。何由知我夫所爲耶。曰。斐理伯習於盜獵。盜獵者。手執凶器。情急時。往往出此下策。且斐理伯不嘗有報復之言乎。婦曰。此一時忿恚語耳。何足爲據。曰。汝袒護汝夫。誰則信之。其一卒曰。彼非不知情者。勿令兔脫也。遂共圍之。婦呼曰。我何罪。曰。汝良婦。不敢相犯。然未可去也。婦曰。伯爾候我久矣。可無往乎。曰。此易易耳。適有童子過其門。卒語之曰。爲我告伯爾。斐理伯之婦。不能赴工矣。頃之。有以

斐理伯自首報者。衆乃釋婦而去。婦終日在家啜泣。昏夜赴阿藏格道中慰俯首疾馳。惟恐人之相識也。既至門。猝遇馬爾脫。兀立不敢前。馬爾脫握手相慰。婦大慟。馬爾脫引之入室。伯爾亦至。稍定。婦乃言曰。生路絕矣。將自此匿迹矣。誰肯容我者。伯爾曰。斐理伯無行。不以相累也。婦曰。妾凶人之婦也。君仁人。故相容耳。一旦去此他適。必棄我如遺矣。伯爾曰。嫂在我家。正煩相助。他適何爲。婦曰。何其厚也。然君必受人笑罵矣。以妾觀之。不如舍此他適。惟請給一證書。爲求職地耳。西俗

凡求事者必出主人證。書驗明無過方可收用。伯爾曰。嫂勤於供職。深爲嘉悅。倘肯屈留。何懷去志。且嫂以不幸而罹困辱。何堪重以凍餒之憂耶。語次。復具述其子與麻里斯相見時語。婦聞伯爾之道及其子也。俯首沉吟曰。我兒知有此事。當若何羞憤耶。婦知伯爾無遺去意。遂以黎明赴工。昏暮歸家。請恐爲鄉人所見也。伯爾許之。明日爲郎培爾下筵之期。執紼送者甚衆。皆相顧嗟歎。及爾滿立墓前。先言郎培爾任事之忠勇。並慨然以撫孤恤寡爲己任。衆遂散。伯爾既不遣斐理伯之婦。鄉人皆諒讓。

之有相離者。伯爾曰。以夫之罪而及其妻。非義也。且彼固能自食其力者。奈何棄之。諾愛耳及爾滿皆聽其言。婦既匿不見人。久之人言亦息。惟耶培爾妻子素與伯爾相厚善。及時遂絕迹不至阿藏格。伯爾父子爲之悵然。然終不欲以私情害公義。待斐理伯之婦如故。且以耶培爾妻子新罹慘變。宜其怨痛若此。積久亦可相忘也。斐理伯之案。訖牘已具。從裁判所勸問。斐理伯從容就質。盡以實供。時耶培爾妻子亦在堂。斐理伯向之謝罪。所司以斐理伯非謀殺。係臨時起意。故從輕擬流新加來圖尼。法屬太平洋羣島之地作苦二十年。臨行請於官。許其妻詣獄一訣。妻既至。斐理伯曰。我無狀。累爾窮困終身。今日之事。自貽伊戚。且爲爾羞。豈不痛哉。然事已至此。雖悔無及。所刻不忘懷者。恐爾不免凍餒之憂耳。妻爲述伯爾慰留語。斐理伯太息曰。彼義士也。曩以彼才出我上。因愧生忌。今知罪矣。爾其爲我謝之。我今遠行。知爾有一棲之托。心便貼然。雖然。爾其怨我乎。曰。妾不敢怨。所惜者君悔過太晚耳。曰。我兒以我故蒙羞受辱。意亦憐之。別後。爾母子必時以近

狀告我勿相忘也。我從此逝矣。夫婦握手而別。未幾斐理伯首途。由兒哀鳥。大西

### 第九章

法制國民年滿二十。皆隸兵籍。習武事以備用。時麻里斯已及歲矣。馬爾脫知其子且遠離。神色悽愴。伯爾雖強作歡顏。然素依其子如健僕。如密友。膝下之歡。殆無論矣。今則一別三年。還鄉之日。凡事都非。思之輒悒悒也。麻里斯如兒須若納三人者。皆愀然不樂。須若納以其父與郡長及邑之總議員。即租界之工部局總董也相識。謀以麻里斯病肺狀。援例請免。然恐麻里斯聞之勿善也。故秘不使知。及事洩。麻里斯語其母曰。我誠實人。奈何許之。執兵以衛國民之分也。兒體壯力強。必成勁卒。托故以求免。則終身之玷矣。母聞而壯之。然知其意不可回。淚潄潄下。麻里斯曰。母何泣爲。兒此行亦殊憫憫也。身雖在外。此心仍依膝下。惟當互通音問。以慰相思耳。俗例分闈之日。法例國民以二十年爲兵期。三年須入營。餘時作預備兵。數大者入營一年。即作預備兵。

諸當入伍者。其冠皆標號緣邊以自異。且縱酒酣飲。志氣揚揚。積習相沿。以爲表忠愛之忱耳。豈知浮囂之氣。不足以爲勇。惟鎮靜者斯爲真勇耶。又國法之所以人人而兵之者。非不知兵凶戰危。人情所苦。然謂父母之邦。人人有保守之責。晏然無備。敵且生心。故必乘年少之時。練習成軍。然後可以禦外侮而保疆土也。而恆人之情。非其性之所好。而自願投効者。一聞徵兵。卽不免離鄉失業之怨矣。麻里斯深明大義。分闔日安。閑鎮靜於流俗事。一無所與。點驗已畢。卽遣回阿藏格。耕牧如平時。求替人以自代。離家後。請如兒絲理家事。且代承歡。以淡離懷。行有日矣。乃赴親知家謁別。旋接路憑。即設奉遣至法國南境戍所。充防守兵。將行之前夕。走辭及爾滿。及爾滿已他出矣。須若納延之。入問曰。子明日啓行乎。曰然。曰子樂於遠戍。殊令我輩傷懷也。曰非此之謂也。分之所在。其可逃乎。曰子壯士。自愧弗如。今姑勿論。但得有還鄉之日。斯亦已矣。曰是何說也。曰父親嘗謂抽兵之法。易使年少之徒。離田畝而入城市。此其弊耳。曰不然。舍阿藏格田家之樂而入



塵囂。非病狂人不至此矣。曰是固然耳。雖然子有志士也。教品勵學。入伍後。必蒙顯擢爲伍長爲曹長。在指顧間耳。以子之才。而又樂乎指揮號令之事。雖上將無難焉。夫戎服佩劍。肩荷經章。俗情所慕。然不願子之效之也。相愛之厚。何如我輩。一別三年。亦已久矣。幸早還鄉。以慰饑渴。時及爾滿適歸。聞須若納語。曉之曰。爾其勿疑。麻里斯生長田間。阿藏格其所樂也。戊期已滿。安有不歸之理乎。以問麻里斯。麻里斯曰。先生實獲我心。須若納曰。我意慰矣。別後興居。務以相報。及爾滿笑曰。以弱女而受武人之書。非所宜也。曰麻里斯豈武人耶。曰然則何等人。曰直麻里斯而已。乃握手而別。麻里斯詣戍所。軍中一切皆有程限。如官樣文章。絕無變化。演操執役外。一無所事。初客異地。城中無相識人。性又不喜入酒肆。天氣嚴寒。又不能遊行郊野。麻里斯鬱鬱不自得。遂絕跡不至城市。終日在營中以讀書作字遣悶。貽書須若納。踐臨別時之約也。並作家書報近狀。書辭甚長。備言軍中離索之苦。求其家人作書酬答。令遊子讀之。如共家庭之樂。家人得書欣慰。冬夜

在聽事出書示客。共謀分曹輪答。以慰其意。麻里斯既懊悶無聊。則請於軍中給養官。軍中分設食物之官助俵散。官大喜。許之。復其役。是時麻里斯得一消遣法。意稍安。天氣和煦。又得遊覽田野。益欣然意得矣。定例。遇收穫時。許軍士雜治田務。麻里斯遂往富農家助役。富農驚其才智。深相結納。麻里斯日必一往。遍察一切種植法。如淡巴菰。即烟草玉黍。即珍珠米蜀黍。即高粱等。皆非故鄉所產也。淡巴菰。此物用法有三。或吸或嗅或嚼。

法國惟數郡種之。以西歷三月下種。初用堆種法。用腐爛之土及糞料堆成。或含有益實名曰尼谷。低地惟水手破工。器通溝。匠及住居。專講之地者。用少許有益服之。過度令人昏亂。腦力衰弱。例禁私賣。專由公家發售。至五月莖長七八生的適當。乃移植土上。一月後。芟其頂。令葉速長。九月收刈。刈畢。乾之。乃售於官。玉黍以四月末下種。培土。芟頂去草如常法。九月收刈。去子之法。或以機器。或以鐵齒板刮取。人畜皆可食。其稈之用甚繁。法國北境數郡。不甚宜種此物。間有種者。專飼牲畜。土人率取鮮者。藏窖中。冬季取用。故雖草枯之時。牲畜亦得鮮食矣。蜀黍與玉黍相似。稈首有若羽形者。可作帚。其實可飼鷄豚。

獨黍之別種。本中國產。含汁可作糖及醇。是地畜牧之業。以家禽爲大宗。所畜者如鵝鴨及吐綬鷄。頗繁庶。貪食無厭。大爲芻穀之害。麻里斯見之。始知伯爾於家禽場中。屏諸禽而獨畜鷄者。職是故也。一日麻里斯在野。途遇一鄉人駕犁車。隨以吐綬鷄一隊。舉止軒昂。鄉人下田翻土。羣鷄鬻入畦中。見蜘蛛蝸牛白蟲等物。啄食殆盡。於是麻里斯又知吐綬鷄之有功田務矣。伯爾兄愛顛在巴黎大肆中。執事三十年。主人倚之如左右手。及時忽易主。遂謝遣愛顛。時愛顛子女年已長。其女法皮納學成。以教授餬口。故家累漸輕。然家計尙未裕。自分銖積寸累。再閱數年。卽小康矣。不意中途罷廢。生平志願。如夢一場。以是戚戚無歡。儉眠食爲之不適。其妻貽書馬爾脫。道其夫抑鬱狀。伯爾思有以遣之也。招之至阿藏格。愛顛躊躇再四。以伯爾固請乃許。兄弟兩人操業殊異。遂爾乖離。相別數十年。一朝團聚。樂可知也。愛顛在鄉間。飽受日光空氣。體益健。無何歸思忽動。謀重至巴黎。覓生計。伯爾以其兄畧有積蓄。撙節用之。便可資以終老。適附近有美宅一區。宅外

有園果樹成林。其實纍纍。伯爾道愛顛觀之。問曰。兄意云何。曰。甚佳。令我早得之。便以此爲安樂窩矣。曰。此待價之屋也。兄其有意購之乎。曰。既不能居。雖購何爲。曰。兄久於巴黎。宜其不知鄉居之便利也。曰。我女以教授爲業。若居鄉僻。誰肯相從哉。曰。恐未必爾。曰。弟戲言耳。曰。纍者嫂等來我家。法皮納與須若納甚相善也。須若納請從受業。法皮納許之。至今須若納尙憶前言。故及爾滿。弟走書相肯。倫法皮納肯踐前諾。修脯當不菲。日後奩金之費。可取給於此矣。曰。我女嘗爲我言之。某未之省。今聞弟言。始知非妄。不日當以書問之。幸而見從。賤夫婦便當偕老於此。鄉居雖僻陋。然得屏除煩惱。亦甚樂也。未幾。法皮納答書許諾。母女遂自巴黎起程。廡里斯在軍一年。擢伍長。旋以患病乞假歸。至則愛顛移家已三月矣。遊子還鄉。親朋話舊。樂可知也。無何。藥極悲來。變生意外。先是如兒居巴黎日。病幾不支。及至阿藏格。吸引清氣。節蓄精神。多方調攝。疾漸瘳。夏令溫暖。健快如無病人。冬寒之際。咳嗽咯血。家人憂悸。已亦無恙。然肺體益弱矣。至是感受山谷間。

寒霧宿病復發。醫者決其必死。謂伯爾曰。此子生長城市。遂促天年。可悲也。凡肺弱之人。當習勞動。遊清曠。食品宜精約。如田舍翁。今乃閉之於羣塵湫隘之中。雖壯健人。猶不免血氣衰竭之症。況氣體素弱者乎。方其始至也。我見之。意其不久且亡。幸居是鄉。已延六年之壽矣。脫令生長田間。何至遽夭耶。如兒竟不起。時麻里斯歸家甫數日耳。麻里斯素友愛如兒。雖機密事。必盡吐露。有所謀。輒就商決。如兒亦爲之盡力。如造乳餅。議貨價。繪屋圖。置商標。皆其功也。麻里斯念如兒既死。誰復代如兒者。則哀痛不自勝。及念幸爾還鄉。屬纊時。猶及一訣。下窆之日。復得躬與執紼。似冥冥中有默相之者。則又禮謝上帝。感極而涕矣。愛顛夫婦雖見事久。然猶悲泣無已。愛顛既閒居。無可自遣。終月盤桓墓側。以寄哀思。伯爾憂之。以商於麻里斯。麻里斯曰。伯父勤幹人。閒居無俚。非所宜也。曰。計將安出。曰。從兒不祿。盡以伯父代之。我家自造乳餅。往來會計事。日以紛繁。非有專職。不可得。伯父任之。在父親既收臂助。在伯父略得薄俸。積畜亦可稍裕。庸非兩便乎。曰。善。

我見不及此質之我見。諒所深願。子職父代。見職如見子。亦足寄思子之情矣。麻里斯病良已。遣返軍中。未幾移守阿爾及耳。麻里斯以離家愈遠爲之不怡。然念此行得見異鄉種植之法。計亦良得。既至阿爾日。登岸迤邐至蒲法里克。所城建米的雅平原之上。以饒沃稱。植物繁富。一望皆葡萄園。創種已久。歲益新種。方興未艾。其早生蔬果。有若豌豆蠶豆青豆百葉菜。以冬月出售。遠方皆仰給焉。花則有玫瑰茉莉月下香洋綉球等。異香馥郁。如入尼斯城。法國阿耳麻里斯間出遊覽。但見綠樹成陰。街衢精整。風景一如故國。前五十年。水道不通。鬱濕釀毒。兵民之死於熱病者太半。乃爲之鑿溝渠。栽樹木。水土之佳。遂爲各屬地之冠。乃知人力所至。固無不可爲也。居無何。復自蒲法立克移守勃里達。正其地橘熟時也。麻里斯新擢曹長。遂以書抵家。侑以橘一簍。書不備錄。錄其首數行。

秋盡冬來。想我鄉已雨雪載途矣。此間和煦如春。秋雨一至。草木盡綠。萬樹著花。不閱記時書。幾疑在五月間矣。既曰如春。又曰五月。西國以春分至夏至爲春季也。男新擢曹長。漸覺

行間之樂。特以報聞。藉博一粲。並寄甘橘一篋。請嘗試之。勃里達橘園甚多。皆自阿細拉。發湖北山口建閘引水。匯成烏代計皮爾河。乃引河水以資灌溉。採果者連蒂摘下。鋪棕席上。旋有婦女去蒂投筐中。運入棧房。薦以草席。逾五六日。果乃熟。區其大小。分別出售。種橘之利甚豐。每一揆克打兒。至少可得銀八百佛郎。尙有不止此數者。青果亦盛。不日可採。昔年男遊至加納城。及爾滿先生曾論及之。今者親歷其境。益信所言之不謬也。斐洲青果樹比之撥羅文斯。其大小之懸殊。猶我鄉胡桃樹之於榛樹矣。聞加皮里有極大者。他日如有機緣。當一往觀之也。

書尾畧述軍中日行事。并詢故鄉近聞。結以問好語。麻里斯居勃里達數月。心頗安之。謂且終戍於此矣。未幾。南土有警。奉命平亂。遂移營。麻里斯自北而南。沿途流覽。始知阿爾及耳土地之饒畧。施人力。便奏奇功。記此土歸附未久。遂爾改觀。他日太平無事。人力已至。收效當倍蓰矣。阿爾及耳植物。以穀類葡萄海棗浮木

樹阿爾發淡巴菘爲大宗。而以穀類爲尤多。占三兆挨克打兒。內兩兆三億七萬六千爲亞刺伯人所種。皆瘠收。以亞刺伯人皆用古犁。入土不深。且不去莠草。不加肥料也。其爲歐人所種者。收穫較豐。然比之羅馬全盛時。相去何止霄壤耶。穀類之中。硬麥多於嫩麥。大麥尤多。佔全地之大半。土人率取以餵馬。蓋代雀麥之用也。阿爾及耳葡萄之盛。實始於法國南郡葡萄蟲爲患之時。初以釀酒不佳。無人顧問。近則精益求精。法民皆受其沾溉矣。林木一類。以浮木樹爲最多。銷運最廣。此樹之皮。卽浮木。即軟木。其用已顯。昔年阿爾及耳道路阻塞。艱於轉運。且亞刺伯人率有焚林之舉。或因疎忽所致。或因通道縱火。故林木率棄於無用。今則此弊已革矣。德爾平與隆哈拉波沙之間。有高原焉。遍地皆阿爾發草。植物科。草有纒質。可造紙。可織布。種草之地。占五兆挨克打兒。而萃於凹倫省之薩意達左右地。有鐵道專運此草至阿爾助海口。由此入歐洲。其入英國者尤多。高原之上。羊羣亦盛。牧羊者多係亞刺伯人。彼固游牧種也。收地遼闊。可畜羊二十兆口。足以果



法民之腹矣。何必歲購德國之羊乎。及南土事平。復移守拉哥挨。沙漠中沃衍地也。源泉灌注。草木暢茂。而以海棠樹爲最盛。爲出口貨一大宗。海棠樹之下。雜種穀草果蔬。其類繁多。自格致精工。藝盛。沙漠景象爲之一變。其泉水之將竭者。則滄而通之。其無水可得者。則鑿自流井。穴地至數十百丈不等。以水能上湧。以澆爲度。井之周圍。以鐵木防土窳陷。以溉之。於是沙磧之場。皆變爲水草之區矣。麻里斯流連風景。愛其山川之秀異。物產之豐盈。民風之疎野。然行役已久。鄉思漸動。默計瓜代在邇。心竊自喜。未幾期滿。撤回。適返阿爾日。同行軍士中。有名依勃刺罕者。充斐洲遊擊兵。而有癩。額已缺。眉亦半削。麻里斯在拉哥挨時。數與相遇。以其貌之異也。故特識之。依勃刺罕亦一見如舊。途中與麻里斯並肩行。時與偶語。麻里斯問面上之癩。得非傷痕乎。曰不然。得此已久。旣無父母。又無故舊。幾不知癩之何自來矣。曰一何孤耶。曰然。我以流落被拘。入孤子院贍養。不知父母何名。並不知己之何名也。入院之日。適逢聖方濟各誕日。故人皆呼我爲方濟各。及年長入伍。人又呼我爲依勃刺罕。我所

知者如是而已。自念少年孤苦。安望將來。豈如爾具慶之下。有父母門閭之望乎。爾今還鄉。骨肉團叙。家庭之樂。且羨且嫉。且爾農人之子也。鷄犬桑麻。重見故鄉風景。不亦快乎。曰我家在巴爾維耳村。曰巴爾維耳耶。曰爾豈識之乎。曰是殆鄉者經歷之地也。耳熟其名久矣。曰村建高阜之上。迤邐而下。達於山谷。谷中有溪焉。溪濱草場豐美。風景絕佳。曰我所見村落。類此者蓋十八九矣。曰然則爾一東西南北之人也。何以云生長孤子院中乎。曰此吾被拘後事耳。曩者漂泊時。足跡殆遍法國矣。曰僕僕何爲。曰始吾幼時。混跡無賴輩中。此種無賴如中國之江湖流丐口說休管轉徒乞食多係奧國猶愛姆人。故名曰滿愛米與其人髮黝而澤。異言異服。暮宿帳幕。其酋長手執巨棍。指揮徒衆。男女皆唯唯聽命。所至之地。必擇無人之處而宿焉。否則人且逐之。嗚呼慘矣。彼乃教我演技。骨節皆解。教我舉步。屏絕聲息。復令我自竇中出。竇窄甚。僅容一狸。且以石子納衣囊中。衣上有鈴。令我探囊取石子。不幸而作聲。則鞭箠交下。噫。黃口兒乃教以穿窬之技耶。予億極思遁。然監視甚嚴。卒不得脫。一夕謀至僱

地行劫。予大聲呼警。彼不得逞。予遂乘間逸去。匿樹林中。竟夕不敢出。天明。腹枵甚。蹀躞而行。覓人家乞食。忽遇遊客一隊。數車相隨。車式絕異。馬皆疲甚。殿以男婦數十輩。如執役者然。予趨前與語。彼不能解。蓋予久與無類輩爲伍。習蒲愛米痕語。不能操鄉談矣。不得已思獻技以動之。乃騰躍超距。作諸般戲。客驚歎。止車相詰。予解其意。然不能答也。復作腹饑狀。示之。客授予麪包。問曰。爾似流落人。亦願相從乎。予乃隨之去。始知客皆賣技者流也。徒黨數十輩。其魁渠曰耶伽倫。呼所屬曰工夥。遇之甚厚。或有患病者。苦心調護。如慈父焉。予窮困久。至此得少佳趣。遂一意習操。縱轉換之術。術成。登場獻技。四座稱歎。乃挾技遍走南方各邑。無何。耶伽倫患中風症暴卒。徒黨四散。予後流落無所歸。適遇邏卒。拘入孤子院。養贍。問習耕地之法。予身無民蹟證書。注例國民生必向鄉長處立據有問予生於何時何地者。不能答也。及年已長。遂投効入伍。生平大畧。盡於是矣。麻里斯既見癡痕。又聆顛末。若有動於中者。曰。我能知癡之何自來。并知故鄉之所在也。復細

詰之曰。爾在家時。非名愛米爾子。依勃刺罕凝思半响。曰。愛米爾耶。似聞其名矣。然迷離愴恍。不能斷也。曰。若奈脫非愛米爾之母乎。若奈脫爲培爾那氏。愛米爾亦培爾那氏矣。依勃刺罕復默然良久。曰。若奈脫我母耶。其然。豈其然乎。曰。爾不嘗至諾愛爾之壘乎。曰。諾愛爾非蒙師乎。曰。其人魁梧。面櫻色。嚴厲無笑容。曰。非手執長桿。口講指畫者乎。曰。然。曰。爾無所據而多方詰我。莫非戲我耶。令我心中將疑將信。若存若亡。殆不可也。曰。爾試思之。我頃者連據巴爾維耳。愛米爾若奈脫。諾愛爾等名。爾皆觸於耳而感於心。此必非無故而然者。然且迷離愴恍。不能自決。并不知癢之何自來者。無他。年遠故耳。曩者我鄉有無類輩。嘯聚其地。若奈脫之子。違母命往觀之。遂被迷拐。其面上之癢。則玩戲墮地。觸階石所致也。以我所知合之爾言。其爲若奈脫之子。殆無疑矣。且爾今者。造回故國。可一見若奈脫。果爲其子。骨肉天性。豈有不相識之理乎。曰。然則我母尙存耶。家於何地乎。曰。備我家久矣。眞賢婦也。今者還鄉。得令母子有團圓之日。豈非大快乎。曰。然則我父

尙存乎。曰爾被拐後。爾父即棄世。爾母既寡。無以爲生。故我父招之入我家。爾母感我父之恩。自入我家。心力畢竭。可謂能報德者矣。麻里斯遂作書抵家。報起程。日不及歸期。欲偕依勃刺罕先至巴爾維耳也。既至。依勃刺罕覽其地鄉塾。禮拜堂。鄉長署。皆如舊相識。既而見一小屋。盤桓不能去。似卽若奈脫與其夫舊居地也。麻里斯望見里門。喜極而狂。頽然欲倒。乃與依勃刺罕並肩立。依勃刺罕問何故。麻里斯遙指田莊。曰在咫尺間矣。曰非阿藏格乎。曰然。曰門閭在望。盍速歸。謀歡聚。外人不當相擾。我且憩此樹下。少頃煩見喚也。麻里斯馳抵家。甫入門。家人大呼麻里斯歸矣。伯爾夫婦馬里米賽爾若奈脫皆至。次第接吻。各悲喜交集。曰麻里斯從此不復離家矣。馬爾脫撫而語之曰。我兒長途勞頓。得毋饑乎。卽語若奈脫。速具餐膳。若奈脫曰。唯。急往廚下宰鷄烹蛋。麻里斯曰。兒此行頗不孤。敝有一同袍。自拉哥揆結伴至此。今宵當下榻我家。明日卽起程也。伯爾曰。諾。其人安在。遂與麻里斯詣依勃刺罕所在處。途中麻里斯密告頗末。伯爾見而謂之曰。客

與我兒誼屬同袍。今夕請留敝舍。器具不腆。爲客洗塵。且我兒此行。賴客結伴。以破岑寂。今夕之樂。亦以得客爲歡也。客至伯爾家。登堂暫息。時若奈脫正在布席。覆席之衣。潔白無纖垢。伯爾呼若奈脫曰。麻里斯偕一同袍至此。爲具刀七一分。客聞若奈脫之名。心爲之動。若奈脫亦神色一變。伯爾問何故。若奈脫曰。無他。頃見客來。異其貌似我兒。今知非也。作食如常。席旣具。麻里斯肅客坐。故令與若奈脫相對。席間家人爭問麻里斯別後狀。笑語雜沓。奚暇與客周旋也。已而伯爾取美酒一瓶。遍斟坐客。舉觴爲麻里斯及客賀。長途無恙。旋問客何名。客曰。依勃刺罕。曰。此亞刺伯人名耳。曰。我入伍以前。曾入孤子院。人皆呼我爲方濟各。曰。方濟各名也。敢問何姓。曰。無家之人。姓於何有。曰。然則客乃流落而爲人所得者乎。曰。幼時與無類輩爲伍。慘遭凌虐。殆被拐也。語次。氣促色變。伯爾問癡自何來。曰。由來已久。不知所自。若奈脫起席。嗚咽不能作聲。呼曰。我兒愛米爾。客亦呼曰。我母。母子兩人。各悲不能仰。互相接吻。母曰。不見二十年。自分此身且永訣矣。安知有

今日乎。又願麻里斯曰。生我者爾父也。還我兒者我子也。盛德之舉。出於一門。此恩殆難圖報。惟願天之福君家。如君家之福我而已。

### 第十章

麻里斯征塵甫洗。即詣蒲槐爾及爾滿與須若納相待已久。須若納聞麻里斯至。躍而出。驩抱示愛。兩人契闊久。麻里斯訝其長大。非復昔年婉孌氣象。乃斂容稱謝。須若納曰。爾何拘牽。乃爾得非沾軍士之習乎。曩者不如是也。麻里斯嚴重如故。不敢以爾汝相呼。曰賢妹。昔在髫齡。今爲閨媛。可相比乎。須若納曰。今異於昔者。衣服差長耳。相愛之誠。何分今昔。我視爾如兄。爾宜待我如妹。願謂其父曰。麻里斯不當如是耶。及爾滿曰。否。童年輕狎之舉。非所施於弱冠之交。麻里斯其知之矣。他日爾許嫁。後如有少年相爾。汝相驩抱者。良人見之。必不悅也。須若納曰。若而人者。兒不願嫁也。一日適人。便絕朋友之權耶。及爾滿曰。此童騷語耳。朋友之權。不在褻狎也。須若納曰。似也。然如父親之意。必令我曰。麻里斯兄。別來無恙。

否。母乃煩重與。麻里斯遂告歸。伯爾爲道阿藏格近事。知田事蒸蒸日上。牲畜無劣種。乳油乳餅。名噪遐邇。伯爾曰。予老矣。爾當綜理家務。麻里斯曰。唯父親才高識廣。諸事當稟承而行。時米賽爾年亦衰邁。不能服勞役。專任發運乳餅事。更以若奈脫之子。代米賽爾之職。若奈脫之子。即愛米爾也。然家人仍呼曰依勃刺罕。先在孤子院習耕地法。既代米賽爾盡展所長。性又勤敏。在伯爾家未久。居然一幹僕矣。愛爾長子挨得里恩。先在商業學校肄業。學成。入某牙行執事。其行規模絕大。地球各國。子店林立。挨得里恩居南美洲兩年。因得遍遊巴西亞金丁二國。地及時至巴爾維耳省。覩麻里斯告以田莊修改諸事。及乳餅房營建法。甚悉。一日挨得里恩在伯爾家午餐。餐後啖乳餅甚佳。語伯爾曰。若此乳餅。嗜者必多。曷不售之外國。以廣銷路乎。曰。子戲言耶。曰。非也。彼勃里及加洗培乳餅。出口者且纍纍矣。今阿藏格乳餅。卽不能過。何遽弗如乎。伯爾曰。其何以售之。將令我離家遠出乎。曰。伯父誠法國人也。我國處上腴之地。五穀果蔬。繁富無比。又得阿爾及



耳及突尼斯兩地。北境地凡寒熱兩道之物產兼而有之。其品皆出他國之上。無如國人憚於遠出。遂致貨物滯銷。利權外溢。英德之民則異是。買客入出。所至如歸。雖蠻夷之地。猶必探其食用嗜好之所在。而盡力以應之。尤可畏者。彼知外人樂得我國之貨也。仿效假冒。無所不爲。既奪我國之利權。又使外人議我物產之劣。是兩損也。伯爾曰。作偽之人。奈何勿禁。曰。遠在異國。有何人爲我訪察。其何以禁之。卽如向巴納之葡萄酒。卽香餅酒。出於法國向巴納地。卽以瓜棚克之火酒。其地名之香餅。卽向巴納之標音。名馳遐邇者也。德人雜以蕃薯酒。仍名之曰向巴納瓜棚克。以其價之賤也。故求者紛紛。其計不亦巧乎。麻里斯曰。爭利如此。其何以禦之。曰。無他。謬巧。惟在商人勇決改爲。我以貨往。不可待人之來。又當使我國之貨。無一劣品。其庶幾矣。嘗聞製造家之言曰。此貨僅可出口。意在以劣貨售之外人也。噫。誤矣。法人通病。視外人如醉睡漢。豈知智巧之人。所在多有。我國工價。昂於他國。故物價不得不貴。物既貴矣。可復攬以劣貨乎。且法國葡萄之盛。地球各國所共聞也。而封德奈勃羅

之白葡萄。尤甘美可口。宜我國之獨擅其利矣。豈知他國亦仿而種之。且不出於西班牙意大利。而獨出於不宜種葡萄之比利時。不亦異乎。伯爾不解其故。揆得里恩曰。露種之葡萄。故不宜於比國。用密室種之。則熟矣。比國煤價極賤。乃建極大之房。專種葡萄。燃煤取煖。葡萄大熟。四季不斷。其歲輸於法國者。不知凡幾也。不獨比國爲然。即英國之奴爾曼特島。亦用此法栽種。而以虬賽島爲尤盛。由此觀之。我法人可不加之意乎。揆得里恩在巴爾維耳。已三星期矣。乃與耶培爾之子佐治航海至冥。時佐治謀遊覽英國各大園圃。歸法後。謀再至安社附近之種秧家。苗發種秧盤桓數月。然後旋里。先是佐治數與阿藏格夜集。及其父爲斐理伯所殺。遂絕跡不復來。然兩家交誼如故也。斐理伯之婦。亦曲意自持。望見佐治。卽遠而避之。久之。佐治意稍解。復往來阿藏格。然年已二十八矣。頗有納室意。謀以橐中金。以賤價購鄰邑郊外隙地一區。建屋治種秧術。以及爾滿相待之厚也。就決可否。及爾滿則大韙之。勸以爲建後卽納室。佐治久屬意於伯爾之女馬里。因

央及爾滿作伐。及爾滿允之。伯爾素器重佐治。見其事母孝。他日必爲克家子。既聞及爾滿之請。商諸妻女。欣然許諾。訂於半年後完婚。庶指爾時。佐治可旋里矣。麻里斯以妹得夫。婿爲樂。請於父。盡以餘資供奩金。令無事畜憂。伯爾以麻里斯婚年在即。欲留其半以與之。不之許也。麻里斯曰。兒殊不作求偶想。伯爾曰。今時則然耳。不久必思之矣。凡爲農夫者。內助爲要。室有佳偶。可以博驩娛。破孤寂。日操糲糲之役。夕謀琴瑟之歡。故農家之子。婚期較早也。爾篤於同胞。願我從豐奩贈。我不忍違爾志。惟自茲以往。所入之利。當與爾分之。如合夥可也。麻里斯曰。今家道方隆。何更張爲。父親旣爲阿藏格之主。卽終其身可矣。我安我素。不願合夥也。未幾。佐治歸。至所購郊外地相宅。則見新屋巍然已矗立矣。屋外立寒溫煖三種密室。乃及爾滿所建也。及爾滿以郎培爾死於非命。又以馬里與須若納自幼相契厚。故以此報之。成婚之日。禮文繁盛。禮拜堂中。香花妍麗。燈燭熒煌。賀客填集。幾不能容。陪婚者。麻里斯須若納也。麻里斯年少氣盛。神彩煥發。須若納纖弱。

生動衣華服。帶高冠。笑逐顏開。若以有事爲榮者。先是佐治願得須若納爲陪婚女。以其爲舊主人之女。不敢瀆也。旣而須若納以自請。故與立焉。歛錢之際。日婚配

賀客之錢以充善舉

須若納握麻里斯手。出錢囊授賀客。兩人年貌相若。真天然佳偶也。惜

門第懸殊。無由相配耳。禮成。及爾滿張宴家園。款賀客。及夕。開跳舞會。樹上遍懸

色燈。夜分而散。馬里旣嫁。阿藏格爲之寂然。馬爾脫惆悵尤甚。麻里斯見其母子

不能自遣也。輒語之曰。盍駕車一見馬里乎。母子欣然便往。每至。則見佐治灑灑

移植。無倦容。馬里結花球。花籃。花冠。勤勤婦職。一如其母子在阿藏格也。聞馬爾

脫來。夫婦含笑驩迎。越一小時。始握手而別。無何。伯爾入城赴農學會。常例。巴黎

歲以二月舉博覽會。先期由各邑農會宣布會長。故伯爾與及爾滿赴會也。語次

及爾滿謂伯爾曰。君家牡牛。頗善孳生。歸途當一往觀之也。旣至阿藏格。呼麻里

斯同往牛欄。出牡牛於庭。諦觀之。果佳種也。麻里斯曰。誠然。我索癩求疵。竟無所

得。及爾滿曰。本無癩疵。雖求何益。曷不赴會呈覽。必受上賞也。麻里斯曰。我一小

農夫耳。敢與大家爭勝乎。曰操評隘權者。但視牲畜美惡。不問境地之貧富。何分大小農乎。爾勿過謙。其加意調養。令外觀益美。入會保無失也。麻里斯從之。乃詳報會中。屆期導牛入會場。評隘官歡其純粹無疵。既爲同類之冠。又爲會中羣牛之冠。賞以花紅兩分。會畢。得與盛宴。農部大臣欲獎以寶星。麻里斯歸功伯爾。請移獎之。畧述乃父治農之精。稱其知識過人。足資矜式。有功鄉里不淺。區區一牛。固不必論也。大臣曰。爾善則歸親。誠堪嘉尙。且從爾言。以成爾美。不久爾必以此受賞矣。麻里斯稱謝。會中人有請以重價購麻里斯之牛者。遂售之而歸。甫抵家。急出錦匣獻諸父。曰此農部大臣以賜父親者也。伯爾曰。賜我耶。敢匣視之。則寶星也。曰非分之榮。實出夢想之外。雖然。牛之茁壯。爾之功也。我未免掠美矣。麻里斯曰。父親曷爲斯言。伯爾終不知己之得獎。乃從其子之請也。麻里斯在巴黎。日與諸農家討論。深悉公司之益。及歸。商於及爾滿。請建農業公司。遂於某夕集村農而告之曰。請君購致肥料。如鈣養燐養即骨。確養等。諸多窒礙。所用器物。半皆

苦慮。於心得毋怨乎。衆曰然。諸君之怨。固不足怪。我家亦復如是。今有一策焉。能使我等以賤價得精貨。亦願聞之乎。衆問何策。曰我等散處鄉間。即有所需。爲數無多。大抵委經紀轉向商家訂購。而商家不盡可恃。往往以質薄力弱之肥料。混售圖利。我等知其僞也。欲加察驗。又苦煩費。輒廢然而返。此無他。勢孤力散之故耳。千八百八十四年。國家定律。許各業立會自保。區區此心。竊欲仿設農業公司。與會者歲輸佛郎一枚。以助公費。會中共需肥料若干。并請公司代向信義商家訂購。爲數既多。其價自廉。又省經紀之費。又得化學師察驗優劣。其利不已多乎。且不獨肥料也。即一切種子器具。亦從此例。諸君以爲何如。衆鼓掌稱善。皆願立名。囑諾愛爾訂立規條。巴爾維耳之農業公司。實昉於此。衆推及爾滿爲會長。及爾滿以讓伯爾。衆固請。乃許。自是會中所用肥料。皆已經化驗之品。其費較曩時省百之十五。而肥田要品。如淡氣磷鉀等物。其分劑始得確算矣。耶培爾長子斐理格斯。海軍步隊兵也。在營十年。拔曹長。得功牌。及時告歸。歸之明日。偕其母至

阿藏格寒暄畢。母問斐理伯之婦安在。伯爾有囁嚅狀。又問曰。得非在君家乎。曰。然。曰。爲我語之。來有事相告也。斐理伯之婦正在乳餅房執役。以爲伯爾召己也。趨而出。及見郎培爾之婦。兀立不敢前。婦呼曰。嫂其無怖。靈以先夫遇害。私心忿怨。不免遷怒於嫂。并恨伯爾之容嫂於家也。今知罪矣。一朝之忿。幸垂宥焉。且我之所以得見我兒者。其誰之功耶。語至此。戛然而止。徐曰。我兒自新加來多厄來。此自能相告。其詳當勝於我也。斐里格斯曰。我營於半年前。奉撥十五名防守蒲拉曷附近礮臺。其地風景枯寂。所見者惟客民及土番而已。客民皆流徒罪人。公家以其忠謹。優給土地。土番弱則爲奴。強則爲寇。殺人無畏忌。是時復有蠢動意。巡撫知之。飭防軍戒嚴。已而竟無事。故備漸弛。一夕客民馳詣營所報警。曰。土番結隊而來。意將劫奪礮臺。頃者殺戮客民。焚燬房屋。我逃遁得免。然追者且至矣。其速戒備。毋忽。我軍嚴兵以待。時土番已至。俟其近也。開銃擊之。應聲倒者甚衆。土番知有備。勢稍却。以鐵箭形如箭用其端有鐵刺投我軍。我軍奮力抵禦。受傷者僅兩

人塵戰兩小時許。土番見勢不敵。遂退。我軍慮其設伏也。嚴爲之備。天明。知已遠去。則見礮臺前殭尸遍地。予恐穢氣釀毒。急命鑿大溝埋之。忽一土番從羣尸中躍起。投鐵箭。客民呼予曰。鐵箭來矣。語次。以身蔽予。予賴以無恙。急用銃頭刺土番斃之。然客民亦中鐵箭傷。已倒地矣。予昇之入營。盡力醫療。然受創甚重。竟無生望。但聞號痛聲。若以速死爲快者。予爲道感激意。并詢其名。爲詳報地也。客民曰。予斐理伯也。罪悔餘生。今頃刻盡矣。他日歸國。幸報我家。予雖無狀。爲妻子羞。聞予死難。或下敷行之淚。未可知也。予咤曰。爾卽斐理伯乎。曰。子豈識我耶。曰。先父乃及爾滿家守獵兵也。喟然曰。孤人之子者我也。罪當萬死。予曰。不然。救孤子之命者亦爾也。功罪足相抵矣。斐理伯聞之。意稍安。時環而聽者甚衆。斐理伯殭臥榻上。面如死灰。少頃。復強起語曰。將死之人。一言相托。山妻容伯爾家久矣。子歸。爲我語之。曰。我自蒙罪以來。棄邪歸正。每念前非。淚潸潸下。今當臨死。別無他語。所不能忘情者。惟妻子耳。語次。握予手。若復有所言者。然不能支。伏枕已氣絕。



矣。予乃就其立功處。坎地瘞之。表曰。斐理伯之墓。海軍第二步隊兵士立。家人聞斐里格斯語。爲默然者久之。斐理伯之婦。聲淚俱下。郎培爾夫人慰曰。嫂其勿哀。爾夫生前萬惡。盡以一死湔之矣。斐理伯之婦。索麻里斯作書報其子。謂曰。我兒遠在軍中。未知其父以死贖罪事也。妾恐言之不盡。敢求我子馳書相報。其詳切感人。必勝妾萬萬也。雖然。子仁人也。亦能使妾一享晚景之樂乎。但恐無厭之求。不免見外耳。麻里斯曰。苟有所懷。盡言無隱。但可爲力。決不相却也。曰。我兒不日當離伍矣。亦願招之使來乎。曩者郎培爾遇害時。我兒遠在異域。罪不相及。又蒙郎培爾夫人矜宥。卽令來此。當不見嫌。且我兒非乃父比。性頗勤謹。素爲舊主人垂青。子果用之。必當感恩圖報。而妾自有生以來。未嘗享家庭之樂。今得我母子團聚。効力一門。於願足矣。幸憐而許之。麻里斯曰。善。以告家父。必蒙許諾。令子臨行時。嘗謂予言。樂爲我家所用。若此志不變。自當招之使來。時及爾滿抱病在家。邀伯爾譚叙。伯爾急詣蒲桃爾。至則見及爾滿據坐大椅。須若納在旁。一見伯爾。

兩頰紅暈。逡巡引避。坐定。及爾滿曰。今日當暢談也。敢問君家近狀何如。曰。合家安善。曰。麻里斯已訂婚否。年幾何矣。曰。二十七矣。曰。此求偶之年也。曰。某意亦復如是。我兒輒曰。心之所安。何汲汲爲。然我兒素佩君教。歸當以君言告之。曰。僕爲是言。意別有在。僕老矣。精力漸不支。不幸墮溝壑。其若之何。語未及畢。伯爾止之。曰。勿爲此言。曰。智者當有遠慮。僕所躊躇者。惟我女終身之托耳。後顧茫茫。恐不及待也。單門無強近親。僕嘆曰。後田務殷繁。無人相助。伶仃弱女。其何以支。區區此心。竊願及時擇配。以慰平生。但得母女降心相從。此事不難成就。無如我女苛於擇婿。諸少年來此相見。竟無常意者。我女習於田家之樂。雅願終老此鄉。必得志趣相同。能治田務者。乃肯委身焉。所以難也。僕百思之下。僅得一人。以問我女。亦已首肯。雖然。子僕之老友也。親見我女在襁褓中。又蒙尊嫂提攜保抱。老夫之外。我女於君家最爲親密。婚姻事大。敢折衷焉。伯爾稱謝。及爾滿曰。世間萬事。不能盡美。僕頃所言。其人學識兼長。嫻於農事。無如境地清寒。亦一憾也。子明眼人。

易地思之。謂我計將安出。曰。貴產之有無。非第一要義也。君所器重之人。既合令媛之意。便可定計。君故饒於賞。令媛得之。以之事畜裕如也。婚媾大事。而以貴產之有無爲進退。則惑矣。曰。然則子居我地。不三思而決矣。曰。然。曰。僕亦何獨不然。僕意中人非他。卽令子麻里斯也。伯爾驚曰。君殆未之思耶。一村農耳。纖鄙無足數。卽僕嘗爲君家傭矣。門第相懸。何可強也。曰。子才高行潔。心佩久矣。頃者設辭問難。備蒙教益。今知僕屬意令子。遂變前說。豈知僕之愚見。但論人品之清濁。不計門第之高卑。今僕與子皆第一流人物也。何多讓焉。今日歸虜。請以鄙意與尊閫。及令子商之。倘蒙見答。卽以復我。伯爾欣然而歸。具道其語。婦女之性。多視其子爲無上上品。馬爾脫素珍重麻里斯。若以及爾滿之屬。意爲無足異者。然念其子且暴富。大喜過望。撫而語之曰。非兒之賢能。曷有今日之樂乎。麻里斯聞之失色。問頃者何以答及爾滿。伯爾曰。及爾滿情辭懇摯。已敬謝之矣。爾與須若納雅相契厚。琴瑟之歡。諒所深願。麻里斯曰。兒之厚須若納固也。然安敢望琴瑟之歡。

乎。請二思焉。勿輕諾也。麻里斯自是遂不復言。念門第懸殊。恐有疑其以詐計得妻者。踟躕不自安。幾廢寢食。亦無意治農務。終日遨遊田野。冥心獨往。日中若無所見者。衆異其忽改常度也。以告其父。伯爾亦疑其驟遇意外事。或致心疾。萬福之原。幾釀奇禍矣。伯爾以情告及爾滿。須若納引爲大戚。不暇避俗嫌。謀徑訪麻里斯。促令許諾。遂駕驢車。遍走邑中。一日遇於河濱。麻里斯垂頭冥坐。不知其來也。須若納呼曰。有何開罪於子。令我羞愧若此。麻里斯聞聲驚起。曰。非須若納乎。曰。然。子我之意中人也。忍相棄耶。曰。妹勿聽浮言。相愛之忱。雖赴湯蹈火。不敢辭也。曰。愛我而不以我爲妻。是何說也。曰。奈門第相懸。何。曰。子猶不免貧富之見耶。向以子爲智者。今而知智者亦不能無失也。子試思之。我性耽鄉居。兼之鬻蠶一身。終鮮兄弟。而父親年邁多病。何忍遠離膝下。頗願得一同志者。托以偕老。既可遂我孝養之忱。又得令衰親收指臂之助。頃見諸少年美冠華服。香氣撲鼻。一入田中。不辨菽麥。其能辨菽麥者。率皆粗獷鄙夫。令人作惡。百計相攸。頗難其選。快

婿之稱。非子莫屬。子而相棄。雖終身不嫁可也。我兩人幼同嬉戲。子之母猶我之母也。子之妹猶我之妹也。且出我於死地者。非子也耶。麻里斯聞是言也。如夢始覺。心竊自喜。須若納知其意已轉。問曰。我父若不與我全產。但資我奩金。令與子之貲產相等。子其許我乎。曰。相慕之雅。豈論貧富乎。曰。我必不能舍蒲槐爾而去也。已請於父。辭奩金而受田產矣。曰。勿爲是言。曩聞父親語。令我心神恍惚。今已悟矣。即當往見尊公。白感激之忱。并謝一時之失也。須若納請麻里斯登車。執轡授之。笑曰。爾多疑人。脫令我御車而行。將以我爲不願相從也。既承金諾。其爲我執轡。麻里斯辭不肯。須若納固請之。乃許。逾月舉婚禮。鄉長年老而病。以副鄉長主婚。先讀頌辭。首誦麻里斯敦品勵學。不愧盛舉。次誦須若納志趣高潔。重情義而輕貲產。足式薄俗。爲辭甚美。衆皆疑諾愛爾之所爲也。未幾。伯爾舉鄉長。爲從女法皮納主婚。及爾滿奩贈甚厚。從麻里斯須若納之請也。麻里斯旋以阿蕤格牛羊歸蒲槐爾。留其產乳者。令若奈脫母子及斐理伯母子牧之。

.....

種  
者  
傳

百六十四

欽命二品頂戴江南分巡蘇松太兵備道袁 爲

給示諭禁事據文明編譯印書局職商廉泉愈復丁寶書稟稱職等糾合同志集有鉅款創辦編譯印書局租定房屋於上海四馬路胡家宅地方擇於六月初一日開辦所有編譯已成各書陸續付印平價出售誠恐書買射利易名翻印或妄爲增損改換面目貽誤士民實非淺鮮嗣後凡本局編譯印行各書均不許他人翻刻除另稟 商務局憲外合詞稟求准允立案出示嚴禁翻印并請札飭縣廨一體出示曉諭並照會 租界領袖美總領事立案等情到道據此除函致 租界領袖美總領事暨分行縣廨一體立案示禁外合行給示諭禁爲此示仰書買人等須知文明印書局編譯各種書籍均係該職商等苦心經營而成爾等不得私易書名改換面目翻印漁利倘敢故違一經該職商等查知許即指名具稟本道立即提案不貸其各凜遵毋違切切特示

光緒貳拾捌年陸月初七日示

# 新書廣告

## 法國教育小說八種

生計家政女工農業商業國民陸軍海軍小說書八種或數陳倫理或闡發實業以說部之體裁作小學之讀本大率為中下等社會而設故程度不高合於最大多數國民之用乃小說中極有用之書教育中最靈效之機器也已譯成者兩種如左

國民教育小說

### 冶工軼事

法國剛奈隆原著上海朱樹人譯此國民小說也以國民義務演為實事讀者如身入法國親接彼都士女之言論歷覽選舉裁判政府議會組織運動之現象其情節之離奇喧染之生動如袍笏登場維妙維肖其名言論彈見洽聞尤說部中極有用之書也洋裝一厚册售洋三角五分

農業教育小說

### 穡者傳

法國麥爾香原著上海朱樹人譯此農業小說也述某農家購買田莊用新法樹畜不數年遂至小康條理井然井可法可師而情景之描繪如生事



新書廣告

蹟之變幻不測使平澹枯寂之境一變為離奇生動之觀即無志於農業者亦足以破睡魔而資消遣矣洋裝一厚本售洋五角

科學小說 鐵世界

科學小說者文明世界之先導世有不喜科學書未有不喜科學小說者其輸入文明思想最為敏捷是書為法國迦爾威尼氏原著氏為巴黎小

說巨子其所撰科學小說不下十餘種鐵世界其一也書中述鍊鐵村之規制網舉目張有條不紊吾國近今工業發萌管理大工作是書其師導也書成在普法戰爭後其意欲大快法入之心故書中描寫日耳曼人刻薄嚴冷之風不遺餘力以忍心毒害之忍毗卒自斃於毒瓦斯淵經置周密之鍊鐵村條成為、衆占領之棄地而佐善醫士以仁慈博愛克成厥功雪恥復仇至為愉快吾、而尙有未死之心者乎亟讀是書以為前途之奮勵焉可譯者為吳門、又筆離奇變幻自始迄終無一語能為人預猜者者真奇文奇書也 售洋四角

總發行所上海棋盤街方書局

光緒二十九年八月印刷

同年九月發行

教育小說(穉者傳)

每部大洋五角



原著者 法國麥爾香

繙譯者 上海朱樹人

印行兼發行者 上海文明書局

印刷所 上海四馬路胡家宅文明書局活版所

發行所 上海棋盤街北段文明書局發行所

1957

*[Faint, illegible text, likely bleed-through from the reverse side of the page]*

57

1957